



নাট্যୋৎসবে অভিনীত

# ରଂ ମୋ ଲୀ ଟା ନ

ତିନ ଅଙ୍କେ ସମ୍ପୂର୍ଣ୍ଣ

ସୁବର୍ଣ୍ଣ ବୈରାଗୀ

ପ୍ରାକକଥନ

ଦିଲୀପ କୁମାର ରାୟ

আর্ট গ্যাণ্ড লেটার্স পাবলিশার্স, ৩৪নং  
চিঙ্গরঙ্গন এভিনিউ, কলিকাতা-১২ থেকে  
শ্রীমণিজিৎ সেন প্রকাশ করেছেন ।

তৃতীয় সংস্করণ: ১৭ই জানুয়ারী, ১৯৫৯

প্রচ্ছদশিল্পী : রণেন আয়ন

২০৯, কর্নআলিস স্ট্রীট, লক্ষ্মী-সরস্বতী  
প্রেসের সত্বাধিকারী শ্রীরামকৃষ্ণ পান  
বইটি ভার নিয়ে ছেপেছেন ।

କବି ମନୀଷୀ,

ଶ୍ରୀପ୍ରେମେନ୍ଦ୍ର ମିତ୍ର

ଅକ୍ଷାନ୍ତଦେଷୁ

এই লেখকের

নাটক : স্বভরাষ্ট্র

উপন্যাস : মধুরাই

এক মুঠো আকাশ

ছোট গল্প : ছিলেন বাবুর দেশে ও

অস্বাভাবিক গল্প

মুখোদ দল এই নাটক প্রথম অভিনয় করে থিয়েটার সেন্টার মঞ্চে,  
রবিবার ৫ই জাহ্নুয়ারী ১৯৫৮। সেই রজনীর ভূমিকালিপি।

বিশ্ব	অমরেশ দাসগুপ্ত
নিতাইবাবু	গোবিন্দ চক্রবর্তী
হরিপদ	তারাপদ গঙ্গোপাধ্যায়
সরষু	ধারা রায়
দেবব্রত	রবীন্দ্রলাল রায়
অজিত	বিখীন সেন
খুড়ো	হরেন্দ্রনাথ চট্টোপাধ্যায়
সাবিত্রী	কৃষ্ণা রায়
মায়া	হিলোলা আয়ন দত্ত
সমর	অঙ্ক বন্দ্যোপাধ্যায়
রাজেন মল্লিক	গোপালকৃষ্ণ রায়
জগদীশ	শৈলেশ গুহনিয়োগী
সতু	তরুণ রায়
ভদ্রলোক	যামিনী মিত্র
সতীন	প্রণবেশ বর্দন
ভোলা	অসিত রায়
মদন	মোহন মিত্র
নিত্যানন্দ	সুনীল সিংহ
পঞ্চানন	অরুণ চট্টোপাধ্যায়
ইন্সপেক্টর	শিবকুমার শর্মা
নিবারণ	বুদ্ধদেব ভট্টাচার্য
পুলিশ	সৌমেন চক্রবর্তী

পরিচালক—তরুণ রায়



## প্রাককথন

বছর সাত আট আগে শ্রীধনঞ্জয় বৈরাগীর সঙ্গে আলাপ ক'রে মনটা একদিকে যেমন খুশি হয়েছিল, তেমনি একটু অস্বস্তিও বোধ করেছিলাম—প্রথম দিকে। ইনি যে নির্ভেজাল বাস্তববাদী, ওরফে রিয়ালিস্ট!

কিন্তু মনের প্রকৃতি বিচিত্র, ধনঞ্জয় বৈরাগী বাস্তববাদী জেনেও তাঁর স্বভাবের গুণে তাঁর ঐতি আকৃষ্ট না হ'য়ে পারলাম না। একটা কারণ ছিল সম্ভবতঃ এই যে, মন একটু ভরসা পেল দেখে যে, তিনি দ্বিজেন্দ্রলাল রায়কে বড় প্রেমিক, কবি ও নাট্যকার ব'লে মানেন। এ-যুগে দ্বিজেন্দ্রলালের উজ্জল আদর্শবাদে অনেকেই সাড়া দেন না দেখতে পাই। কারণও দুর্বোধ্য নয় : বাস্তববাদীরা সব আদর্শবাদকে মনে করে থাকেন মাটিছাড়া, উদ্ভট স্তূতরাং শিল্পে বর্জনীয়। কিন্তু হ'লে হবে কি, আমি আবাল্য তাঁর স্বপ্ন তথা আদর্শবাদের আবহাওয়ায় মানুষ তো, কাজেই ভালবেসে এসেছি মানুষের মহত্বকে, ও গুঁদার্ষকে, আদর্শের জন্তে ঋব ছেড়ে অঋবকে বরণ করাকে, সাহেব পুরাণে যাকে বলে putting all one's eggs in one basket অথবা burning one's boats.

সম্ভবতঃ ধনঞ্জয় বৈরাগী দ্বিজেন্দ্রলালকে ঠিক সেজন্তে ভাল বাসেননি যেজন্তে বেসেছিল দিলীপ রায়। তবে দুটি পথিকের প্রেমের লক্ষ্যে মিল থাকলে পথ চলাতে স্নেহ ও দরদ উপচিত না হয়েই পারে না। ফলে ধনঞ্জয় বৈরাগীকে আত্মীয় বলে বরণ করে নিলাম দুর্গা ব'লে।



তারপর ওঁর কয়েকটি গল্প পড়ি। এদের মধ্যে ‘পচা ফল’ নামে একটি গল্প পড়ে শুধু যে মুগ্ধ হই তাই নয় উৎফুল্লও হয়ে উঠি জেনে যে ওঁর বহিরাবরণ বাস্তববাদীর হলেও অন্তরের অন্তঃপুরে আদর্শবাদকে উনি সাদরেই জিইয়ে রেখেছেন।

অতঃপর ধনঞ্জয় বৈরাগীর ‘রূপোলী চাঁদ’ নাটকটি পড়ে চমকে উঠলাম। ইউরেকা! এই তো চাই দেখানো, যে মানুষ তার লাঞ্ছনা অভাব অনটন পিছুটান কার্পণ্য লোভ মোহ স্বেপ্নেও ভোলে না, ভুলতে পারে না, নিজের মহত্তর স্বরূপকে, সত্যকে। ‘ধনঞ্জয় বৈরাগী সচরাচর নিপুণ ভাবেই দেখান মানুষের দৈনন্দিন হীনতা দীনতা নীচতা অসারতা—কী নয়? কিন্তু রূপোলী চাঁদে তাঁর লক্ষ্য তো মানুষের নগণ্যতা ও জঘন্যতার অপ্রতিবাত্ত ফটোগ্রাফি নয়—তিনি সজাগভাবেই চান মানব চরিত্রের ব্যাপক দৈন্ত, গ্লানি ও তামসিক অশুদ্ধির পরিপ্রেক্ষিতে ফুটিয়ে তুলতে তার অন্তর্লীন মহত্ত্ব, সংসাহস ও দিলদরিয়া মহাপ্রাণতাকে।

নাটকের প্রাণ হ’ল সংঘর্ষ ( Conflict ) ও উদ্বেগ ( Suspense )। উপস্থাসেও এ-দুটি গুণ কম বেশি থাকেই—মানে ভাল উপস্থাসে, কিন্তু উপস্থাসের প্রধান উপজীব্য তার গল্পবস। এ গল্প চিত্তাকর্ষক হলেই উপস্থাস দাঁড়িয়ে গেল। সংঘর্ষ ও উদ্বেগ যদি সেখানে পাই তবে সেটা উপরিলাভ। কিন্তু নাটকের স্বধর্ম হল চরিত্রের সঙ্গে চরিত্রের, তথা ভাবের সঙ্গে ভাবের সংঘর্ষ, আর এই সংঘর্ষ আমাদের মনকে উদ্দীপ্ত ক’রে রাখে উদ্বেগ জাগিয়ে রেখে—কী হয় কী হয়!

‘রূপোলী চাঁদ’ নাটকে নাট্যকার সংঘর্ষ ও উদ্বেগ ঘনিষে তুলেছেন তার আগেকার নাটক ‘ধ্বতরাষ্ট্রের’ মত। আমার নিজের মতে এ নাটকটি ‘ধ্বতরাষ্ট্রের’ চেয়ে বেশি উৎরেছে প্রধানতঃ তিনটি কাণে।

এক। এর চরিত্রগুলি বেশি জীবন্ত ও ঘটনাপ্রবাহ বেশি সহজ  
স্বরে চলেছে তর তর করে।

দুই। এর নানা ঘাত প্রতিঘাত বেশি বিশ্বাসযোগ্য। সমরসেট  
মম বলেছেন ঠিকই, নাটক নভেলের কোথাও প'ড়ে যদি পাঠকের  
মনে হয়—‘এমন হয় না,’ তাহলেই লেখক ডুবলেন। বস্তুতঃ সব  
আর্টেরই সেরা নৈপুণ্য ফুটে ওঠে চিত্রণীয়কে জীবন্ত তথা বিশ্বাসযোগ্য  
ক'রে তুলতে পারার মধ্যে। এ নাটকটির নানা চরিত্রই জীবন্ত—বিশেষ  
ক'রে খুড়ো, সতু, সাবিত্রী, বিশ্বনাথ ও সরষু।

তিন। এতে পা'ই মাহুষের মধ্যে সেই শক্তির পরিচয় যা তাকে  
দৈনন্দিন জীবনের তুচ্ছতা কাটিয়ে সত্যিকার মাহুষত্ব লোকে উত্তীর্ণ  
করতে পারে, যে নিয়তির চাপে ম'রেও মরে না ও হৃদয়ের ডাকে  
সাড়া দেয় বিচক্ষণতার নিষেধ না মেনে।

এ ছাড়া ‘রূপোলী চাঁদ’-এ সংলাপের স্বচ্ছন্দতা ও স্বাভাবিক ত্বরিত  
গতি মনে হয় সবাইকে তৃপ্তি দেবে। বাংলার মধ্যবিত্ত পরিবার  
বস্তিতে বাস করেন কীভাবে ও বস্তির হাজার দৈন্তের মধ্যেও বাঙালি  
তরুণ তরুণী, প্রৌঢ় প্রৌঢ়রা কিভাবে স্নেহ মমতা ও পরচর্চা, দরদ ও  
ঈর্ষা, আনন্দ ও বিষাদের মধ্যে দিয়ে প্রাণের মনের খোরাক সঞ্চয় ক'রে  
থাকেন তার চিত্রণ মনে হয় শুধু বাস্তববাদীদেরই নয় আদর্শবাদীদের  
চিত্তেও ভরসা এনে দেবে যে দুঃখ দৈন্তের জগদ্বলন চাপেও হয়তো  
আমরা নিশ্চিষ্ট নিশ্চিহ্ন হয়ে যাব না—কেননা আজও আমরা  
বিশ্বাস হারাইনি মাহুষের মহত্বে, বন্ধুত্বে, অপরিণামদর্শী ঔদার্যে ও  
সর্বোপরি নরনারীর প্রেমে যে এ যুগের লক্ষপ্রতিষ্ঠ বস্তুতাত্ত্বিকতার  
ভয়াল ভ্রুকুটিকে উপেক্ষা ক'রে আজও বলবার শক্তি ধরে : যাকে

ভালবাসি তার স্থখেই আমার স্থখ, কেন না এই হ'ল ভালবাসার  
ধর্ম—“তৎস্থখস্থখিত্বম্” ।

পরিশেষে ‘ধ্বতরাষ্ট্র’ নাটকের ত্রীপ্রেমেন্দ্র মিত্রের ভূমিকার একটি  
মন্তব্য উদ্ধৃত করব—তাতে সায় দিতে চেয়ে—যে, নাট্যরচনা-পদ্ধতিতে  
এ-নাটকে নবযুগের উজ্জল সূচনা সৃষ্টি ।

ইন্দিরা-নিলয়

হরিকৃষ্ণ আশ্রম

পূনা ৫

২৪শে ডিসেম্বর, ১৯৫৭

ত্রীদিলীপ কুমার রায়

## প্রথম অঙ্ক

[কলকাতার সহরতলীতে বিশ্বনাথের গ্যারেজ। তাদের ইঁট বার করা বাড়ী আর লাগোয়া বস্তীর মাঝখানের জায়গাটা কাঁটা তারের বেড়া দিয়ে ঘিরে বিশ্বনাথ তার কারখানা চালু করেছে। বছদিনের পুরোন বুড়ো বটগাছটা এই গ্যারেজের এক কোণে পূর্ণ আভিজাত্য নিয়ে দাঁড়িয়ে আছে। তার বয়সের সম্মান দিয়েই যেন গুঁড়ির কাছটা এখানকারই কোন বিত্তশালী ভদ্রলোক সিমেন্ট বাধিয়ে দিয়েছেন। তারই ওপর বিরাজমান অনেকগুলো সিঁদুর মাখানো কালো গোল পাথর। এখানে দেবতার জন্ম কবে হয়েছিল, বিশ্বদের মত যারা নবীন তারা জানেনা, কিন্তু তার প্রাপ্য সম্মানটুকু দিতে এদের কার্পণ্য নেই। তাই প্রয়োজনে অপ্রয়োজনে বস্তীর মেঝেরা গ্যারেজের মধ্যে এসে এই গাছের তলায় দাঁড়িয়ে ফুলজল দেবতার চরণে দিয়ে যায়।

মঞ্চের বাঁদিকে বুড়ো গাছ আর তারই উন্টোদিকে একটা ভাঙ্গা গাড়ী ইটের ওপরে দাঁড়িয়ে থাকে, মিস্ত্রীরা হয়তো তলায় শুয়ে কাজ করে। বোঝা যায় এই গাড়ীর পাশে আছে অদৃশ্য অনেক গাড়ী, যেখানটা পুরোদস্তুর কারখানা। ঠক্ ঠক্, ঠন্ ঠন্ শব্দই তার প্রমাণ দেয়। বাঁদিকে গাছের পাশ দিয়ে গেলে সোজা যাওয়া যায় বস্তীর মধ্যে। পিছনদিকে বিশ্বদের ভাড়াটে বাড়ীর দেওয়াল ইঁট বার করা শ্রাওলামাথা। আর একটা রঙ ওঠা দরজা। এই বাড়ী থেকে বেরিয়ে বাসিন্দারা অনেক সময় সামনের স্বল্পপরিসর জায়গায় এসে বসে। এ যেন বৈঠকখানা। বিশেষ করে পাড়ার অনেকেরই

আনাগোনা এইখানে। সেই কারণেই' গাছের তলায় সারাক্ষণই পাতা থাকে একটা বেঞ্চি, কয়েকটা ভাঙ্গা টুল আর কেরোসিন কাঠের বাস।

পর্দা উঠলে দেখা যায়, বিষ্ণু গাড়ীর তলায় শুয়ে কাজ করছে। রবিবার, সকাল আটটা বাজে। আদির ধুতি পাঞ্জাবী পরা একজন মাঝারী বয়েসী সোখীন ভদ্রলোকের প্রবেশ। দেখলেই মনে হয় বেশ রাসভারী লোক। তিনি ভেতরে ঢুকে হাতের কাগজের সঙ্গে বাড়ীর নম্বর মেলাতে চেষ্টা করেন; পরে বিষ্ণুকে কাজ করতে দেখে তাকেই জিজ্ঞেস করেন।]

ভদ্রলোক—এটা আটাত্তরের পাঁচ বাই সি?

[ কোন উত্তর নেই, ঠক্ ঠক্ গাড়ী মেরামতের শব্দ ]

ভদ্রলোক—( একটু জোরে ) এটা কি আটাত্তরের পাঁচ বাই সি?

বিষ্ণু—রাস্তার নাম?

ভদ্রলোক—বিক্র হালদার লেন।

বিষ্ণু—কাকে চাই?

ভদ্রলোক—হরিপদবাবু বাড়ী আছেন?

বিষ্ণু—থাকতে পারেন।

ভদ্র—একটু খবর দেবে?

বিষ্ণু—দেব।

ভদ্র—ব'লো নিতাইবাবু এসেছেন।

বিষ্ণু—একলা?

ভদ্র—তার মানে?

বিষ্ণু—জিজ্ঞেস করছি সঙ্গে আর কেউ আছেন নাকি?

ভদ্র—না।

বিশ্ব—তাহ'লে বহ্নন ।

ভদ্র—কোথায় ?

বিশ্ব—ঐ বৈঠকখানায় ।

ভদ্র—তোমার তো মুখটাই দেখতে পাচ্ছি না । কোনদিকে যাব ?

বিশ্ব—আবার যাবেন কোথায় ? বহ্নন না গাছতলায় । ঐটেকেই  
আমরা বৈঠকখানা বলি ।

[ ভদ্রলোক চারদিক দেখে খাটিয়ার ওপর বসেন । তখনও বিশ্ব  
ঠক ঠক শব্দ করছে । একটু পরে । ]

ভদ্র—ওহে, একটু তাড়াতাড়ি বাবুকে খবরটা দাওনা ।

বিশ্ব—( গাড়ীর তলা থেকে বেরুতে বেরুতে ) ঘোড়ায় জিন দিয়ে  
এসেছেন মনে হচ্ছে । এত তাড়া কিসের ?

ভদ্র—জরুরী দরকার আছে ।

বিশ্ব—( জুট দিয়ে হাতের কালি মুছতে মুছতে ) বিয়ের সম্বন্ধ বুঝি ?

ভদ্র—কি করে জানলে ?

বিশ্ব—কথা হচ্ছিল শুনছিলাম । তা মেয়েটি কাজে কন্মে কিরকম ?

ভদ্র—কাজে কন্মে !

বিশ্ব—ওটা জেনে রাখা ভাল । আজকালকার মেয়েরা গান বাজনা,  
লেখাপড়া নিয়েই থাকে কিনা ; ঘর-সংসারের কাজটা  
তেমন—

ভদ্র—( রেগে ) তুমি হরিপদবাবুকে খবরটা দেবে, নাকি দাঁড়িয়ে  
দাঁড়িয়ে বাজে বকবে ?

বিশ্ব—বাজে কথা একটুও বলিনি । দেখছেন তো ঐ ইট বারকরা  
ভাঙ্গা বাড়ী । আপনার মেয়ের এখানে এসে তো আর  
গানবাজনা করলে চলবেনা । বাসনমাজা, কাপড়কাটা—

ভদ্র—থামবে ? সব জিনিসের একটা সীমা আছে । তুমি যদি খবর না দাও, আমিই ভেতরে গিয়ে—

[ কথা শেষ হবার আগেই দরজা খুলে হরিপদবাবুর প্রবেশ, বয়স ষাটের কাছাকাছি । লম্বা, ভারী শরীর । পায়ে বাত, লাঠিতে ভর দিয়ে চলে । ভদ্রলোককে দেখে হেসে এগিয়ে এসে । ]

হরিপদ—আরে নিতাইবাবু, আপনি এসে গেছেন ?

ভদ্র—এসেছি এখন নয়, আধঘণ্টা আগে ।

হরিপদ—বলেন কি ? আধঘণ্টা আগে, অর্থাৎ আমাকে একটা খবর পাঠাননি ।

ভদ্র—খবর পাঠাবো কি করে, এই গুণধরটিকে তখন থেকে বলছি—

হরিপদ—ও ! বিশ্বর কথা বলছেন । ঐতো আমার ছেলে বিশ্বনাথ ।

( বিশ্বকে ) বিশ্ব, নিতাইবাবুকে প্রণাম কর ।

বিশ্ব—হাতে বড় কালি লেগেছে । ধুয়ে আসি ।

হরিপদ—তা এসো আর ঐ সঙ্গে দিদিকে ব'লো চায়ের জল চাপাতে । আমরা একটু বাদেই ভেতরে যাচ্ছি ।

[ বিশ্বর বাড়ীর ভিতর প্রস্থান ]

ভদ্র—না না । জলযোগের ব্যবস্থা করবেন না । আমি তো অজিতকে বারণ করেই দিয়েছিলাম ।

হরিপদ—তা হলেও আজ এই প্রথম এলেন । তার ওপর একটা মধুর সম্পর্ক গড়ে উঠবার সুযোগ রয়েছে ; না খাইয়ে তো ছাড়বোনা ।

ভদ্র—আহা, সে লৌকিকতা পরে হবে এখন ! অজিত কোথায় ?

হরিপদ—অজিত এখনও আসেনি । ওদের নিয়ে তো ঐ মুন্সিল ।

ঠিক কাজের দিনে কোথাও না কোথাও আটকে পড়বে ।

ভদ্র—আপনার ছেলে শুনেছিলাম ‘বিজ্ঞানেশ্বর্য্যন’।

হরিপদ—হ্যাঁ, ও নিজেই গ্যারেজ করেছে। - মোটরের কারখানা।

নিজের ছেলে বলে বলছিলাম। ব্যবসায় ওর বুদ্ধি বেশ।

ভদ্র—হ্যাঁ, নিজের হাতেই বুঝি সব কাজকর্ম করে?

হরিপদ—দরকার পড়লে করে বোধহয়। বুঝতেই তো পারছেন  
ছোট গ্যারেজ।

ভদ্র—হ্যাঁ, এ বাড়ীটাতে আপনারই?

হরিপদ—হ্যাঁ, অনেকদিন সারানো হয়নি আর কি। ইচ্ছে আছে বিশ্বর  
বিশ্বের সময় রং করাবো। আরে মশাই সত্যি কথা বলতে  
কি, আমাদের সময় এত রঙ টঙ করা ছিল না। সাদা  
হোয়াইট ওয়াশ করে রাখতো। এখন দেখছি রংয়ের যুগ।  
লাল, নীল, হলদে, সবুজ—লজ্জার কথা বলবেন না, ঠাকুরমা  
পর্যন্ত গালে রং মাখছে।

ভদ্র—হ্যাঁ, আপনার ছেলে পড়াশুনো বোধহয়—

হরিপদ—ঐ ম্যাট্রিক পর্যন্ত। তার বেশী আর পড়তে চাইল না।  
আমি তখন ‘থ্যাকার কোম্পানী’তে কাজ করি। ভেবেছিলাম  
পাশটা করলে বিশ্বকেও এ অফিসে ঢুকিয়ে দেব। সাহেবদেরও  
বলে রেখেছিলাম। হাজার হোক একটা সাহেবী  
কোম্পানীতে চাকরী।

ভদ্র—তা তো বটেই, কিন্তু হ’লো না কেন?

হরিপদ—বিশ্ব ইতিমধ্যে মোটর মেকানিকের কাজে শিখতে লেগে  
গেল; আমাদেরই পাড়ার রাজেনবাবু গ্যারেজে। সে  
সময় আমি খুব রাগারাগি করেছিলাম। তবে দেখলাম  
ওর বুদ্ধি আছে। বছর পাঁচেক না যেতেই নিজে গ্যারেজ



করে ফেললো। তা সত্যি কথা বলতে কি, আমি যা  
মাইনে পেতাম তার অনেক বেশী বিত্ত রোজকার করে।

ভদ্র—রোজকার তো হবেই। তবু লেখাপড়াটা, অন্ততঃ একটা পাশ—  
হরিপদ—কিন্তু পড়াশুনা ও করে। নিজের ছেলে বলে বলছি না।  
রোজ রাতে কাজকর্ম সেরে বই কাগজ ওন্টায়।

ভদ্র—সে অবশ্য আপনাই ভাল বলতে পারবেন। আমার পক্ষে  
মানে ঐ প্রথম অভ্যর্থনাটায় একটু ভয় পেয়ে গিয়েছিলাম  
আর কি।

হরিপদ—না, না। ও আপনাকে বুঝতে পারেনি। ভেবেছে হয়তো  
কোন Customer এসেছে। নইলে কিন্তু ওরকম ছেলেই  
নয়। কারখানার কাজ নিয়ে থাকলে কি হবে, এমন শান্ত  
স্বভাব আর অমায়িক ব্যবহার।

[বাড়ীর ভিতর থেকে বিত্তর চীৎকার, চাকরকে বকছে, ফের  
মিথ্যে কথা। হতভাগা একটা কাজে নেই। নিষ্কর্মার টিপি, বেরো-  
বেরো এখান থেকে।]

হরিপদবাবু ও ভদ্রলোক আড়ষ্ট হয়ে কথাগুলো শোনেন। এক  
রকম প্রায় মারতে মারতেই চাকরটাকে বিত্ত বার করে আনে।  
এদের সামনে দিয়েই বাড়ীর বাইরে বার করে দেয়। নিজের মনেই  
গজরাতে থাকে।]

বিত্ত—নিবারণটা এমন বদমায়েস হ'য়েছে, একেবারে কথা শোনেনা।  
তিন দিন ধরে চেষ্টামেচি না করলে একটা কাজ ওকে দিয়ে  
করানো যাবেনা। দিলাম ওকে দূর করে তাড়িয়ে।  
খবরদার আর বাড়ীতে ঢুকতে দিও না।

হরিপদ—আহা! এসব চেষ্টামেচি পরে হবে এখন।

বিশ্ব—ঐ পরে পরে করেই তো এই অবস্থা দাঁড়িয়েছে। এসব লোককে কি করে শাস্তা করতে হয় আমি জানি।

[ বিশ্ব বেশ রাগতে রাগতেই বাড়ীর মধ্যে চলে যায়। হরিপদবাবু কি বলে কথা শুরু করবেন ভেবে পাননা। ]

হরিপদ—সত্যি আজকালকার চাকরবাকরগুলো যা হ'য়েছে। কই আমাদের সময়তো এরকম ছিলনা, পান বিড়ি সিগ্রেট সিনেমা, এক একটি লবাবপুতুর।

ভদ্র—আমি আজ তা'লে উঠি।

হরিপদ—এখনি উঠবেন কি—এখনও অজিত এলোনা, তা ছাড়া চা জলখাবার—

ভদ্র—বাস্তবিক, আর একদিন হবে এখন।

হরিপদ—না, না, সে হ'তেই পারেনা।

[ নেপথ্যে বিশ্ব—তা আমি কি করব? তুমিই নিয়ে যাওনা, অজিতদারই তো চেনা লোক, অত লজ্জার কি আছে।

সরযু—চাকরটাকে তো খুব মেজাজ দেখিয়ে তাড়িয়ে দিলে, ভদ্রলোক যে তখন থেকে বসে আছেন, দয়া করে নিয়ে যাও।

বিশ্ব—আমার বয়ে গেছে; ওরকম ভদ্রলোক ঢের ঢের দেখেছি।

সরযু—আঃ শুনতে পাবেন। ]

ভদ্রলোক—(কথা শুনে বিরক্ত হ'য়ে উঠে দাঁড়িয়ে) আমি তাহ'লে এখন যাই।

হরিপদ—( হতাশ স্বরে ) আস্থন।

[ ভদ্রলোক চলে যাবার পর হরিপদবাবু দীর্ঘনিঃশ্বাস কেলে বিরস মুখে খাটিয়ার ওপরে বসেন। কাগজটা টেনে নিয়ে নাড়াচাড়া করেন,

একটু পরে হাতে খাবার, মাথায় ঘোমটা দিয়ে সরযু ঢোকে,  
ভ্রলোককে না দেখতে পেয়ে বিস্মিত হয়।]

সরযু—নিতাইবাবু চলে গেলেন ?

হরিপদ—হ্যাঁ।

সরযু—চা মিষ্টি না খেয়েই !

হরিপদ—তাড়া ছিল।

সরযু—মেয়ে দেখার কথা কিছু বলে গেলেন ?

হরিপদ—না।

সরযু—তা হলে কি ছেলে পছন্দ হ'লোনা ?

হরিপদ—হলেই আশ্চর্য হ'তাম।

সরযু—হ্যাঁ, বিস্মটাও যা। আজকে ছুটির দিন, তবু কালিঝুলি মেখে  
গাড়ী সারাতে গেল, কতবার বললাম একটা কথাও যদি  
শোনে। সবতাতে বাড়াবাড়ি। আজকে নিবারণটাকে  
তাড়াবার কি দরকার ছিল ?

হরিপদ—আমাকে বলে কোন লাভ আছে, তাকেই বলনা।

সরযু—দরকার নেই বাবা, এখনি আবার পাঁচটা কথা শুনতে হবে,  
মিছিমিছি কতগুলো খাবার কেনা হলো।

হরিপদ—অজিতও আসবে, ওকে ভাল করে খাইও। (একটু থেমে)  
হ্যারে অজিতের সঙ্গে আমার দাদাভাই আসবে তো ?

সরযু—না বোধ হয়, ওর ঠাকুমা নাতিকে ছেড়ে এক মিনিট থাকতে  
পারেন না।

হরিপদ—তাহলে বেয়ানকে আমার নাম করে বলিস, নাতিকে শুধু  
নিজেব কাছে আটকে রাখলে চলবে কেন ? এখানেও যে  
একটা বুড়ো দাঁহু রয়েছে, সে কথা মনে রাখতে হবেতো।

[দেবব্রতের প্রবেশ, হাতে বাজারের থলি, পরনে ধুতি গেঞ্জী, পায়ে তালতলার চটি, হরিপদবাবুর সমবয়সী, ভারী শরীর। বেশী বক্ বক্ করেন। বিলাতী কোম্পানীতে বড়বাবু পর্যন্ত হয়ে রিটারার করে এখন দেশী কার্কে কাজ করছেন।]

দেবব্রত—এই যে হরিপদ দা, ভাবলাম, তোমার খবরটা নিয়ে যাই।

বাজার করে ফিরছিলাম। উঃ যা মাগি গণ্ডার বাজার।

এই যে মা সরযু, কি খবর? সব ভাল তো? কবে এলে?

সরযু—কাল সন্ধ্যাবেলা।

দেবব্রত—বেশ, বেশ, বাবাজীর খবর ভাল? খোকার? বিষ্ণু কোথায়?

হরিপদ—ভেতরে।

দেবব্রত—ছেলের বাহাদুরী আছে। আমি তো ওকে বলি, বিখনাখ দি বিখনকর্মা, রাজুবাবুকে একেবারে কানা করে দিয়েছে, এই তো, এখুনি বাজারে দেখা, মুখ শুকিয়ে এতটুকু। পুঁই ডাঁটা কিনছে। আমাকে দেখেই বগলদাবা করে এক কোণে টেনে নিয়ে গেল। ইনিয়ে বিনিয়ে কত-কথা, যাতে আমি বিষ্ণুকে বুঝিয়ে আবার ওর গ্যারেজে পাঠিয়ে দিই।

হরিপদ—রাজুবাবুর তাহলে এতদিনে খেয়াল হয়েছে।

দেবব্রত—খেয়াল হবে না! যত বড়লোকের গাড়ী, সব যে এখন বিষ্ণুর গ্যারেজে। এই তো আমাদের অফিসের অফিসার সিং নাহেব বলেন, বিষ্ণুর গ্যারেজে ঘোঁরার পর থেকে ওর গাড়ী একেবারে নতুন হয়ে গেছে। ইংরাজীতে ঠাট্টা করে বলেন, রিজুভিনেটেড, মানে ঘোঁরান ফিরে পেয়েছে আর কি।

[ দেবব্রত নিজের রসিকতায় হাসে। 'সরষু যেন লজ্জা পায়,  
আন্তে আন্তে বাড়ীর ভেতরে চলে যায়। ]

হরিপদ—আজ তোমার ওখানে তাসের আড্ডা বসছে তো?

দেবব্রত—রবিবারের ছুপুর, বসবে না! আমাদের তো ঐ একটি  
মাত্র রিক্রিয়েসন্। সারা সপ্তাহ খেটে, একদিন তাসে বসি।  
নো সিনেমা, নো থিয়েটার। কত বুড়ো দেখেছি এখনও  
ফুটবলের মাঠে কিউ দিচ্ছে! আমি যাইনা। নেভার,  
নেভার।

হরিপদ—ক'সপ্তাহ যেতে পারিনি। আজ যাবে। তোমাদের আড্ডায়।  
সবাই আসে?

দেবব্রত—নিশ্চয়ই। বিপিন, অম্বুফুল, বুড়োদা, ভট্টাচার্যি বাড়ীর সেই  
গৌফওয়াল ভদ্রলোক, সকলে।

হরিপদ—খুড়ো যায় না?

দেবব্রত—( আমতা আমতা করে ) ও যায় মাঝে মাঝে।

হরিপদ—হঁ, খুড়ো আজকাল দেখছি তোমার ওখানে খুব একটা  
দরকার না পড়লে যায় না। ব্যাপারটা কি বলতো!

দেবব্রত—দেখ, আমিও কদিন ধরে তোমাকে বলব বলব ভাবছিলাম,  
এই খুড়োর ব্যাপার নিয়ে। মানে ওর ঐ মেয়েটা।

হরিপদ—মায়া?

দেবব্রত—হ্যাঁ, পড়াশুনো করছে। কলেজ যাচ্ছে। সবই ভাল।  
কিন্তু বড় হান্কা।

হরিপদ—কি বলছ? আমি ঠিক বুঝতে পারছি না।

দেবব্রত—কি জানি, আমার তো মনে হয় একটু বেশি গায়ে পড়া।

হরিপদ—ওঃ, ( একটু থেমে ) আমার অত চোখে পড়েনি।

দেবব্রত—আমার মেজ ছেলেটা, সমর। চালাক চতুর। বিলিভী কোম্পানীতে কাজে ঢুকিয়ে দিয়েছি। কিন্তু মাথাটা যেন সর্বক্ষণই ওর পেছনে ঘুর ঘুর করে।

হরিপদ—এ নিয়ে কোন কথা উঠেছিল নাকি?

দেবব্রত—ই্যা, খুড়োকে একটু এ নিয়ে কথা বলতে গিয়েছিলাম। ও যেরকম, কোন কথা কানেই তুলল না। হেসেই অস্থির। কিন্তু তারপর থেকেই আসা যাওয়াটা কমিয়ে দিয়েছে। (হরিপদের কাছ থেকে বিশেষ উৎসাহ না পেয়ে) যাক গে, ও সব কথা পরে হবে। যাই আবার। বাজারটা আটকে রাখলে গিন্নী আবার টেচামেচি শুরু করবে। (উঠে যেতে যেতে) তাহলে আসছ তো?

হরিপদ—ই্যা ছুপুরে যাবো।

[ দেবব্রতর প্রস্থান। বাইরে থেকে ওর গলা শোনা যায় “এই যে বাবাজী। সকাল বেলায়। আমাদের শান্ত্রে বলে না, কান টানলেই মাথা আসে। যাও যাও, ভেতরে যাও। আবার পরে দেখা হবে। আজকের দিনটা আছ তো?” গলার আওয়াজ দূরে চলে যায়। সঙ্গে সঙ্গে অজিত ঢোকে। বছর তেত্রিশ বয়েস। রোগা লম্বা। পরনে আর্দ্র পাঞ্জাবী, ধুতি। মুখ বেশ গম্ভীর। ]

হরিপদ—এস অজিত, বড্ড দেয়ী করে ফেললে?

অজিত—না আমি এসেছি খানিকক্ষণ আগে।

[ হরিপদবাবু জিজ্ঞাসু দৃষ্টিতে মুখ তোলেন ]

অজিত—এই মোড়ের মাথায় নিতাইবাবুর সঙ্গে দেখা। উনি এখান থেকেই ফিরছিলেন। সব শুনলাম।

হরিপদ—ও সবই শুনেছ! তাহলে তো আর বলার কিছু নেই।

অজিত—বিশু এখন যা হয়ে দাঁড়াচ্ছে তাতে সোজাসুজি ওব সঙ্গে তো একটা কথা বলার দরকার। আমি একজনকে নিমন্ত্রণ করে এলাম এখানে আসবার জন্তে, তাকে যদি এভাবে অপমান করা হয়।

হরিপদ—ঠিক কথা, অপমান করার জন্তে তো আর তুমি তাকে নেতন্তর করোনি। এরকম জানলে তুমি তাকে ডাকতে না, তুমি কেন আমিও ডাকতাম না।

অজিত—ভদ্রলোক যে ভাবে আমার সঙ্গে কথা বলেন, তাতে লজ্জায় আমার মাটির সঙ্গে মিশে যেতে ইচ্ছে করছিল। নৌদরপুরের দত্ত বাড়ীর সেজ তরফের কঁর্তা, নিজে এলেন। তাকে না বল বসতে, না করল খাতির যত্ন। কি আর বলবো।

হরিপদ—আরে ছি ছি ছি ( কথা এড়িয়ে যাবার চেষ্টা করে ) সরষু, অজিত এসেছে। চা দাও, চা।

অজিত—আমি কিন্তু এ নিয়ে বিশ্বব সঙ্গে স্পষ্ট কথা বলতে চাই।

হরিপদ—স্পষ্ট কথা, বিশ্বব সঙ্গে ? তা বল না, আমি না হয় ততক্ষণ বাড়ীর ভেতরে খাই।

অজিত—না, না, আপনার সামনেই কথা বলবো।

[ অজিত দরজার কাছে গিয়ে ডাকে, বিশ্ব, বিশ্ব। বিশ্ব বেরিয়ে আসে। পরেন লুঙ্গি। খালি পা। পায়ে রবারের চটি। সবে চান এসে এসেছে। চুলু আঁচড়ানো হয়নি। হাতে গামছা। ]

বিশ্ব—আমায় ডাকছো ?

অজিত—তুমি জানতে, নিতাইবাবুকে আমি আজ এখানে আসতে বলেছিলাম ?

বিশ্ব—নিতাইবাবু, কোন্ নিতাইবাবু? ও সেই ফুলবাবুটি। যিনি  
সকালবেলা এসেছিলেন?

অজিত—হাঁ।

বিশ্ব—জানতাম।

অজিত—তবে তার সঙ্গে তুমি ওরকম ব্যবহার করেছ কেন?

বিশ্ব—কিরকম ব্যবহার?

অজিত—এটা রসিকতা করবার সময় নয়। তিনি বলছেন, তাঁকে  
অপমান করা হয়েছে।

বিশ্ব—তা যদি করা হয়ে থাকে, আমি করিনি। হয় তো অগ্ন কেউ  
করেছে।

অজিত—অগ্ন কেউ করেছে, এখন ভাল মানুষ সাজছো? ছুটির দিনে  
ঐ ভাবে কালিঝুলি না মাথলেই কি চলতো না?

বিশ্ব—কাজ ছিল।

অজিত—সেটা অগ্ন সময় করলেই হ'তো। এতে উনি কি মনে  
করলেন? তুমি একটা মিস্ত্রী।

বিশ্ব—(হেসে) আমি তো মিস্ত্রীই অজিত দা।

অজিত—আমি জানি তুমি মিস্ত্রী। কিন্তু সেটা ঢাক পিটিয়ে জাহির  
না করলেই কি নয়?

বিশ্ব—জাহির করবো কেন? আমি যা, আমি তাই। দাঁড়কাক  
তো দাঁড়কাক। ময়ূরের পালক লাগাব কেন? (একটু  
থেমে) মিস্ত্রীর বাড়ী মেয়ে দিতে হলে কি অবস্থায় হয়তো  
পড়তে পারেন, তাই চোখে দেখে গেলেন। এখন বিয়ে  
দেওয়া, না দেওয়া তার ইচ্ছে। ও সব ঢাক ঢাক শুড় শুড়  
আমার কাছে নেই!



অজিত—বানরের গলায় কেউ মুক্তার হার দেয় না !

[ সরযুর প্রবেশ ]

সরযু—বাবা তুমি নাইতে যাবে তো ? চানের জল দিয়েছি ।

হরিপদ—( ব্যস্তভাবে ) এত দেরী, তোরা যা হয়েছিল, সকাল থেকে জলের জন্তে বসে আছি । বাতের ব্যাটাও বুঝি বেড়ে গেল । তার ওপর চাকরটাও নেই ।

বিশু—জন্তুর ভাইটা তো ক’দিন থেকে কাজের জন্ত ঘোরাঘুরি করছে । ওকেই আজ সন্ধ্য থেকে আঁসতে বলে দেব’খন ।

হরিপদ—দেখ, একটা লোক তো দরকারই । ( বাড়ীর ভিতর প্রস্থান )

সরযু—তুমি হাত মুখটা ধুয়ে নেবে, না চা এখানেই নিয়ে আসবো ?

অজিত—না, আমি আর এখন কিছু খাব না ।

সরযু—কেন ?

বিশু—( বেক্সির ওপর বসতে বসতে ) অজিত দা রেগে গেছে ।

সরযু—কার ওপর ?

বিশু—কার ওপর আবার । হুনিয়া শুদ্ধ লোক যার ওপর রেগে আছে । রাজুবাবু চটে গেছেন আমি গ্যারেজ করেছি বলে । মেয়ের বাপ চটে গেছে আমি ভদ্রতা করিনি বলে, অজিত দা চটে গেছে—

অজিত—থাক, তোমাকে আর রসিকতা করতে হবে না । ( সরযুকে ) তুমি তৈরী হয়ে নাও । আমি এখনি বীণাদের বাড়ী থেকে ঘুরে আসছি । তোমায় নিয়ে যাব ।

সরযু—ঠাকুরঝি কি কয়েকদিন থাকবে আমাদের কাছে ?

অজিত—মা তো তাই বলতে বলেছে ।

[ অজিত দরজার দিকে গেলে বিশু আগলে দাঁড়ায় ]

বিশ্ব—খবরদার অজিত দা! না খেয়ে এখান থেকে নড়বার চেষ্টাটি  
কোরোনা। একেবারে রক্তারক্তি হ'য়ে যাবে বলে দিচ্ছি।  
দিমিটাও যা বোকা। যাও মিষ্টিটিষ্টি কি আছে, নিয়ে এসো।  
দেখবে তোমার গৌর নিতাইয়ের মিষ্টির খালা, আমরা  
শালা ভগ্নীপোতে পাঁচ মিনিটে উড়িয়ে দেব।

[সরযুর হেসে প্রশ্ন। বিশ্ব অজিতকে টানতে টানতে বোঝাতে  
নিয়ে গিয়ে বসিয়ে দেয়।]

অজিত—(অনেকটা শীত হ'য়ে) কিন্তু যাই বল বিশ্ব, তোমার এখন  
একটু বোঝা উচিত। এ বাড়ীতে একটা মেয়ে না এলে—

বিশ্ব—তোমার একটা শালাজ দরকার তো? আলবত এনে দেব।

অজিত—কে তোমার সঙ্গে কথা বলবে। একটা বংশ বলে জিনিস  
আছে মানো?

বিশ্ব—নিশ্চয়ই! তা নইলে বংশধর আসবে কি করে? (হেসে  
অজিতকে বলে) মানে ব্যাখ্যা হোলডার—

অজিত—খালি ঠাট্টা—এই যে নিতাইবাবু, সৌন্দরপুরের দত্ত বাড়ীর  
সেজ তরফেব কর্তা। এদের সঙ্গে একটা সম্বন্ধ হ'লে সমাজে  
সাড়া পড়ে যায়।

বিশ্ব—একটু গোলমালে ঠেকছে অজিত দা। সৌন্দরপুরের সেজ  
তরফের কর্তা হঠাৎ এই এঁদে গলির মিজীকে জামাই  
করবেন কেন?

অজিত—আহা! অবস্থা পড়ে গেছে তো। জমিদারী টারিতো এখন  
নেই। তাছাড়া বলতে নেই, ভদ্রলোকের মেয়েও পাঁচ  
ছটি। আমার সঙ্গে অনেকদিনের পরিচয়। মনে কর না,  
তুমি আমার সম্বন্ধী—তাছাড়া দাবী দাওয়া তেমন নেই।

বিশ্ব—ও হো! অবস্থা পড়ে গেছে! গিলেঁ করা পাঞ্জাবী দেখে কে বুঝবে বাবা। কি চোমরানো গোঁফ। তাহলে আর ভুল্ললোক অপমানটা গায়ে না মাখলেই পারতেন।

অজিত—আভিজাত্য বলে তো একটা জিনিস আছে। কত বড় বংশ।

বিশ্ব—(জোরে হেসে) তা নতুন, একেবারে কংশরাজের বংশধর।

গ্রাম লাহিড়ী বনগ্রামের, কি যেন হয় গঙ্গারামের—

[খুড়োর প্রবেশ, গোলগাল হাসিখুশী মাল্লুষ। সবার আগে ভুঁড়িটা এগিয়ে চলে। বয়েস পঞ্চাশের কাছাকাছি। ধুতির ওপরে তালি লাগানো গলাবন্ধ কোট, কেডসের দুপাশ দিয়ে কড়ে আঙ্গুল বেরিয়ে রয়েছে। হাসতে হাসতে কথা বলে।]

খুড়ো—কি ব্যাপার বিশ্ব ভাই, হঠাৎ গঙ্গারামকে নিয়ে উঠে পড়ে লাগলে কেন?

বিশ্ব—আরে আরে খুড়ো, এসো। এক পাত্র খুঁজছিলাম।

খুড়ো—কার জন্তে?

বিশ্ব—বলনা অজিতদা। সেই যে স্মন্দরবনের শিয়াল রাজার, ছোট তরফের—

অজিত—আঃ! বিশ্ব!

খুড়ো—সে যার জন্তেই হোক, পাত্র যদি চাও, তবে একজন আছে?

বিশ্ব—কে?

খুড়ো—আমি। দ্বোজব'রে হ'লে কি হবে, খাটি কুলীন বংশ, আমার ঠাকুরদার ত্রিশটা বউ ছিল। কতজনের তো নামই মনে করতে পারতেন না।

বিশ্ব—আহা হা, সেইসব দিন চলে গেল।

খুড়ো—তার উপর মনে কর, আমি হলাম রূপে কার্তিক, গুণে  
পরমেশ্বর, চরিত্রে—

বিশ্ব—একটু ভুল হ'য়ে গেল খুড়ো। তুমি হলে গুণে কার্তিক, রূপে  
গণেশ, আর চরিত্রে—

[ সরযু প্রবেশ, হাতে মিষ্টির থালা ]

সরযু—কার রূপ গুণের ব্যাখ্যা হচ্ছে শুনি ?

বিশ্ব—এই যে দিদি, নিতাইবাবুর মেয়ের পাত্র ঠিক করে ফেলেছি।  
এমন স্বপুরুষ, উচু বংশ, দাবীদাওয়া কিছু নেই।

খুড়ো—দাবীদাওয়া আছে বৈকি। অন্ততঃ একখানা বাদশাহী গড়গড়া।  
ওই বস্তীর ঘরে বসে যখন টানবো, তোদের সব ঘরে অম্বুরী  
তামাকের গন্ধ বেরবে।

সরযু—অম্বুরী তামাকের গন্ধ পরে হবে এখন, নিন ধরুন দেখি—

[ সরযু তিনজনকে খাবার দেয়—তারা খেতে খেতে গল্প করে ]

সরযু—কিন্তু খুড়ো, আপনি তো কখনও নিজের বাড়ীর কথা  
বলেন না।

খুড়ো—বলতে আর দিলে কই, সত্যি কথাই তো বলছিলাম। নাম  
করা কুলীন বংশের ছেলে আমরা কিন্তু হলে হবে কি ভাই,  
বস্তীতে এসে যখন উঠতে হলো ওসব গা থেকে মুছে গেছে।

অজিত—আপনার আত্মীয় স্বজন ?

খুড়ো—ওসব ঝামেলা নেইরে ভাই। এক পিসি আছে শুনেছি, সে  
বোধহয় কাশীতে থাকে। বুড়ি মরমর, কিছা হয়তো মরেই  
গেছে এতদিন। আমিও তার খবর রাখিনা—সেও আমার  
রাখেনি।

সরযু—কেন ?

খুড়ো—বুড়ির অনেক টাকারে ভাই। আমি তার সঙ্গে ভাব করতে গেলেই ভাববে পয়সার লোভে গেছি। তাই ওপথ মাড়াইনি কখনও।

বিষ্ণু—তুমি বলতে চাও—ঐ পিসি ছাড়া তোমার সাতকুলে কেউ নেই।  
ডাহা মিথ্যে কথা।

খুড়ো—না, না, আছে দুটো ভাইপো। তারাও আমার খবর নেয় না। পাছে এই বস্তীতে থাকা খুড়ো কিছু চেয়ে বসে। এ বড় মজার দুনিয়াতে ভাই, সকলেই ভয়ে ভয়ে চলে, কে কোন স্বযোগে কিছু খসিয়ে দেয়। সেই ভয়েই আশ্রয়।

সরযু—আশ্চর্য—অন্ততঃ কাজেকর্মেওতো খবর নেবে। হাজার হোক আত্মীয়।

খুড়ো—আমি কিন্তু খুব স্বখে আছি। ওসব ঝামেলায় না থাকাই ভালো। আজকালকার মানুষগুলোকে তো দেখি কেউ যেন সুখী নয়। এই দেখনা অজিত ভায়া এই বয়সেই তোমার কপাল কুঁচকেছে।

সরযু—(হেসে) তাতে কি হ'লো ?

খুড়ো—ঐ তো আমার Barometer—এই যে আমার প্রশস্ত কপাল, কখনো ঢেউ খেলতে দেখবে না দাছ। যখনই দেখবে কপালে জোয়ার ভাঁটা খেলছে, বুঝবে অসুখ করেছে, মনের অসুখ। চিকিচ্ছে দরকার।

বিষ্ণু—ঠিক বলেছ খুড়ো, একেবারে খাটি কথা। আমিও কপালে দাগ পড়লেই সিরিশ কাগজ ঘষি।

খুড়ো—সেইজন্মেই তো তোকে এত ভাল লাগেবে বিষ্ণু।

বিশ্ব—চুলে বোধহয় জট পড়ে গেল, আঁচড়ে আসি।

( বিশ্ব বাড়ীর ভিতরে প্রস্থান )

খুড়ো—তারপর অজিত ভায়া তোমার খবর বল, বাড়ীর সব ভাল তো?

অজিত—মার শরীর তত ভাল নেই, তবে বয়সও হয়েছে। আপনি কেমন?

খুড়ো—দিবি আছি—সকালবেলা ঝুলি কাঁধে ওষুধ বিক্রি করতে যাই, রোজই কিছু না কিছু হয়। তবে যেদিন বেশী বিক্রি হয়, তারপরদিন আর বার হইনা, বুঝলে না বেশী রোজগার হ'লেই সর্বনাশ, বাতে ধরবে।

সরষু—খুড়ো এবার মায়ার একটা বিয়ে দিন।

খুড়ো—বিয়ে? হ্যাঁ দেবো [অজিতকে] তোমার বাবার সঙ্গে ক'দিন আগে দেখা হ'য়েছিল উনি বোধহয়—

[ বিশ্বনা, বিশ্বনা, ডাকতে ডাকতে সাবিত্রীর প্রবেশ। বছর পঁচিশ বয়েস। চেহারায় বেশ চটক আছে। মুখে পান ]

সাবিত্রী—বিশ্বনা আছে?

সরষু—কেন?

সাবিত্রী—একটা দরকার ছিল।

সরষু—বোধহয় বাড়ীর ভেতরে কিছু করছে।

সাবিত্রী—ওঃ, আচ্ছা থাক। ( বেরিয়ে যেতে গিয়ে আবার ফিরে এসে ) একটা ভাল শাড়ী আছে। কিনবেন?

সরষু—( বিরক্ত স্বরে ) না, না, এখন হাতে পয়সা টয়সা নেই।

সাবিত্রী—দেখুন না জিনিসটা। [ শাড়ী বার করে ] মাত্র পনেরো টাকা দাম।

সরষু—বাবা, পনোরো টাকা !

সাবিত্রী—[ অজিতকে দেখে ] ঠেকে তো চিনতে পারলাম না ?

খুড়ো—সেকি ওষে অজিতভায়া। আমাদের জামাই।

সাবিত্রী—ও অজিতদা, ( কাছে গিয়ে ) আপনার সঙ্গে আগে আলাপই  
হয়নি। আপনি দেখলে বুঝতে পারবেন—দিকিকে কি  
সুন্দর মানাবে !

অজিত—আমি আর শাড়ীর কি বুঝি !

সাবিত্রী—ওমা পুরুষমাতুষ, বোয়ের জন্তে শাড়ী কিনবেন, তা আর  
বুঝতে পারবেন না ? সত্যি বলছি অজিতদা, তাঁতি বো  
আমার কাছে রেখে গেছে, বাজারে অনেক দাম।

অজিত—( সরষুকে ) তুমি দেখনা, আমি আর—

সাবিত্রী—খোলটায় হাত দিয়ে দেখুন না—এই আঁচলটা ?

খুড়ো—সাবিত্রী ওটা বরং আমাকে দাও।

সাবিত্রী—খুড়ো আপনি রাখবেন নাকি মায়ার জন্তে ?

খুড়ো—নিজে রাখতে না পারি কোথাও বেচে দেবোখ'ন। ঘরে  
দিয়ে যেও। সতু এখনও ফেরেনি ?

সাবিত্রী—না খুড়ো।

খুড়ো—ফিরলে একটু খবর দিও। ওর সঙ্গে কথা বলবো।

সাবিত্রী—নিশ্চয়ই খবর দেব, ঐ সঙ্গে শাড়ীটাও দিয়ে যাবো—চলি  
অজিতদা, দিদি বিশুদাকে বলবেন আমি এসেছিলাম।

[ প্রস্থান ]

অজিত—এই তোমাদের সাবিত্রী ?

সরষু—ই্যা।

অজিত—এরজন্তেই সবাই অস্থির ! আশ্চর্য। বাবার চান হয়েছে ?

সরযু—দেখ, জলতো দিয়েছি।

অজিত—ওঁর কাছে একটা জরুরী কথা আছে, সেয়ে আনি।

[ বাড়ীর ভিতরে প্রস্থান ]

সরযু—কি গারে পড়া মেয়ে বাবা। (খুড়োর কাছে বসে) কৈ

আমার কথার জবাব দিলেন না খুড়ো?

খুড়ো—কি কথা বলতো, ও ই্যা মায়ার বিয়ে তো দেবো।

সরযু—তোড়জোড় কিছুই দেখছি না। মেয়ে বড় হ'চ্ছে, এখন থেকে দু'এক জায়গা চেষ্টা না করলে—

খুড়ো—তা সত্যি; তবে পড়ছে তো। কিছুদিন পড়ুক না, কলেজ থেকে বেরুলে—

সরযু—আপনি বেশ আছেন খুড়ো। যখন মায়ী স্কুলে পড়তো বলতেন, এই স্কুল থেকে বেরুলে, এখন বলছেন কলেজ থেকে বেরুলে, এরপর হয়তো বলবেন—

খুড়ো—সাধে কি বলিরে ভাই। আমার সামর্থ্য কোথায়! জানতো এদেশে মেয়ের বিয়ে দেওয়া, আমার না আছে টাকা না আছে ঘর।

[ 'বাবা' 'বাবা' বলে ডাকতে ডাকতে মায়ার প্রবেশ। উজ্জল শ্রামবর্ণ, মুখশ্রী ভালই, চ্যাপ্টা করে বেড়া খোঁপা বাঁধা। ]

মায়ী—বাবা এই নাও চাবিটা। দেখ আবার হারিও না।

সরযু—তুই অনেকদিন বাঁচবিরে মায়ী। এখুনি তোর কথা হচ্ছিল।

মায়ী—(হেসে) আমার কথা না আমার বিয়ের কথা?

সরযু—ও আড়াল থেকে শোনা হচ্ছিল বুঝি!

মায়ী—আড়াল থেকে শোনবার তো দরকার নেই, বাঙ্গালীর ঘরে মেয়ে বড় হলে তো তার বিষয় ঐ একটি কথাই হয়।



খুড়ো—তা তুমি বলতে পারনা, মা। আমার ঘরে কিন্তু কখনও ওসক আলোচনা হয়না।

মায়ী—(খুড়োর কাছে গিয়ে) তা সত্যি, বাবা কখনও বাজে জিনিস নিয়ে মাথা ঘামায় না।

খুড়ো—মেয়ে বড় হয়েছে আমার আর ভাবনা কি, এবার আমি ‘রিটায়ার’ করব। এখন ওর দায়িত্ব আমাকে খাওয়ানো, পরানো—কি বল?

সরষু—তার চেয়ে একটা নিৰ্ব্বাণ্ট জামাই খুঁজে বার করুন না, সেই তো আপনার ছেলের মত হবে।

খুড়ো—একে জামাই পাওয়া যায়না। তার ওপর আবার নিৰ্ব্বাণ্ট, শুধু সোনা হ’লে চলবেনা, একেবারে গিনিসোনা—কোথায় পাব শুনি?

সরষু—চেষ্টা করতে হবে, পাঁচজনকে বলতে হবে, নিজে খুঁজতে হবে।

মায়ী—না বাবা, তোমায় আর খোঁজাখুঁজি করতে হবেনা।

[সময়ের ব্যস্তভাবে প্রবেশ। বয়স বছর ২৬২৭ বা কিছু বেশি।

পরনে প্যান্ট, হাওয়াইয়ান শার্ট, পায়ে চটি।]

সমর—বিশু বাড়ী আছে? একটু দরকার ছিল।

সরষু—(মায়াকে গুনিয়ে) মায়ী ঠিকই বলেছে, না খুঁজতেই যদি পাওয়া যায়। খোঁজাখুঁজি করে আর লাভ কি?

[সমর ছাড়া সকলেই কথা শুনে হাসে]

মায়ী—(লজ্জিত হ’য়ে) আঃ! সরোদি তুমি যে কি বলো।

সমর—কি খোঁজার কথা বলছেন, কিছু হারিয়েছে নাকি?

খুড়ো—না হারালে বুঝি খুঁজতে নেই। তোমার যা বুদ্ধি সমর।

সকলেই তো খুঁজছে, সৈনিক যুদ্ধ খুঁজছে, সন্ন্যাসী শান্তি  
খুঁজছে, বাড়ীওয়াল ভাড়াটে খুঁজছে।

সরযু—উহ খুড়ো, ওটা উন্টো হল, বলুন ভাড়াটে বাড়ীওয়াল  
খুঁজছে।

খুড়ো—তাই সই ভাড়াটে বাড়ীওয়াল খুঁজছে, দোকানী খন্দের  
খুঁজছে, মাঠার ছাত্র খুঁজছে, নেতারা স্বযোগ খুঁজছে,  
চালাকরা বোকা খুঁজছে—এ খোঁজার কি আর শেষ  
আছে?

সরযু—ওঃ আপনারা সব Philosophical কথা বলছেন—আমি  
আবার Commerce এর ছাত্র ছিলাম কিনা, ও subjectটা  
ঠিক বুঝিনা।

খুড়ো—আরে ভাই আমরা Philosophyর ‘ফ’ জানিনা। দর্শন কি  
আর আমাদের জন্তে, আমাদের হোল ঠর্শন—সব ঠেকে  
ঠেকে শেখা, বুঝলে না।

সরযু—আমি বলছিলাম কি দিদি, একটা জলসা টলসা করলে কি  
রকম হয়?

সরযু—জলসা, হঠাৎ?

সরযু—হঠাৎ মানে অনেকদিন পাড়ায় কিছু হয়নি, তাই ভাবলাম  
একটা ঘরোয়াভাবে কিছু করলে—মানে আমরা নিজেরাই  
যে যা পারি আর কি, এই ধরন মায়া হয়তো গান করলো,  
মীরার বাজালো, আমি হয়তো আবৃত্তি করলাম। এই  
ধরনের Cultural Programme আর কি?

মায়া—ই্যা সরযুদা, খুব ভাল হয়। আমার বন্ধু ইলা বেশ নাচতে  
পারে, আর সরোদি তুমিওতো আগে গান করতেন?

সরযু—(হেসে) রক্ষে কর বাবা। আমাকে আর এর মধ্যে টেনোনা।

এই বয়সে আর লোক হাসিয়ে দরকার নেই।

খুড়ো—জলসায় খাবার ব্যবস্থা থাকবে কিনা তা তো কেউ বললে না।

সমর—তা চান্না উঠলে করা যেতে পারে।

খুড়ো—যারা আর্টিস্ট, তাদের অন্ততঃ খাওয়াতে হবে।

সমর—বেশ আমরা খাওয়াব।

খুড়ো—বাস, তাহ'লে আর্টিস্টদের লিস্টে আমার নামটা লিখে নাও।

মায়া—সেকি বাবা, তুমি কি করবে?

খুড়ো—(হেসে) কেন গান করবো। বিশ্বাস হচ্ছে না? তবে

শোন—

চিনতে কি পেরেছ আমায় ব্রাহ্মণী,

আমি সেই ভৃগুমুনি।

তোমার জন্তে একটি মালসা

আনছিলাম সরবৎ,

ঐ ভূতে এসে চুমুক দিয়ে

খেলো সেতাবৎ

তোর নথ নাড়া, পানতাভাত খাওয়া

ঘুচে যেতো একুনি।

চিনতে কি পেরেছ আমায় ব্রাহ্মণী?

[ বাড়ীর ভেতর থেকে অজিতের প্রবেশ ]

অজিত—এবে গানের আসর বসে গেছে দেখছি?

খুড়ো—আসর ঠিক নয়, জলসার রিহাসাল চলছে।

অজিত—খবর মশাই বলছিলেন আজ আর বোধহয় দাবা খেলা  
হবেনা।

খুড়ো—কে বলছে হবেন?। আলবৎ হবে। পাঁচ দানে তোমার  
খণ্ডকে গজগজাং করে দেবো। (ভেতরে যেতে যেতে)  
আর সময় Artist দেব listএ আমার নামটা তুলতে ভুলে  
যেওনা। [হর ভাঁজতে ভাঁজতে গ্রহান]

সরযু—খুড়ো বেশ আছেন। সকলের সঙ্গে হাসিঠাট্টা করেই কাটিয়ে  
দেন, আপনভোলা মাহুষ।

অজিত—সংসারটাকে ভুলে থাকতে পারলে, তবেই আপনভোলা  
হওয়া যায়।

সরযু—তার মানে?

অজিত—আমাদের আপনভোলা হবার স্বযোগ দিচ্ছে কে—সকাল  
থেকে উঠেই যদি কাজ করতে হয়, তাহলে আর—

মায়ী—(হেসে) বাবা! কিন্তু এই ভাবেই হাসতে হাসতে সব কিছু  
করেন। একলা মাহুষ। ঝামেলাও তো কম নয়।

সরযু—মায়ী ঠিক বলেছে অজিতদা, খুড়ো আশ্চর্য লোক। বাজারে  
যাও সেখানে সবাই তাকে চেনে। খুড়ো বলে ডাকে, হাসি-  
ঠাট্টা করে। এপাড়া ওপাড়া যেখানেই যাওনা কেন—খুড়ো  
আমাদের Universal খুড়ো—বাড়ীর ঠাকুরদা থেকে নাতনি  
পর্ষন্ত সকলের খুড়ো।

সরযু—সত্যি কতদিন তো ঔকে দেখছি, সারাজীবন শুধু লোকের  
ভালই করে গেলেন। শিবঠাকুরের মত মন না হলে কি  
আর এমন লোক হয়।

অজিত—(কথাটা যেন পছন্দ হয়না) আমি তাহ'লে এখন বীণাদের  
বাড়ীই যাই। মায়ী কথাটা বলে আসি।

সরযু—তাড়াতাড়ি ফিরবে তো?

অজিত—চেষ্টা করবো। ভূমিও তৈরী হয়েনিও।

সরযু—সে কি এখানে খেয়ে যাবেনা ?

অজিত—বলতে পারছিনা। দেখি কি হয়। [প্রস্থান]

সমর—কি হয়েছে দিদি, অজিতদা যেন একটু বিরক্ত হয়েছে মনে হ'লো।

সরযু—কি জানি। ওর যে কখন কি মেজাজ। (একটু হেসে)  
তোরা বসে গল্প কর—আমি ভেতর থেকে আসছি।

[সরযুর বাড়ীর ভিতরে প্রস্থান]

মায়া—দিদির চেহারাটা যেন কি রকম হয়ে গেছে। আগে কত সুন্দর ছিল।

সমর—হাসিটা ছিল বড় মিষ্ট। আমার খুব ভাল লাগত। জান  
মায়া, বিত্ত, সতু আর আমি হয়তো স্কুল পালিয়ে সিনেমা  
দেখতে গেছি, ধরা পড়ে গেলাম কারুর কাছে। চড়াপড়  
সকলেই মারত কিন্তু দিদির কাছে একদিনও বকুনি খাইনি।

মায়া—সমরদা।

সমর—কি মায়া ?

মায়া—তুমি বেশ লোক। বলেছিলে না সিনেমা দেখাতে নিয়ে যাবে।  
কি হলো ভুলে গেছ তো ?

সমর—( ব্যাগ খুলতে খুলতে ) সমর ঘোষের Dictionaryতে ঐ একটি  
শব্দ নেই—ভুল। ভুল আমি করিনা। কি করে মাহুষ ভুল  
করে তা বুঝতেই পারিনা। এই নাও।

মায়া—( সময়ের হাত থেকে টিকিট নিয়ে ) বীণাপাণি !

সমর—হ্যাঁ। তোমার কলেজ থেকে দু'মিনিটের রাস্তা। কালকের  
ম্যাটিনীশো।

মায়া—তোমার অফিস নেই?

সমর—সে আমি ঠিক ম্যানেজ করে নেব। বড়বাবু আমায় খুব ভালবাসেন কিনা।

মায়া—তুমি কেন রজনীর টিকিট কাটলে না? বিজনকুমার নাকি অঙ্কুত পার্ট করেছে। কলেজের সবাই বলাবলি করে।

সমর—ঐ জন্মেই তো কাটিনি। বিজনকুমার আর বিজনকুমার। তোমাদের কি আজকাল টেস্ট বলেও একটা জিনিস নেই? যেমনি থ্যাংক্স নাক, তেমনি ভোঁদা মুখ, একটা আলুভাতে মার্কি চেহারা।

মায়া—(হেসে) অমনি তোমার হিংসে হয়ে গেল। মেয়েরা তো বলে ওর চেহারা একেবারে রোমিওর মত।

সমর—তা হ'তে পারে। আফ্রিকাতেও তো রোমিও জুলিয়েট 'প্লে' হয়।

মায়া—তার মানে বিজনকুমারকে তুমি কাক্রী বলছ?

সমর—আলবৎ বলছি। একশবার বলছি।

[ বাড়ীর ভেতর থেকে বিস্তর প্রবেশ ]

বিস্ত—একশ বার কি বলছিগরে সমর?

সমর—এই যে বিস্ত আমি মায়াকে বলছিলাম—

মায়া—(বাধা দিয়ে) থাক, আপনাকে আর বক বক করতে হবেনা।

বিস্ত—কিরে মায়া বড্ড চটেছিল মনে হ'চ্ছে।

মায়া—এখনো চটিনি, তবে সমরদা যদি আরও ঘ্যানর ঘ্যানর করেন তাহলে চটতে হবে।

বিস্ত—সাবধান সমর নো মোর ঘ্যানর ঘ্যানর। (মায়াকে) ইয়ারে তোর হাতে ওটা কি?

মায়া—(তাড়াতাড়ি লুকিয়ে ফেলে) না না ওকিছু নয়। একটা কাগজ।  
বিশু—ওটা একটু আগে লুকোন উচিত ছিল। সিনেমার টিকিট  
তো। বুঝতে পেরেছি। তোর ভয় নেই খুড়ো কিছু  
বলবেনা। কিন্তু সময় খুব সাবধান। তোমার বাবা যদি  
একবার টের পান তাহলে আর আস্ত রাখবেন না।

সমর—আঃ বিশু অত চোঁচাচ্ছিস কেন ?

বিশু—(আরও জোরে) চোঁচাচ্ছি কৈ ? তোরা সিনেমার টিকিট  
কেটেছিল তো আমার কি ?

মায়া—লক্ষ্মীটি বিশুদা, পায়ে পড়ি চুপ করুন।

বিশু—মুখ বন্ধ করতে হলে ভাল মিষ্টি চাই।

মায়া—আমি খাওয়াবো।

সমর—আমিও খাওয়াবো।

বিশু—ব্যস, ব্যস, তাহ'লেই হবে। (একটু থেমে) কিন্তু সময়  
দেবুকাঁকা আমায় দুদিন ডেকে বলেছে তোকে বারণ করতে।  
যাতে মায়ার সঙ্গে বেশি না মিশিস্।

সমর—ও।

বিশু—বাবাকে একবার খুলে বল না।

সমর—বলবো তো। দু একদিনের মধ্যেই বলব। মানে একটু স্বেচ্ছাপ  
বুঝে আর কি। বাবার মেজাজ জানিস তো। বড়দার ওপর  
সেই যে ক্ষেপে গেলেন এখনও তাকে বাড়ী ফিরিয়ে আনলেন  
না। তাই ভয় করে।

বিশু—এ ছুনিয়ায় ভয় পেলে চলে না সময়। ভয়ে ভয়েই তো আমরা  
আধমরা হ'য়ে রয়েছি। সমাজের ভয়, সংসারের ভয়—  
[ বাইরে থেকে জোর গলায়, বিশু আছ নাকি ? ]

বিশ্ব—কে ?

[ নেপথ্যে—আমি রাজেন মল্লিক ]

বিশ্ব—( গভীর হয়ে ) আহ্নন ।

মায়া—আমি বরং সরোদির কাছে যাই । ( সময়কে ) সময়দা ঐ কথা  
রইল । [ বাড়ীর ভিতরে মায়ার প্রস্থান । ]

সময়—কি ব্যাপার বিশ্ব, হঠাৎ রাজেনবাবু ?

বিশ্ব—বুঝতে পারছি না, নিশ্চয় কোন মতলব আছে ।

[ রাজেন মল্লিক ঢোকেন । কালো রং । বেশ মোটা । কাঁচা  
পাকা চুল । প্যান্ট সার্ট পরা । হাতে একটা এনামেলের পানের  
ভিবে । মুখে পান । ]

বিশ্ব—আহ্নন, আহ্নন রাজেন বাবু । আজ আমার কি সৌভাগ্য,  
আপনি নিজে এলেন—

রাজেন—হাঃ হাঃ, কেন, আমার বুকি আসতে নেই । এই পথ দিয়েই  
যাচ্ছিলাম, ভাবলাম একবার দেখা করে যাই । তুমি তো  
আর আসবে না—

বিশ্ব—এই কাজেকর্মে ব্যস্ত ছিলাম, তাই আর সময় করে উঠতে  
পারি নি । দাঁড়িয়ে রইলেন কেন বহ্নন—

রাজেন—তারপর সময় । তুমি ভালো তো ? আজ তোমার বাবার  
সঙ্গে বাজারে দেখা হ'ল ।

সময়—এই কেটে যাচ্ছে আর কি, ওহো আমাকেও তো একবার  
বাজারে যেতে হবে । একেবারে ভুলে গিয়েছিলাম,  
ভাগ্যিস মনে করিয়ে দিলেন । আসিবে বিশ্ব, চলি রাজেন,  
বাবু ।

[ সময় চলে যায় ]



রাজেন—ক’দিন থেকেই তোমায় একটা কথা বলব বলব ভাবছি।

বিশ্ব—কি কথা বলুন না—

রাজেন—তুমি আবার আমার গ্যারেজে ফিরে এস।

বিশ্ব—আবার গ্যারেজে ফিরে যাবো।

রাজেন—তুমি যা যা ইনক্রিমেন্ট চেয়েছিলে আমি সব দেবো।

বিশ্ব—বড় লেটে আপনার বুদ্ধিটা খুলল রাজেনবাবু।

রাজেন—যা হবার তাতো হয়ে গেছে।

বিশ্ব—আমিও তাই বলছি। যা হবার তা হ’য়ে গেছে। এখন আর আমি ফিরে যেতে পারি না। মাত্র, পঁচিশ টাকা মাইনে বাড়াতে চেয়েছিলাম—আপনি শুনলেন না, আপনার গ্যারেজের জন্তে তখন আশ্রাণ খেটেছি। রাত নেই, দিন নেই যখন বলেছেন ছুটে গেছি। যতদিন আপনার গ্যারেজ ভালভাবে চলতে না পেরেছে ততদিন একটা টাকাও বাড়াবার অহুরোধ করিনি। কিন্তু আশ্চর্য লোক আপনি। যখন গ্যারেজ দাঁড়িয়ে গেল, গাড়ীর পর গাড়ী আসতে লাগল তখন আমাদের দিকে একবার ফিরেও তাকালেন না। ভাবলেন সব আপনার কপাল জোর। এখন ঠেলা সামলান।

রাজেন—আহা! আমার স্ববিধে অস্ববিধেটাও তো দেখবে না কি? সেই সময় বাড়ীতে এমন কতগুলো অস্বস্থ বিস্বস্থ পড়ে গেল যে কোন দিকেই মন দিতে পারলাম না। যাক্গে ওসব কথা ভুলে যাও। আমি তো রয়েছি, যা তোমাদের ক্ষতি হয়েছে তা সব পূরন করব।

বিশ্ব—ক্ষতি তো আমাদের হয়নি—আমাদের হয়েছে লাভ। এতদিন চাকরির নেশায় সব মশগুল হয়েছিলাম, নিজের পায়ে

দাঁড়াবার আনন্দ বুঝতে পারিনি। এখন আমরা তারই স্বাদ পেয়েছি। আমরা আর চাকরি করবো না।

রাজেন—সে কথা না হয় তোমার বেলা খাটে, তুমি না হয় মালিক হয়েছো। কিন্তু সতু, ভোলা ওরা, ওরা তো তোমার চাকর?

বিশ্ব—একথাটা একবার তাদেরই জিগ্যেস করে দেখবেন, আমাদের ছোট গ্যারেজ—আপনার কাছে তারা যত মাইনে পেত অনেক সময়ে হয়তো তার চেয়ে কম টাকা পায়। তাতে তাদের দুঃখ নেই। কারণ এখানে এমন একটা জিনিস তারা পেয়েছে যা আপনার কাছে কোনদিন তারা পায়নি।

রাজেন—কি, কি সেটা? ওভারটাইম?

বিশ্ব—টাকা দিয়ে তা পাওয়া যায় না।

রাজেন—তার মানে?

বিশ্ব—ব্যবহার, মানুষের সঙ্গে মানুষের ব্যবহার। আপনি যখন ব্যঙ্গ করে আমাদের শুনিয়ে বলতেন, খোদা যব দেতা ছাপ্পর ফোড়কে দেতা। তখনই ভাবতাম, কতটা অন্ধ আপনি, এখন বুঝেছেন তো টাকা খোদা দেয় না, দেয় এই ছুটো হাত।

রাজেন—তার মানে আমার প্রস্তাবে তোমরা রাজি নও।

বিশ্ব—না।

রাজেন—তোমার কথাই কি শেষ কথা? সতু, ভোলা ওদেরও ঐ একই বক্তব্য?

বিশ্ব—ইচ্ছে করে, তাদের জিগ্যেস করতে পারেন। জানেন তো নেড়া একবারই বেলতলায় যায়। (একটু থেমে) বাঙ্গালীর-

ব্যবসা আজ ডুবতে বসেছে, সে শুধু আপনাদের মত  
লোকের জন্তে।

রাজেন—থাক, তোমার কাছে আমি নীতিকথা শুনতে আসিনি।  
আমার কথা যখন শুনবে না, ভালই, দেখা যাবে। রাজেন  
মল্লিকের গ্যারেজ টিকে থাকে, না বিত্ত মিত্তরী কারখানা।

বিত্ত—মিত্তরী মরতে পারে না, মরবে বাবুরা। যারা গদীতে বসে  
মিত্তরী খাটায়।

রাজেন—পরে এর জন্তে তোমায় অহুতাপ করতে হবে। রাজেন  
মল্লিক কোনদিন পেছু হাঁটে না। সব পথ আমার জানা  
আছে। [প্রস্থান]

[বিত্ত গুম হয়ে বসে থাকে। ভেতর থেকে সরষুর প্রবেশ]

সরষু—এটা কি ঠিক হ'ল?

বিত্ত—কি?

সরষু—এ ভাবে রাজেনবাবুর সঙ্গে ঝগড়া করা?

বিত্ত—তোমরা আমাকে ভেবেছ কি? সব বিষয়ে উপদেশ দেবে?

সরষু—রাজেন মল্লিক সোজা লোক নয়। ও একটা সাপ।

বিত্ত—আমি নেউল।

সরষু—মাঝে মাঝে তুই এমন গোয়াতুঁমি করিস, কারুর কথা শুনতে  
পর্যন্ত চাস না।

বিত্ত—পাঁচশো জনের কথা শুনে কি লাভ? দুটো হাত গজাবে?

সরষু—সেকথা নয়—আমরা তোর ভালর জন্তেই বলি। মিছিমিছি  
শত্রু বাড়িয়ে কি দরকার। সবে তোর গ্যারেজ চালু  
হ'য়েছে। এখন যদি কোন বিপদ আসে সামলাবি  
কি করে?

বিশ্ব—যে রকম করে গ্যারেজ স্ক্রু করেছি, বিপদ এলে ঠিক তেমনি করেই সামলাবো। তখন তো তোমরা ঝুড়ি ঝুড়ি উপদেশ দিয়েছিলে, গ্যারেজ করিস না, রোজগার হবে না। খেতে পাবি না। লোকে মিস্ত্রী বলে একঘরে করবে আরও কত কি—

সরষু—একঘরে তো করেইছে।

বিশ্ব—কোন শালা একঘরে করেছে? ট্যাকে পয়সা থাকলেই হলো। সব লেউ লেউ করে আসবে। তোমাদের সমাজের মাথায় আমি ঝাড় মারি।

সরষু—তা তুমি মারতে পারো—কারণ একঘরে তো আর তোমায় করেনি, করেছে আমাদের।

বিশ্ব—তোমাদের!

সরষু—তা না হ'লে তোমাদের অজিতদা এত বিরক্ত হয়েছেন কেন, যে বাড়ীতে যাই সেখানেই ঐ এক কথা—তোমার ভাইয়ের বুঝি লেখাপড়া হ'লো না? মিস্ত্রী হ'য়েছে?

বিশ্ব—আমার লেখাপড়া হ'লো না তো তাদের বাপের কি?

সরষু—সমাজে বাস করতে গেলে অত চোখ রাঙ্গিয়ে চলে না বিশ্ব। বিয়ে খাতো করবে, সংসার তো পাতবে। মেয়ে দেবে কে তোমায়? কত জায়গায় সম্বন্ধ করেছি কেউ রাজি হয়নি। ভাল ঘরের মেয়ে এখন পাওয়া দায়।

বিশ্ব—কেন আজ সকালেই তো এক নামজাদা বংশের—

সরষু—থাক ও কথা আর তুলোনা। তোমার অজিতদা কত বুঝিয়ে ওঁকে এনেছিলেন, তার সঙ্গে তুমি যা ব্যবহার করলে এখন আমাদেরই ওদের বাড়ীতে ঢুকতে দিলে হয়! (একটু

থেমে) অবশ্য এত কথা বলে লাভই বা কি? আমাদের  
অসুবিধে হলে তোমার কি এসে যায়।

বিশু—এতো বোকার মত কথা বগছ। তোমাদের অসুবিধে অসুবিধে  
আমি দেখিনা?

সরযু—যদি দেখতে তাহলে বুঝতে পারতে না আজকাল কত কম  
আমি এ বাড়ীতে আনি? একদিনও তা নিয়ে জিগোস  
করেছ? একদিনও আমাদের বাড়ীতে গিয়ে খবর  
নিয়েছো?

বিশু—তোমাদের বাড়ী যাই না, সে তো তোমার খবরের জন্তে, বুড়ো  
এত বকর বকর করে। রাজ্যের অবাস্তর কথা। আমি অত  
জবাব দিতে পারি না।

সরযু—গুরুজনদের বিষয়ে ও ধরনের কথা আমি শুনতে চাই না। এটাও  
কি তোমার চোখে পড়ে না যে আজকাল খোকা আমার সঙ্গে  
এখানে আসে না?

বিশু—চোখে পড়বে না কেন? সে তো তুমি বল ওর ঠাকুমা ওকে  
ছেড়ে থাকতে পারে না তাই—

সরযু—বাবাকে তা ছাড়া আব কি বলব?

বিশু—তার মানে?

সরযু—গুঁড়। চাননা গুঁড়ের নাতি এই বস্তীর মধ্যে এসে থাকে, এখানে  
এলে ওর পড়াশুনো নাকি হবে না—মামাদের দেখে শেষে  
একটা—

বিশু—অমায়ুষ হবে এই তো? (থেমে) এ সবই কি আমি মিজী বলে?

সরযু—শুধু তাই নয়, সাবিজীর ব্যাপার নিয়েও—

বিশু—এর মধ্যে আবার সাবিকে টানছ কেন?

সরযু—আমি টানবো কেন। তুমি না হয় কানে তুলো দিয়ে থাকতে পারো, লোকে তো বলতে ছাড়বে না। তাকে নিয়ে এত মাতামাতি করবার দরকার কি ছিল ?

বিশু—কি বলছ যা তা ? কে যে এসব রটায়—

সরযু—কে আবার, পাড়ার সবাই। সতু আর সতুর বোয়ের মধ্যে যে ঝগড়াঝাটি শুরু হয়েছে তা কিসের জন্তে ?

বিশু—সে ওদের ঘরের ব্যাপার। আমি তার কি জানি সতুটা বুঝি আজকাল আবার মদের মাত্রাটা একটু বাড়িয়েছে। তাই নিয়ে ওর বৌ—

সরযু—মদ সে একা খায় না।

বিশু—আমিও খাই, কিন্তু সব সময় আমার মাত্রাজ্ঞান থাকে।

সরযু—কি জানি। তবে এইটুকু জেনে রেখ, যাদের তুমি বন্ধু বলে মনে কর তারাই বলে বেড়ায়, তোমার জন্তেই সতুদের মধ্যে ঝগড়া।

বিশু—আমার জন্তে ?

সরযু—এ সব কথা বলে আর কি হবে, কোন কথাই তো তুমি গ্রাহ্য করো না।

[ সরযু বাড়ীর ভেতর চলে যায়। বিশু বসে থাকে। মায়ার প্রবেশ। ]

মায়া—আজ বুঝি কোন কাজ খুঁজে পাচ্ছেন না বিশুদা ? সকাল থেকে বাড়ীতে বসে আছেন ?

বিশু—হঁ।

মায়া—আমার দিবিয় রইল কিন্তু। দিনেমার টিকিটের কথা কাউকে বলে দেবেন না।

বিশ্ব—(অন্তমন্ব) কি ? ও সিনেমার টিকিট—না, না আমার  
দরকার কি ।

মায়া—এত কি ভাবছেন শুনি ?

বিশ্ব—না, কিছু না ।

মায়া—আমি যাই বাড়ীর কাজকর্ম সকাল থেকে কিছু দেখিনি ।

বিশ্ব—মায়া শোন ।

মায়া—কি বলছেন ?

বিশ্ব—ঐ সাবিজীদার কথা জিগ্যেস করছিলাম । ওরা—

মায়া—সেই একই রকম । সতুদা কাল রাত্রেও বাড়ী ফেরেনি ।

বিশ্ব—অঃ ।

মায়া—সতুদাকে নিয়ে সত্যি ভাবনার কথা । সকালের মাহুঘের সঙ্গে  
রাত্রের মাহুঘের যেন আকাশ পাতাল তফাৎ । কেন যে এত  
মদ খান ।

বিশ্ব—সাবিজীর সঙ্গে কাল দেখা হয়েছিল ?

মায়া—হ’য়েছিল সন্ধ্যার পর, আমি আর সময়দা ফিরছিলাম, রাস্তায়  
দেখা ।

বিশ্ব—একা ?

মায়া—হ্যাঁ ।

বিশ্ব—কোথায় যাচ্ছিল ?

মায়া—বল্লে কাজ আছে । (থেমে) বিশ্বদা সাবিজীরও চালচলনটা  
ভালো নয় । সকলেই বলে, ওর জন্তেই সতুদা নাকি মদ  
খরেছে ।

বিশ্ব—(চিন্তিত) সাবিজীকে একবার বলিস আমার সঙ্গে যেন  
দেখা করে ।

মায়া—বল্‌ব ।

[ বাইরে চাঁচামেচি, গোলমাল শোনা যাচ্ছে । ]

বিশ্ব—কি হলো ?

মায়া—নিশ্চয়ই ঐ জলের কল নিয়ে, ঐ একটা তো খাবার জলের কল । বস্তীর এতগুলো লোক । কদিন থেকে শুনছি দুটো টিউবকল বসবে ।

[ একরকম ছুটে জগদীশের প্রবেশ । ১৯২০ বছরের ছেলে । ]

জগদীশ—বিশ্বদা আপনি একবার শিষি আহ্নান ।

বিশ্ব—কেন ? কি হয়েছে জগদীশ ?

জগদীশ—সতুদা বোধহয় বোঁটাকে মেরে ফেলে । একেবারে বেহঁস মাতাল । কারুর কথা শুনছে না । যাতা গালাগালি করছে ।

[ কথা শুনতে শুনতে বিশ্ব কোমরে কাপড়টা জড়িয়ে নেয় । ]

বিশ্ব—চল, হতভাগাটাকে আজ একটু শিক্ষা দিতে হবে ।

[ বিশ্ব ও জগদীশের প্রস্থান । বাইরের গোলমাল ক্রমশঃ এগিয়ে আসছে । সরমু বাস্তভাবে বেরিয়ে আসে । ]

সরমু—কি হয়েছে রে ?

মায়া—কি আর হবে দিদি—সতুদা বুঝি বৌকে মার ধোর করছে, তাই বিশ্বদাকে ডেকে নিয়ে গেল ।

সরমু—সর্বনাশ ! বিশ্ব যা গৌয়ার গোবিন্দ, একটা কাণ্ড না বাঁধিয়ে বসে ।

[ গোলমাল একেবারে দরজার কাছে । দু'জনে ভয়ে ভয়ে তাকিয়ে আছে । সতুর কলার ধরে ঠেলতে ঠেলতে বিশ্ব ঢোকে, পিছনে বেশ কয়েকজন সাক্ষী পাঙ্গা । ]

সতু—( মন্ত অবস্থায় ) আমায় ছেড়ে দে বিশ্ব, ভাল হবে না বলছি ।



বিশ্ব—অনেকদিন তোমায় সাবধান করেছি। আজ তোমারই একদিন  
কি আমারই একদিন। এখানে থাকতে গেলে তোমায়  
ভদ্রলোকের মত থাকতে হবে।

সতু—যা, যা, বেশী ফুটানি করিস না।

বিশ্ব—মাতলামি করতে হবে না। সকলের সামনে নাকে খৎ দে।  
বল, আর এরকম করবি না।

সতু—কি করব না? বৌকে মারব না? • আমার বৌকে আমি  
মারবো। একশ বার মারবো। তোর বাপের কিরে?

বিশ্ব—হতভাগা বাদর।

[এক ঘা মারতেই সতু হুমড়ি খেয়ে পড়ে যায়। সকলের  
চোঁচামেচি। ইতিমধ্যে খুড়ো হরিপদ বেরিয়ে পড়েছে বাড়ীর মধ্যে  
থেকে।]

খুড়ো—তোরা হাঁ করে দেখছিল কি? যা, সতুকে বাড়ীতে নিয়ে যা।  
সাবিত্রী ঘরে আছে তো? বলিস যেন একটু যত্নাভি  
করে।

বিশ্ব—যত্নাভি করবে, তাকে আস্ত রেখেছে কিনা।

খুড়ো—আহা সেইভাত্ত তো আরো করবে। নিজে ব্যথা না পেলে কি  
আর পরের যত্নাণা বোকা যায়।

[সতুকে নিয়ে দু'তিন জন চলে যায়। সবাই নিজেদের মধ্যে  
গজগজ করছে। একমাত্র খুড়োই কথা বলে যায়।]

খুড়ো—ছুটির দিনে একটু গুণগোল হৈ হৈ না হ'লে ভাল লাগে না।  
কি বল হরিপদ?

হরিপদ—সতুটার বেশী লাগেনি তো? দেখো আবার পুলিশ টুলিসের  
হাঙ্গামা না হয়।

জগদীশ—না। বিশ্বদা তো বেশী জোরে যারে নি। ভয় পাইয়ে দিয়েছে।

হরিপদ—নেশা ছুটলেই গা' হাত পায়ে বেশ ব্যথা হবে। মারামারি কি আমরা করিনি, খুব করেছি। তবে দেশীদের সঙ্গে নয়, একেবারে লালমুখে গোরাপণ্টন, তখনকার দিনের কি হোংকা লাস—তাদের ধরে ঠেঙিয়েছি। বললে তোমরা বিশ্বাস করবে না, দু-দুটো গোরা আর আমরা মাত্র দশজন বাকালী, এমন মার মারলাম, দড়াদম দড়াদম, উ-ছ-ছ পাটায় আবার লেগে গেল। এই বাতের ব্যথাটা—(বসে পড়ে)

[ দেবব্রত হস্তদস্ত হয়ে ঢোকে ]

দেবব্রত—দেখ বিশ্ব, আমি তোমায় কতদিন থেকে বলছি ও দুটোকে তাড়াও। যেমনি সতু তেমনি তার বোঁ। ওদের জীবনটা তো গেছে আরো পাঁচটা ছেলের মাথা খাচ্ছে।

বিশ্ব—ওসব কথা এখন থাক দেবুকাঁকা—পরে ভাবা যাবে।

দেবব্রত—এ বস্ত্রীটা তো এরকম ছিল না। চেঁচামেচি হৈ হৈ হট্টগোল কোনদিন শুনিনি। এ পাড়ায় তো আজ থেকে নেই। চুল পাকলো এইখানে।

খুড়ো—সেদিক দিয়ে আমার কত স্রবিধে দেবু ভাই। বেশী চুল নেই তা আর পাকবে কি করে।

দেবব্রত—তোমার তো সবতাতেই রসিকতা। একটা জিনিসও সিরিয়াসলি ভাববে না। [ হঠাৎ সময়ের ওপর চোখ পড়ায় এবং দূরে মায়াকে দেখে ] তোকে না বাজার যেতে বললাম, এখানে কোথেকে এলি ?

সময়—( কান চুলকে ) এই গোলমাল শুনে ভাবলাম কি হ'লো।

দেবব্রত—যাও, যাও আর দেরী করোনা। ছুটির দিন এত বেলায় কি  
আর ভাল মাছ পাবে ?

সমর—( বাস্তবাবে ) এই আমি যাচ্ছি ( প্রস্থান )।

দেবব্রত—আজকালকার ছেলেরা যা হ'য়েছে। একটা কাজ করতে  
দিলে সাতবার তাকে মনে করিয়ে দিতে হয়।

খুড়ো—সে তো অনেক কম হ'লো।

দেবব্রত—তার মানে ?

খুড়ো—বুড়োদের বাজার করতে দিলে তো আরও মুশ্কিল। তাও  
আমি বুড়ো নই বরং প্রৌঢ়ই বলতে পারো। আমার মেয়ে  
যা আনতে বলে ঠিক তার উল্টোটী নিয়ে আসি। আর  
সাতবার কেন সাতাশবার মনে করিয়ে দিলেও কিছুতেই  
মনে পড়ে না, কৈ মাছ বলেছিল না কই মাছ।

দেবব্রত—না হরিপদদা এ খুড়োকে নিয়ে আর পারা যায় না। আমি  
যা বলবো ও ঠিক তার উল্টো বলবে।

[ তিনজন খাটিয়ার কাছে কথা বলে। ভোলাকে ডেকে বিত্ত  
জিজ্ঞেস করে। ]

বিত্ত—তুই এতক্ষণ সতুর কাছে ছিলি ?

ভোলা—ই্যা, সতুদা ভালোই আছে। সাবিত্রীদি ওকে শুইয়ে দিয়েছে।

[ এক ভদ্রলোককে নিয়ে সমরের পুনঃপ্রবেশ। খুড়োকে দেখিয়ে ]

সমর—ওই ওঁনার নাম অমুকুল সোম।

দেবব্রত—আবার তুই এসেছিস ?

সমর—এই ভদ্রলোক অনেকক্ষণ থেকে নাকি খুড়োকে খুঁজছেন।

তাই নিয়ে এলাম।

ভদ্রলোক—আপনার নাম অমুকুল সোম ?

খুড়ো—আজ্ঞে ইয়া।

ভদ্রলোক—পিতার নাম ?

খুড়ো—স্বর্গীয় মহেন্দ্র লাল সোম।

ভদ্রলোক—আদি নিবাস ?

খুড়ো—কুমার ডিহি, বর্ধমান।

ভদ্রলোক—কলকাতায় কতদিন আছেন ?

খুড়ো—পাঁচ বছর থেকে।

ভদ্রলোক—এই বস্তীতে ?

খুড়ো—তা বছর পনেরো। কি বল হরিপদ ?

হরিপদ—নিশ্চয়ই।

ভদ্রলোক—আশ্চর্য কতলোককে জিগ্যেস করলাম কেউই আপনার  
নাম জানে না!

দেবব্রত—কি করে জানবে, ওর নাম ধরে তো কেউ ডাকে না। খুড়ো  
বল্লৈ সবাই দেখিয়ে দিত।

ভদ্রলোক—অনন্তবালা দাসীকে আপনি চেনেন ?

খুড়ো—সম্পর্কে আমার পিসীমা হন।

ভদ্রলোক—কোথায় থাকতেন ?

খুড়ো—কাশীতে।

ভদ্রলোক—সম্প্রতি তিনি মারা গেছেন।

খুড়ো—অ! আমাকে কি অশৌচ করতে হবে ?

ভদ্রলোক—না প্রাদ্র শাস্তি হ'য়ে গেছে।

খুড়ো—তবে।

ভদ্রলোক—তিনি একটা উইল করে গেছেন। আমি সেই উইলের  
একজিকিউটর।

অনেকে—উইল !

দেবব্রত—কি ব্যাপার একটু খুলে বলুন ?

ভদ্রলোক—স্বর্গীয় অনন্তবাল। দাসী তার স্বাবর অস্বাবর সব সম্পত্তি দিয়ে গেছেন রামকৃষ্ণ মিশনে। তবে তার মধ্যে থেকে নগদ সাত হাজার টাকা তিনি আলাদা করে রেখে গেছেন। উইলের নির্দেশ এই যে, তার ভাইপো অল্পকুল চন্দ্র সোম জীবিত থাকলে এই টাকা পাবেন। আর তিনি না থাকলে সেই টাকা পাবেন অনন্তবাল। দাসীর দুই ছ'সম্পর্কের নাতি। অল্পকুল সোমের দুই ভাইপো পঞ্চানন সোম ও নিত্যানন্দ সোম।

দেবব্রত—থাকগে থাকগে সে কথা ছেড়ে দিন। খুড়ো যখন জীবিত আছে তখন টাকাটা ঐ পাবে তো ?

ভদ্রলোক—সেই কথাইতো বলতে এসেছি। অল্পকুলবাবু কাল একবার আপনি আমার সঙ্গে দেখা করবেন। এই আমার ঠিকানা ( কার্ড দিয়ে ) কাগজপত্র যা সই করবার তা বুঝিয়ে দেবো।

খুড়ো—অস্ত্রাপিসী আমাকে টাক। দিয়ে গেল !

দেবব্রত—কি বলছ খুড়ো ?

খুড়ো—আশ্চর্য দুনিয়াতে ভাই। কখনও পিসীর একটা খোঁজ পর্যন্ত নিলাম না।

ভদ্রলোক—সেই জগ্গেই তো আপনাকে দিয়েছেন। আপনার দুই ভাইপো, ঐ পঞ্চানন আর নিত্যানন্দ, আরে মশায় সে ছুটি চীজ। ছিনে জোঁকের মত দিদিমার পেছনে লেগে থাকত। হরদম নিজেদের মধ্যে ঝগড়া। তিতিবিরক্ত হয়ে নগদ টাকাটা আপনাকেই দিয়ে গেছেন।

দেবব্রত—না খুড়ো তোমার পিসী বিচক্ষণ লোক। (খুড়োর হাত থেকে কার্ডটা টেনে নিয়ে) এটা আমার কাছে রাখো। কাল তোমায় নিয়ে আবার যেতে হবে তো। অফিসটা আর যাওয়া হবে না। এ এমনি আপনভোলা লোক আপনাকে আর কি বলব।

ভদ্রলোক—আমি তাহ'লে আজ আসি।

খুড়ো—আম্বন। কাল আমি দেখা করবো।

দেবব্রত—আমরা সকলেই দেখা করবো। চলুন চলুন এগিয়ে দিয়ে আসি। [ভদ্রলোককে নিয়ে দেবব্রতের প্রস্থান]

বিশু—আজ তা হ'লে' আমরা সেনিট্রেট করবো। সময় তুই যখন বাজার যাচ্ছিস বেশ খানিকটা মাংস নিয়ে আয়। মায়া কোমর বাঁধ। মেয়েগুলোকে সব ডাক। আজ খুড়ো খাওয়াচ্ছে।

জগদীশ—খুড়োর বাড়ী নেমন্তন্ন সহজ কথা নয়রে ভাই,

সহজ কথা নয়।

মাংস পোলাও, হালুয়া খাবো, জয় খুড়োর জয়।

বল সব, জয় খুড়োর জয়।

সকলে—বল সব জয় খুড়োর জয়।

[ছেলেদের হৈ হৈ, টিন বাজান মেয়েদের হাসি। ছড়া কাটার স্বরে জগদীশের সঙ্গে অনেকেই নাচ গান করে। যখন বেশ জমে উঠেছে, জগদীশ গান থামিয়ে বলে।]

জগদীশ—কিন্তু খুড়ো, তুমি তো বল টাকা মাটি, মাটি টাকা। এবার দাও সাত হাজার টাকা। মাটিতে ফেলে ছুরমুস করে দি।

[সকলের হাসি। খুড়ো অগ্নমনস্ক ভাবে পায়চারী করে]

খুড়ো—তাইতো এতগুলো টাকা, পিসি শেষকালে—

হরিপদ—তা এত ভাবছ কি, এবার একটু গুছিয়ে বস । সংসার কর ।

দেবু—আহা মায়ার একটা বিয়ে দাও ।

সরযু—হাঁ, খুড়ো মায়ার একটা ভালো বিয়ে দিন ।

সকলে—হাঁ হাঁ মায়ার বিয়ে হবে, মায়ার বিয়ে ।

[ জগদীশ ও অন্ন ছেলেরা, জয় খুড়োর জয়, বল সব জয় খুড়োর জয়, বলে আবার হৈ হৈ আনন্দ করে । ধীরে ধীরে পর্দা নেমে আসে । ]

যবনিকা

## দ্বিতীয় অঙ্ক

[ আগের দৃশ্যের অনুরূপ। দিন কয়েক পরের ঘটনা। পর্দা উঠলে দেখা যাবে, কারখানার কাজ তখনও চলছে। দু'একজন মিস্ত্রী জামা বদলাচ্ছে। পাঁচটা বেজে গেছে। ]

জগদীশ—সতুদাটা যেন কি? এত রাগারাগি করার কিছু ছিল না বাবা। বিপদা একটু মাথাগরম লোক সবাইতো জানে।

সতীন—অতগুলো গোকের সামনে ঐভাবে অপমান করা, মনে তো লাগবেই।

জগদীশ—তা ওরই বা দিনরাত বোঁটাকে মারধোর করবার কি দরকার। আমি নিজের কানে শুনেছি, বিপদা ওকে কতদিন বারণ করেছে।

সতীন—আমি বলে দিছি সতুদা কিন্তু আর আসবে না।

জগদীশ—কি করবে?

সতীন—কেন রাজেন মল্লিক রোজ তো ওর কাছে লোক পাঠাচ্ছে। বাবা সতুদাকে যদি ভাঙ্কিয়ে নিয়ে যেতে পারে তা হ'লে এ গ্যারেজ কানা হ'য়ে যাবে। ওর মত ইলেক্ট্রিকের কাজ কটা লোক জানে এ তল্লাটে।

ভোলা—যা যা সতুদা ওরকম বেইমানী করবে না। হাজার হোক সতুদার জন্তেই তো বিপদা রাজেন মল্লিকের গ্যারেজ ছেড়ে এখানে কারখানা করেছে। সে কথা ভুলে গেলে তো চলবে না।



সতীন—রাজেন মল্লিক নিজেই তো ভুলিয়ে দেবে। আমাকেও তো  
ডেকে পাঠিয়েছিল।

জগদীশ—তাই নাকি। কি বললে ?

সতীন—ঐ জিজ্ঞেস করলে এখানে কি পাচ্ছি, কতক্ষণ কাজ হয় এই  
সব আর কি।

জগদীশ—তুই কিছু বলিসনি তো।

সতীন—আমি কেন বলতে যাব, তবে যাই বল, রাজেন মল্লিক লোক  
ভাল, চা মিষ্টি খাওয়ালে।

ভোলা—তুমি তাহলে সব কথাই ওকে বলেছো।

সতীন—আমি না, না, আমি কিছু বলিনি।

ভোলা—বলনি আবার। তোমাকে আমার চিনতে বাকি নেই।  
নাবধান করে দিচ্ছি সতীন, খবরদার রাজেন মল্লিকের  
লোকদের সঙ্গে মেলামেশা করবি না। আমি চলিয়ে  
জগদীশ। [প্রস্থান]

সতীন—ভোলাটা যেন কি, সব সময় মেজাজ রুক্ষ, আচ্ছা তুমিই  
বলতো, আমার বাড়ীতে যদি কোন গুণগোল হয় তাতে  
বিশুদা মাথা গলাতে আসবে কেন ?

জগদীশ—তোমার সেই এক কথা। যাযা ওসব নিয়ে মাথা ঘামাতে  
হবে না। তুই নতুন এসেছিন, পরে বুঝবি। বিশুদা লোক  
ভাল।

সতীন—কি জানি বাবা। বড় মুখ আলগা।

[ বাড়ীর ভেতর থেকে হরিপদ প্রবেশ। ]

হরিপদ—জগদীশ নাকি।

জগদীশ—আজ্ঞে ই্যা।

হরিপদ—তোমাদের কাজকর্ম কি রকম চলছে। ঠং ঠং, ঠক্ ঠক্  
শব্দের জ্বালায় তো বাবা চোখের পাতাটি বুজতে দাও না।  
বলি সেই মত আমদানীটা হচ্ছে তো?

জগদীশ—আজ্ঞে কাজ ভালই চলছে। কত নতুন Customer  
আসছে।

সতীন—কিন্তু স্তার Electricএর কাজ সব বন্ধ পড়ে আছে।

হরিপদ—কেন, মাল পাওয়া যাচ্ছে না বুঝি? আর পাওয়া যাবেই  
বা কোথা থেকে। চাল ভালই ছুশ্রাপ্য তা আবার  
electrical goods ফুঃ।

জগদীশ—আজ্ঞে না। ঐ সতুদা আসছে না তো। তাই আর কি।

হরিপদ—অঃ! সতু আর আসছে না বুঝি—তাহ'লে তো মুশ্বিল  
বোস সাহেবের গাড়ী বোধ হয় এখনও সারানো হয় নি।

সতীন—কি করে হবে, ওতো সতুদার হাতেব কাজ।

জগদীশ—ও নিয়ে ভাববেন না। আমরা তো আর বসে নেই, অস্ত  
মিস্ত্রিরও চেষ্টা হচ্ছে (ব্যস্তভাবে) যাও যাও আর দেরী  
ক'রো না।

সতীন—হা আমি যাই। আসি স্তার। [প্রস্থান]

হরিপদ—এতো নতুন লোক, কি যেন নাম বললে।

জগদীশ—সতীন, খুব সুবিধের লোক নয়। সব তাতেই যেন  
পাকামি।

হরিপদ—আমার দেখেই মনে হ'য়েছে পাকা কিছুট। আজকালকার  
ছোড়াগুলোকে দেখলেই আমার গা জ্বালা করে, অবশ্য  
তোমরা কজন বাদে। শুধু চড়ং বড়ং আর কাজের বেলা  
লবজকা। এই সতুটাকেই দেখনা, গলা টিপলে দুধ বেরোয়,

এরই মধ্যে গোল্লায় গেল। তা কি বুঝছো—কাজকর্ম করবে না, না?

জগদীশ—খোলাখুলি তো কিছু কথা হয় নি।

হরি—ছ্যা ছ্যা বংশের মুখ ডোবালো। বিত্তবাবুর বন্ধু কিছু বলবার যো নেই। দেখো তুমি আবার ওদের কাউকে বলে বসনা যেন।

[ব্যস্তভাবে দেবব্রতের প্রবেশ—পোষাক দেখে বোঝা যায়, সোজা অফিস থেকে আসছেন। জগদীশ জিনিসপত্র গুছিয়ে নিয়ে একসময় বেরিয়ে যায়।]

দেবব্রত—সব ব্যবস্থা করে ফেললাম। বাব্বা আর ভাবনা নেই।

হরিপদ—তোমার কথা তো অর্ধেক বোঝাই যায় না। কিসের ব্যবস্থা তাই বল?

দেবু—কিসের আবার, বিয়ের।

হরি—বিয়ের? কার বিয়ে, তুমি আবার তৃতীয় পক্ষে বিয়ে করছো নাকি?

দেবু—তোমার ভীষ্মরতি ধরেছে দেখছি। আহা আমার সময়ের সঙ্গে মায়ার।

হরি—তাই নাকি এতে! খুব ভাল কথা। আমি তো কতবারই ভেবেছি কিন্তু বলিনি কারণ মনে হত তুমি বোধ হয় খুড়োকে তেমন পছন্দ কর না।

দেবু—আহা সে সব পুরোন কথা আবার কেন, ভেবে দেখলাম মায়ী মেয়েটা সত্যিই ভালো। লেখাপড়াও শিখেছে, বেশ ভক্তিশ্রদ্ধাও আছে। তাছাড়া আজকালকার ব্যাপার বুঝছো তো? মানে আমার ছেলেটা আবার ঐদিকে একটু ঝুঁকেচে কিনা।

হরিপদ—যাক তোমার নজরে পড়েছে তাহ'লে। আমি তো বলবো বলবো ভেবেও বলিনি। শেষে ভূমি হয়তো রাগারাগি করতে, ওরা আফিং খেতো। কি দরকার বাবা।

দেবু—আমি একরকম মনস্থির করেই ফেলেছি। সামনের মাসেই শুভ লগ্ন দেখে বিয়ে দিয়ে দেবো।

হরি—তা ভালোই করুছো। শুভশ্রু শীঘ্রম। কিন্তু খুড়োর ওদিকের ব্যাপার কি হ'ল। সেই পিসির টাকাটা?

দেবু—ব্যবস্থা করে দিয়েছি। এ নিয়ে কি কম ঘুরতে হ'লো। কথায় বলে বাঘে ছুঁলে আঠারো ঘা। আরে বাবা এ হ'ল বাঘের বাবা বাঘ। উকিল এ্যাটর্নী, যে সে কথা। যা হোক মনে হয় খুড়ো এ সপ্তা'তেই টাকাটা পেয়ে যাবে।

হরি—তা কত হবে।

দেবু—খরচা পাতি বাদ দিয়েও ৭০০০ টাকা। কম কথা নয়—বিশেষ করে খুড়োর মত লোকের পক্ষে।

হরি—তা তো বটেই। খুড়ো কিছু ঠিক করেছে নাকি টাকা দিয়ে কি করবে।

দেবু—ওকে তো চেনো, যেমনি একগুঁয়ে তেমনি জেদী। গোঁ ধরেছে একটা পয়সাও নেবে না সব মেয়েকে দিয়ে দেবে।

হরি—তাই নাকি, ভালো ভালো। কিন্তু বিয়েতেও তো খরচা আছে।

দেবু—সে বলে ধার করবে। আমি তো আর বুঝিয়ে পারি না। দেখ তোমরা বন্ধে যদি কিছু হয়। তবে নিজের মেয়েই তো। কোন বাপের আর দিতে না ইচ্ছে করে।

হরি—তা তোমার ছেলেটির বরাত ভালই বলতে হবে। একসঙ্গে  
অতগুলো টাকা।

দেবু—তার মানে, তুমি বলছে। ঐ সামান্য কটা টাকার জন্তে—  
হরি—না না, তা বলবো কেন, তুমি যে কি বুঝতে কি বোঝ। আমি  
বলছিলাম—

দেবু—সময় কি আমার যে সে ছেলে, B. Com. পাশ। সাহেব  
কোম্পানীতে চাকরী করছে। স্বদর্শন, স্বাস্থ্যবান। এর  
মধ্যে কতগুলো সম্বন্ধ এসেছে জানো। দশ হাজার টাকা  
নগদ দিতে রাজী, টাকা দিয়ে আমার Jeopardise করতে  
চায়। ছি ছি শেষে কি ছেলে বিক্রী করবো নাকি—তার  
আগে থুথু ফেলে ডুবে মরবো না।

[ মায়ার প্রবেশ ]

দেবু—এই যে মা ভালো তো—

মায়া—( মাথা নেড়ে ) হাঁ—

দেবু—যা যা বলেছি সব করছো? মাথায় বেশ করে পেঁয়াজের রস  
মাখবে। দেখবে কি চুল হয়। আমার মাকে দেখেছি জানো  
হরিদা, মেয়ে বউ সকলের মাথায় পেঁয়াজের রস মাখাতেন।  
কি Brilliant result, তা মনে কর আমার জীবর এখনো  
মাসে অন্ততঃ একটা করে চিরুনী ভাঙে।

হরি—সাবধান দেবু। বাড়ীর মেয়েদের আর বেশী পেঁয়াজের রস  
মাখিও না। লোকসানে পড়বে। শেষে ডজন দরে চিরুনী  
কিনতে হবে।

মায়া—( হেসে ) দিদিরা আসেনি।

হরি—না এখনও তো কৈ এল না ; এতক্ষণে আসা উচিত ছিল।

দেবু—সরব্বর আজ আসবার কথা আছে নাকি ?

হরি—হ্যাঁ, আমি নিজে গিয়ে বলে এসেছি। সরব্ব আমাদের দাদা ভাইকে নিয়ে এসে অন্ততঃ এক সপ্তাহ থাকবে। অজিত অফিস থেকে এসে এখানে পৌঁছে দিয়ে যাবে।

মায়ী—বাই দিদির ঘরটা একটু গুছিয়ে রাখি।

দেবু—খুড়ো কোথায় মা ?

মায়ী—বাবা গুয়ুধ বিক্রি করতে গেছেন।

দেবু—কিরলে একবার আমার সঙ্গে দেখা করতে বলতো।

মায়ী—বলবো, তবে আমার দাদাদের হাত থেকে ছাড়া পেলে হয়।

হরি—তার মানে ?

দেবু—সে জানো না বুঝি। খুড়োর দুই ভাইপো এসে পড়েছে।  
জীবনে তারা খুড়োর খোঁজ নিলে না এখন টাকার গন্ধ পেয়েই  
ছুটে এসেছে।

হরি—তারা চায় কি ?

দেবু—কি আবার টাকা। মাহুষ এত টাকা টাকা করতেও পারে  
বটে, কিন্তু খবরদার মা; তোমাকে একটু সামলে  
চলতে হবে। বাবাকে তো চেনই। বড় নরম লোক—ফট  
করে না কিছু দিয়ে ফেলে—ও ছোঁড়া ছুটোতো কম নয়,  
একেবারে ঝাঙ্ক।

মায়ী—আমার কথা কি আর বাবা শুনবেন।

দেবু—না শুনলে শোনাতে হবে। হাজার হোক টাকাটা যখন  
তোমাকেই দেবে বলেছে, তার উপর নিশ্চয় তোমার একটা  
দাবী আছে—ওসব ভাইপো টাইপো ঝুট ঝামেলা বেশী  
কাছে ঘেঁষতে দিও না। আর যদি বেগতিক দেখ চট করে

আমার খবর দিয়ে দেবে। এখন আমার কথাই ও বা  
একটু শোনে।

[ সরষুর প্রবেশ ]

মায়া—ঐ তো দিদি এসে গেছে।

হরি—কৈ, আমার দাছভাই কই?

সরষু—খোকা আসেনি।

হরি—কেন?

সরষু—ছপুয়ে ওর ঠাকুরমার সঙ্গে বেড়াতে গেছে। এখনও  
ফেরেনি।

হরি—তুই কি একলা এলি নাকি? অজিত এলো না।

সরষু—ও বোধহয় একটু পরে আসবে। অকিস থেকে ফিরতেই আজ  
দেরী হবে। তুমি তো আবার ভাববে।

হরি—না, না, না, অজিত এলেই না হয় তিনজনে একসঙ্গে আসতিস।

সরষু—( মায়াকে আদর করে ) মায়ারানীর খবর কি? জিনিসপত্তর  
কেনা স্কক হয়েছে।

দেবু—তোমরা না এলে হবে কি করে? ও বেচারী একলা কি পারে।

সরষু—চল মায়া ভেতরে মাই। শুনি সব কতদূর কি হল?

হরিপদ—অজিতরা তাহলে—

সরষু—তুমি ব্যস্ত হয়ে না। একটু বাদেই উনি খোকনকে নিয়ে হাজির  
হবেন।

[ সরষু আর মায়ার বাড়ীর ভিতরে প্রস্থান। ]

হরি—আজকালকার ব্যাপার কিছুই বোঝবার উপায় নেই। সরষু  
একলাই চলে এলো।

দেবু—তাতে কি হয়েছে।

হরি—উহ, একটু না হয় অপেক্ষা করেই আসত। কি এমন মহাভারত  
অন্তর হয়ে যেত শুনি। আমি ভাববো? তা না হয় একটু  
ভাবভাষাই, তাতে কার কি এসে যেতো।

দেবু—তা মিথ্যা এতো ভাবছই বা কেন? অজিতরাও এসে পড়ল  
বলে, বরং বাজারে লোক পাঠাও। জামাইকে না খাইয়ে  
ছেড়ে না।

হরি—সে তো নিশ্চয়ই, দেবুভাই তুমি বরং একটু বোসো আমি সরষুর  
কাছে ভালো করে ব্যাপারটা বুঝে নিই।

দেবু—আমিও আর বসবো না। অফিসের কাপড় জামাটা ছেড়ে  
আসি।

[ হরিপদর বাড়ীর ভিতরে প্রস্থান। দেবব্রত বেরিয়ে যেতে গিয়ে  
গেটের কাছে সময়ের সঙ্গে দেখা। ]

দেবু—( বিস্ময়ে ) তুমি !

সময়—( আমতা আমতা করে ) আমি মানে অফিস থেকে এই ফিরলাম  
আর কি !

দেবু—এখনও বাড়ী যাওনি ?

সময়—এই যাব। যাচ্ছিলাম, পথে—

দেবু—হাতে ওটা কি ?

সময়—কিছু না। ওটা, একটা প্যাকেট !

দেবু—তাতো দেখতেই পাচ্ছি। কার ?

সময়—কার আবার ? আমার।

দেবু—হঁ—পিসিমার বাড়ী যেতে বলেছিলাম, গিয়েছিলে ?

সময়—সময় পেলাম কই। কালকে বরং অফিস যাবার সময়—

দেবু—কাল কেন, আজই ?



সমর—আজ আরি কখন ! সন্ধ্যা হয়ে গেলা।

দেবু—Never put off till to-morrow what can be done to day—শীগগীরি এস। হুখ-হাত ধুয়েই বেরিয়ে যাবে।

[দেবব্রত বেরিয়ে গেলে সমর যেন হাঁক ছেড়ে বাঁচে। সন্ধ্যা হয়ে আসে। মাঝাকে আসতে দেখে সমর গাড়ীর দিকে সরে যায়। মাঝা হাতে ধুনো এনে সন্ধ্যা দেয়। সমর পেছন থেকে ডাকে।]

সমর—মাঝা !

মাঝা—সমরদা, তুমি কখন এলে ?

সমর—এইতো এখুনি। কি এনেছি বল তো ?

মাঝা—কি দেখি ?

সমর—উহু আগে বল ?

মাঝা—ও বুঝেছি—চিত্রজগতের স্পেসখাল ইস্যুটা পেয়েছো।

সমর—উহু চিত্রজগৎ-টগৎ নয়।

মাঝা—তাহলে—নিশ্চয়ই চুলের ট্যাসেল এনেছো না ?

সমর—উহু তাও নয়।

মাঝা—তবে আর কি হবে ?

সমর—লাইট চান্স মাঝা—

মাঝা—তাহলে নিশ্চয় আমসত্ত্ব এনেছো, মাদ্রাজী আমসত্ত্ব।

সমর—পারলে না, ফেল। অতএব পরীক্ষায় অকৃতকার্য হওয়ার জন্য  
শ্রীযুক্ত সমর ঘোষ, কুমারী মাঝা সোমকে এই পুরস্কার  
দিলেন।

[সমর নকল গয়নার একটা বাস মাঝাকে দেয়।]

মাঝা—(সবিস্ময়ে) ওমা সমরদা। এ কি করেছে। জ্বররাম দাঁসের  
দোকান থেকে নিয়ে এসেছে তো ?

সমর—আজ ভেবেই রেখেছিলাম তোমার জন্যে একটা প্রজেক্ট নিয়ে আসবো। মাইনে পেয়েই গেলাম জমরাম দাসের দোকানে। মনে পড়ে গেল রাস্তায় যেতে যেতে এই সেট্টা দেখে তুমি কি রকম থমকে দাঁড়িয়েছিলে।

মায়ী—তোমার যদি কোন একটা কাণ্ডজ্ঞান থাকে, লোকে দেখলে কি বলবে বলতো।

সমর—কি আবার বলবে, আমি যদি আমার ভাবী স্ত্রীকে কিছু একটা উপহার দি, তাঁতে কি এসে যায়?

মায়ী—না, না, আমার ভারী লজ্জা করছে।

সমর—তার মানে তোমার পছন্দ হয়নি। বেশ দাও, কিরিয়ে দিয়ে আসি।

মায়ী—আমি বুঝি কিরিয়ে দিয়ে আসতে বলেছি? কিন্তু বিস্মদা দেখলেই যে ঠাট্টা করে।

সমর—ওঃ বিস্মর কাছেই বুঝি তোমার মত লজ্জা। আশ্চর্য, আমি বরাবর লক্ষ্য করেছি বিস্মর মত না নিয়ে তুমি কিছুই করতে চাও না।

মায়ী—অথচ বিস্মদা বলেন, আমি নাকি ওঁর একটা কথাও শুনি না।

সমর—(বিজ্ঞপ করে) তাই নাকি? বিস্মদা এই বলেছে, বিস্মদা এই করেছে, সারাক্ষণই তো আমার বিস্মর কথাই শুনতে হয়।

মায়ী—না না তুমি মিথ্যে রাগ করছো সমরদা।

[ নেপথ্যে বিস্মর গলা। ]

মায়ী—ঐ বোধ হয় বিস্মদা আসছে, please তুমি এটা নিয়ে যাও।

সমর—(রেগে) জিনিস দিয়ে কেউ কিরিয়ে নেয় না মায়ী। রাখতে হয় রেখো না হয় কেলে দিও। স্মারি.চললাম।

মায়ী—সময়টা শুনে যান।

[ সময় কথা না শুনেই চলে যায়। মায়ী চারিদিকে তাকিয়ে গাছের কাছে গিয়ে বাস্কাটা লুকিয়ে রাখে। একটু পরে বিস্ময় প্রবেশ। ]

বিস্ম—কিরে অন্ধকারে একলা দাঁড়িয়ে।

মায়ী—এই তো সন্ধ্যা দিচ্ছিলাম।

বিস্ম—কে যেন এখুনি বেরিয়ে গেল—

মায়ী—কই না তো।

বিস্ম—চোখটা আমার বোধহয় খারাপ হচ্ছে, ঠিক মনে হল সময়ের মত। অবশ্য তুই যখন না বলছিল, তাহ'লে নিশ্চয় নয়।

মায়ী—বিস্মদা, দিদি এসেছে।

বিস্ম—( খুসী হয়ে ) এসেছে, খোকাটাকে ডাকতো দেখি কি রকম ছুটু হ'য়েছে।

মায়ী—খোকা আসেনি।

বিস্ম—( চিন্তিত মুখে ) হঁ, জানতাম ওকে আসতে হবে না।

মায়ী—অজিতদা বোধ হয় একটু বাদে নিয়ে আসবে।

( বিস্ম গাড়ীর ওপরে গ্যারেজের আলো জালিয়ে দেয় )

মায়ী—বিস্মদা, সাবিজী আসবে আপনার সঙ্গে দেখা করতে—

বিস্ম—কখন ?

মায়ী—বলেছিল তো সন্ধ্যার পর।

বিস্ম—ওদের ঝগড়া ঝাঁটি সব মিটে গেছে ?

মায়ী—কি জানি, সাবিজীকে দেখে ত' বোঝবার জো নেই।

সারাক্ষণই হাসি আর রাজ্যের লোকের সঙ্গে হ্যা হ্যা করে বেড়াচ্ছে। সত্যি বলছি বিস্মদা, ও মেয়েটাকে আমি ছুচকে দেখতে পারি না।

বিশ্ব—(হেসে) বড্ড চটেছিল মনে হচ্ছে। তোমর কলেজী বুকনি  
বেশী শোনে না বুঝি।

মায়া—কি জানি আপনি যে কেন ঐ মেয়েটাকে এত support করেন।

বিশ্ব—বল না একটু চা করতে।

মায়া—কথা বলতে চাইছেন না স্পষ্ট বল্লেনই ত হয়।

বিশ্ব—(গম্ভীর স্বরে) তাই তো বলছি, নিজের চরকায় তেল দাগে  
যাও। অল্প লোকের জন্তে ভেবে ভেবে মাথাটা নাইবা  
খারাপ করলে। দিদিকে বল চা করতে—আমি ভেতরে  
যাচ্ছি।

[ মায়া বাড়ীর ভেতরে চলে যায়। বিশ্ব গাড়ীর ওপরে খুঁকে কি  
দেখে। হরিপদ বাবু চিন্তিত মুখে আসেন।

হরিপদ—তাহলে একবার অভিজিতদের ওখানে যাবি নাকি ?

বিশ্ব—(অশ্রুদিকে মুখ রেখে) না।

হরিপদ—অঃ।

বিশ্ব—তোমার সেই এককথা যাও না, যাও না। গিয়ে ত' কোন  
লাভ নেই। তুমি নিজে গিয়ে বলে এসেছো তবু তারা এল  
না। সব লবাব হয়েছে।

হরিপদ—আঃ অত জোরে কথা বলো না বিশ্ব—

বিশ্ব—এতে ত' মনে করা করির কিছুই নেই! দিদি সব জানে, মিজবীর  
বাড়ী ওয়া ছেলে পাঠাতে চায় না, নষ্ট হয়ে যাবে বলে।  
এর আর ঢাক ঢাক গুড় গুড় কি আছে! যত সব বড় বড়  
কথা। কুলীন বংশ, বনেদী ঘর। ঝাড়ু মারো সব।

হরিপদ—দেখি খানিকক্ষণ, না আসে আমিই একবার যাবো।

[ হরিপদ বাড়ীর মধ্যে চলে যায়, সতীনের প্রবেশ ]

সতীন—বিশ্বদা ।

বিশ্ব—কি ?

সতীন—সেই মদন ড্রাইভার এনেছে ।

বিশ্ব—কি চাইছে ?

সতীন—( গলা নামিয়ে ) কয়েকটা খুব ভালো spare parts এনেছে ।  
একেবারে নতুন, মোটেই ব্যবহার হয় নি ।

বিশ্ব—না না ওসব চোরাই মালটাল হবে, রাখা ঠিক হবে না ।

সতীন—সব গ্যারেজেই ত তাই করছে । এ 'না'লে আজকালকার  
দিন চলে । এই ধরুন না, রাজেনবাবুর গ্যারেজে ।

বিশ্ব—ওসব রাজেন বাবুদের কথা ছেড়ে দাও । ওরা যেমন ভাবে  
কাজ করছেন, আমাকেও তেমনি করতে হবে ? কি দরকার  
এসব ঝামেলায় গিয়ে ?

সতীন—ঝামেলার কিছু নেই । মদন বলেছে এ তল্লাটের জিনিসই  
নয় । বার্ষপুরের মাল । চালের বস্তার মধ্যে ফেলে লরী  
করে সরিয়ে এনেছে ।

বিশ্ব—না, না এসব বড় অশ্রায় । পরে দেখা যাবে বলে ওকে এখন  
কাটিয়ে দাও ।

সতীন—আমি যে কথা দিয়েছি বিশ্বদা ।

বিশ্ব—সে আবার কি ?

সতীন—মদন-ড্রাইভার যাচ্ছিল রাজেন মল্লিকের কাছে । আমি বড়  
মুখ করে তাকে ডেকে এনেছি । এবারটা রেখে দিন । তা  
না হ'লে আমার মান থাকবে না ।

বিশ্ব—হি হি সতীন, আমাকে না জিজ্ঞেস করে এ রকম কথা দেওয়া  
তোমার উচিত হয় নি ।

সতীন—তাহলে একবার মদনকে ডেকে আনি বিত্তনা।

বিত্ত—(অনিচ্ছা সত্ত্বেও) ডাকো। কিন্তু খবরদার সতীন, এ রকম  
আর কখনও করো না।

[সতীনের প্রস্থান—একটু বাদে মদন ড্রাইভারকে নিয়ে প্রবেশ।  
দেখলেই বোকা যায় বেশ চালু-লোক। বছর ৪৫ বয়েস। কাচা-পাকা  
চুল। চক্চকে চোখ।]

মদন—নমস্কার বিত্তবাবু।

বিত্ত—বহ্নন।

মদন—অনেকদিন বাদে এ তল্লাটে এলাম। আপনার গ্যারেজ  
তো ভালো রকম চালু হয়ে গেছে দেখছি। বেশ সুনামও  
হয়েছে।

বিত্ত—এই চলছে আর কি।

মদন—এই তো চাই। বলে বাঙ্গালী ব্যবসা করতে জানে না। আরে  
শালা তোদের শিখিয়ে দিতে পারে। আমাদের পাড়ার  
সাহাবাবুরা সাত পুরুষে ব্যবসা করছে। লক্ষ্মীর গলায় চেন  
দিয়ে বেঁধে রেখেছে না?

বিত্ত—টাকাতো ব্যবসাতেই। কিন্তু বিপদ হ'ল ছেলেগুলোকে নিয়ে।  
লেখাপড়া শিখে যে আর কেউ ব্যবসা করতে চায় না। সব  
চাকরী খোঁজে।

মদন—সে আর আমাকে কি বলছেন। আমাদের কোম্পানীতে  
I. A., B. A. পাস করা সব ফুটফুটে ছেলে চুকছে, কি না  
ওভারশিয়ার। ড্রাইভারের পাশে লরীতে বসে থাকবে  
মাইনে কত, না ৮০২ টাকা, আর ড্রাইভারদের কম করে  
১২০২ টাকা।

বিশ্ব—তবু তারা হ'লেন বাবু আর আপনারা হ'লেন ড্রাইভার ।

মদন—সেই তো মজা । আমি এই হাফ প্যাশ্ট আর গেঞ্জী পরে সমস্ত ডিউটি সেরে দেবো । কিন্তু বাবুদের তো তা করলে চলবে না । ঘোপ ছরস্তু ধুতি পাঞ্জাবী পরতে হবে—মাসের শেষে যখন কুলোবে না তখন এসে আমাদের কাছে হাত পাতে, ড্রাইভার সাহেব টাকা ধার দাও ।

সতীন—বড় খাটী কথা বলেছেন মদনবাবু চলুন তাহলে, বিশ্বদার আবার অল্প কাজ আছে ।

মদন—তা তো যাবোই, কিন্তু দরদস্তুরটী ।

সতীন—দরদস্তুরের আর কি আছে, এক কাজ করুন । এ মাল আপনি এখানে ছেড়ে যান, কাল দেখে শুনে দাম ঠিক করে রাখা যাবে এখন ।

মদন—সে আপনারা রাখুন না । কিন্তু এখন কিছু টাকা দিতে হবে ।

বিশ্ব—কত ?

মদন—বিশ ত্রিশ টাকা, (হেসে) জানেন তো কলকাতায় এলেই একটু পরস লাগে । দিশী বোতলের দামও কি কম বাড়ছে ।

সতীন—সে আমি দিয়ে দিচ্ছি চলুন ।

[ মদন ড্রাইভার উঠে দাঁড়ায় ]

মদন—এই সব পুরানো-পাড়া দিয়ে যখন হাঁটি সত্যি কষ্ট হয় । ঐ পার্কের মোড়ের মাথায় ঘোষবাবুদের বাড়ী, তিনতলা প্রাসাদ । গেটে দরওয়ান দাঁড়িয়ে থাকতো । তিন খানা গাড়ী । চারটে কুকুর । সব ভোজবাজির মত উড়ে গেল ।

বিশ্ব—সে তো সবই গেছে । পাড়ায় যে কটা ভাঙ্গা, ঘুণ ধরা বাড়ী দেখবেন বলতে হবে না সেগুলো বাঙ্গালীর । আর তারই

পাশে চক্-চকে ঝক-ঝকে যে সব নৃতন প্রাসাদ উঠেছে সে  
সব অশ্রুদের ।

মদন—হাতে হাত দিন বিশ্ববাবু—আর একটা পঞ্চবার্ষিকী পরিকল্পনা,  
ব্যস কোলকাতায় আর বাদ্গালীকে বাস করতে হবে না।  
একেবারে ইলেকট্রিকের ট্রেনে চড়িয়ে গঙ্গা পার করিয়ে  
দেবে ।

[ দ্রুত সাবিজীর প্রবেশ ]

সাবিজী—বিশ্বনা ।

বিশ্ব—কি হল সাবিজী ?

সাবিজী—একটু কথা ছিল ।

মদন—আমি তাহলে এখন চলি বিশ্ববাবু ।

বিশ্ব—আচ্ছা কাল একবার এলেই—

মদন—কাল হয়ত পারবো না। পরশু তরশু স্থবিধে বুঝে চলে  
আসব ।

বিশ্ব—বেশ তাই হবে ।

( নমস্কার বিনিময় । মদনের সঙ্গে সঙ্গে সতীনেরও প্রস্থান )

সাবিজী—ও লোকটা কে ?

বিশ্ব—মদন ড্রাইভার । বার্গপুরের দিকে এখন কাজ করে । আগে এ  
পাড়াতেই ছিল ।

সাবিজী—কেমন ঘেন চেহারাটা ।

বিশ্ব—ওর চেহারা নিয়ে তুমি কি করবে ! তারপর কি খবর সাবিজী ?

সাবিজী—( হেসে ) খবর তো আপনাদেরই । আমার ওপর গোসা  
হয়েছে বুঝি ?

বিশ্ব—কেন ?



সাবিত্রী—তা না হলে সাবিত্রী ডাকছেন? আপনি আমায় সাবি  
ডাকেন তাই সবায়ের কি হিংসে। বলে, আমি নাকি  
বশীকরণ মন্ত্র জানি।

বিশ্ব—সতু কাজে আসছে না কেন? কারখানায় কত জরুরী কাজ  
পড়ে রয়েছে। কি ছেলে মানুষী করে আমি তো বুঝতে  
পারি না।

সাবিত্রী—আমিও কি ছাই বুঝতে পারি? ছাইপাস গিলবে আর  
বেহেড মাতাল হ'য়ে নাবা কোলকাতা ঘুরে বেড়াবে।  
আপনারই তো বন্ধু।

বিশ্ব—কত আর ভালো হবে। তাই বলছো তোর?

সাবিত্রী—(হেসে) মনে লেগেছে অমনি। আমি এমনি করে কথা  
বলি আপনি যে কি করে সহ্য করেন?

বিশ্ব—সহ্য তো অনেকেই করে দেখি। তোমার ছেলে বন্ধুও তো কম  
দেখি না।

সাবিত্রী—কি লোক বাবা—ঠিক নজরে পড়েছে। কেন আমাদের  
বুঝি কারো সঙ্গে হাসি-মস্করা করতে নেই। সব আপনারাই  
কববেন—

বিশ্ব—আমি আবার কার সঙ্গে হাসি-মস্করা করলাম?

সাবিত্রী—কেন? এ পাড়ায় যতগুলো আইবুড়ো মেয়ে আছে, সবাই  
তো দেখি সকাল থেকে নাম জপ করে বিশ্বদা, বিশ্বদা,  
বিশ্বদা।

বিশ্ব—তাই নাকি?

সাবিত্রী—শ্রাকা, জানেন না যেন—খুড়োর মেয়ে ঐ যে মায়া, আপনি  
যাকে আদর করে ডাকেন মায়ারানী—সে তো সারাক্ষণ

ঘুর ঘুর করে কখন হুঁদুগু কথা বলবে আপনার সঙ্গে । কি  
এতো গুজুর-গুজুর করে বলুন তো ?

বিশ্ব—আঃ সাবি, কি যাতা বলছো ? মায়া আমার বোনের মত ।  
ওর সঙ্গে সময়ের বিয়ের পাকাপাকি ।

সাবিত্রী—ভুল হয়ে গেছে বাবা । আর বলবো না । ( ডিবে থেকে  
পান বার করে ) পান খাবেন ?

বিশ্ব—সন্ধ্যাবেলা কেউ পান খায় ?

সাবিত্রী—আমি তো খাই । আর খেতেন ডাক্তারবাবু । বাবাঃ  
সারাক্ষণ পান না-হলে তার চলতো না । আমি তো  
ওঁরই জন্তে ডিবে করে পান নিয়ে যেতাম । বড় ভালো  
লোক ছিলেন ।

বিশ্ব—ভালো লোক তো বটেই । বিশেষ করে যখন—

সাবিত্রী—কেনই হিংসা হচ্ছে তো । ( হাসি ) তাওতো এখনো  
বলিনি । উনি আবার আমায় সাবি বলেই ডাকতেন ।

বিশ্ব—তাই নাকি ? তা এমন ডাক্তারবাবুটিকে ফেলে এলে কেন ?

সাবিত্রী—ভুল হয়ে গেছে, বড় ভুল । ( হেসে ) ভাবছি আজ একবার  
হাসপাতালে যাবো । মেট্রনের সঙ্গে দেখা করতে ।

বিশ্ব—হঠাৎ ডাক্তারবাবুর খোঁজে নাকি ?

সাবিত্রী—না ? যদি কোন কাজ পাওয়া যায়—

বিশ্ব—তার মানে ? তুমি আবার নার্সিং করবে নাকি ? সতুকে  
বলেছ ?

সাবিত্রী—বলে কি হবে । উনিতো মত দেবেন না জানি ।

বিশ্ব—তাহলে, না না এ উচিং হবে না সাবিত্রী । তুমি বুঝতে পারছ  
না, ছেলেমানুষ, এ অন্ডায় । সতু তোমার স্বামী ।

সাবিত্রী—(হেসে)। বিস্ময় কথা বলতে বলতে আপনি সব ভুলে যান। আমি মোটেই ছেলে মানুষ নই। পঁচিশ বছর বয়েস। সময় মত বিয়ে হলে এতদিনে আমি তিন ছেলের মা হতাম।

বিশ্ব—সব সময়ে তোমার হাসি আর ঠাট্টা।

সাবিত্রী—তাই তো এখনও বেঁচে আছি বিস্ময়। এর উপর গম্ভীর হলে কি আর রক্ষে ছিল। চলুন না একবার আমার সঙ্গে।

বিশ্ব—কোথায়?

সাবিত্রী—বল্লাম তো মেট্রনের কাছে।

বিশ্ব—আমি গিয়ে কি করবো?

সাবিত্রী—সত্যি বলছি বড্ড দরকার আছে (বিশ্বের হাত ধরে) চলুন না বিস্ময়।

বিশ্ব—মানে, এদিকে একটু কাজ ছিল। হয়ত অজিতদার বাড়ী যেতে হবে।

সাবিত্রী—না, না, চলুন। বেশীক্ষণ সময় লাগবে না। একটবার শুধু দেখা করা। হয়ত একটু পরামর্শ দরকার হবে। আপনি ছাড়া আমার আর কে আছে?

বিশ্ব—আচ্ছা, তবে চল।

সাবিত্রী—যদি মেট্রন জিজ্ঞেস করে হোস্টেলে থাকলে আপনার অনুবিধে হবে কি না। বলবেন, না। আপনি চান আমি হোস্টেলে থাকি।

বিশ্ব—কি বলছো সাবিত্রী, আমি বুঝতে পারছি না। তুমি কি আমাকে—

সাবিত্রী—হ্যাঁ, আমার স্বামীর অভিনয় করতে হবে।

বিশ্ব—অসম্ভব এ আমি পারবো না।

সাবিত্রী—আপনার পায়ে পড়ি বিশ্বনা, এতে আপত্তি করবেন না।

সত্যি বলছি হোস্টেলে জায়গা না পেলে আমায় গলায় দড়ি  
দিতে হবে।

বিশ্ব—পাগলের মত কি বলছো। চল, আমি যাচ্ছি তোমার সঙ্গে।

(ইতিমধ্যে সরষু ও মায়ার প্রবেশ)

সরষু—কোথায় যাচ্ছিস বিশ্ব? বাবা বলছিলেন—

বিশ্ব—আমি একটু বাদেই আসছি। জরুরী দরকার আছে।

[বিশ্ব ও সাবিত্রীর প্রস্থান]

মায়া—দেখলে তো সাবিত্রীর সঙ্গে বেরিয়ে গেল—কি ঢং রে বাবা।

হেসে হেসে গায়ে লুটিয়ে পড়ছে। সাবিত্রী এই বস্তীতে  
আসার পর থেকেই তো যত গোলমাল।

সরষু—আশ্চর্য, এমন আহামরি কিছু চেহারাও না—কি করে এ  
রকমটা হোল। ছি, ছি, বিশ্বটা পর্যন্ত—

মায়া—আমাদের তো লজ্জা করে। এ পাড়ায় বিশ্বদার কথা ছিল,  
শেষ কথা। বুড়ো-বুড়ী থেকে স্নরু করে বাচ্চারা পর্যন্ত কেউ  
ওর সঙ্গে পরামর্শ না করে কাজ করতো না। আর এখন  
সবাই টিটকিরি দেয়। আমাকে শুনিয়ে শুনিয়ে কথা বলে।

সরষু—সতুটাই বা কি রকম! বৌটাকে সামলাতে পারে না।

মায়া—দোষ তো সতুদারই। এ মেয়েকে কেউ বিয়ে করে ঘরে  
আনে। একে রেফিউজী, তায় আবার হাসপাতালের  
সেবিকা।

সরষু—নাস' শুনেছিলাম না।

মায়া—না না পাশ করা নাস' নয়।

সরযু—( কি যেন ভেবে ) নিজেরা পছন্দ করে বিয়ে করলে তবু ওদের  
বনিবনা হলো না ?

মায়া—হবে কোথা থেকে । সাবিত্রী তো সারাক্ষণই ছেলের সঙ্গে  
ঘুরে বেড়ায় আর সতুদা বোতলের পর বোতল মদ খায় ।  
তারপরই চুলোচুলি আর মারামারি ।

[ হুড়মুড় করে মত্ত অবস্থায় সতু ঢুকে গাছের পেছনে লুকোয় । ]

সরযু—কে এলো ?

মায়া—কে ওখানে, সাড়া দাও ?

সতু—( জড়ান গলায় ) আমি ।

মায়া—আমি, আমি কে ?

সতু—( টলতে টলতে বেরিয়ে ) আমাকে চিনতে পারছেন না । আমি  
তোমার পতিদেবতা । তোমার ইহকাল, তোমার পরকাল ।

মায়া—আঃ সতুদা, কাকে কি বলছেন ?

সতু—কাকে আবার, সাবিত্রীকে ।

মায়া—সাবিত্রী এখানে নেই—

সতু—ঘোমটা মাথায় ঐ-তো দাঁড়িয়ে, আমাকে দেখে লজ্জায় মিশে  
গেলে যে—

সরযু—আমি সাবিত্রী নই, যাও এখন থেকে—

সতু—তবে তুমি কে বাবা । সাবিত্রী যদি না হবে, তবে কি তুমি  
সতী, না দময়ন্তী ?

সরযু—আমি সরযু ।

সতু—সরযু, সরযু, দিদি, আমাকে ক্ষমা করো, আমি ঠিক ঠাহর করতে  
পারিনি । মাথাটার ঠিক নেই তো । এখন থেকেই  
দণ্ডবৎ হই । [ সতু হাঁটু গেড়ে বসে ]

সরষু—সতু ভাই, তুমি কেন এইভাবে জীবনটা নষ্ট করছো। তুমি  
আর বিশু কতদিনের বন্ধু তোমরা। আর কেউ না জাহুক  
আমি তো জানি। কত খেটে এই গ্যারেজ তোমরা দাঁড়  
করিয়েছো, রক্ত জলকরা খাটুনি।

সতু—এই গ্যারেজটা—ই্যা অনেক খাটুনি, দিদি তুমি তো বিশ্বর দিদি।  
আমার দিদি ছিল না, কেউ ছিল না, ছিল একটা মেয়ে,  
খুব ভালবাসতো, তারপর কেমন যেন সব গুলিয়ে গেল।  
মাথাটায় কি কষ্ট।

সরষু—কেন এইসব জিনিস খাও। কি লাভ?

সতু—লাভ আছে, অনেক লাভ, ভুলে থাকার লাভ।

[ ক্লান্ত শরীরে খুড়োর প্রবেশ ]

খুড়ো—উঃ কি বেজায় গরম, রাস্তায়ও তেমনি ভিড়।

মায়্যা—জল খাবে—এনে দেব বাবা।

খুড়ো—ঘরে গিয়েই খাব। এখানে একটু জিরিয়ে নিই। ( সতুকে  
দেখে ) কি খবর সতু, শরীর ভালো তো?

সতু—ই্যা খুড়ো, বেশ ভাল, দিব্যি—

খুড়ো—আবার কাজে লেগে পড়। চূপচাপ বসে থেকে কি হবে—  
বিশুও বলছিল।

সতু—কাজ আর কাজ। কার কাজ কে করবে। আজ তাহলে  
চলি। আমি মদ খাই বটে কিন্তু মাতাল হই না! কে যেন  
বলতো I hate মাতালস্, আমিও hate করি—এই দেখো  
সোজা চলে যাবো, পা এতটুকু টলবে না—one-two-three  
[ প্রস্থান ]।

খুড়ো—এ্যাঃ এতটুকু বয়সে ছোড়াটার Head Office এ গোলমাল হ'য়ে গেল। কর্মফল, কর্মফল, তাছাড়া আর কি। কতটুকু বয়স থেকে দেখছি। বিশু আর সতু হুজনে হাতে কলমে কাজ শিখে এই গ্যারেজ তৈরী করলে। আর এখন, থাকগে ভেবে কি হবে। তারপর সরযু মা কতদিনের ছুটি—

সরযু—এই তো কদিন।

খুড়ো—না, না লম্বা ছুটি নিতে হবে। মায়ার বিয়ের সবই তো তোমায় করতে হবে মা। আমি আর কি জানি আর ওর আছেই-বা কে ?

সরযু—নিশ্চয় করবো, কতদিন নিজেদের বাকুর বিয়ে-থাওয়া হয়নি। মায়ার বিয়েতে কত যে হৈ হৈ করবো। এখন থেকে বলে রাখছি খুড়ো, উঠোনটা বেশ নামিয়ানা দিয়ে ঘিরতে হবে। ঐ গ্যারেজের মধ্যে কিন্তু একটাও গাড়ী রাখতে দেবো না। সব রাস্তায় বার করে দেবো। ঐখানে ভিঁয়েন বসবে, পাত পড়বে।

মায়া—দিদি তুমি কি দাঁড়িয়ে দাঁড়িয়ে শুধু গল্পই করবে, বাড়ীতে কত কাজ রয়েছে। বাবা, এই নাও চাবি আমি এদিকের কাজ নেরেই যাচ্ছি। ( মায়ার প্রস্থান )

সরযু—মেয়ের লজ্জা হয়েছে।

খুড়ো—তোমাকে পেয়ে ওর যে কত অভাব পুরেছে মা, সত্যিই তুমি ওর বড় দিদিটির মত। কি আশ্চর্য দেখ বাড়ী ছেড়ে যেদিন বস্তীতে আশ্রয় নিতে হ'ল, মনে মনে ভেবেছিলাম, আমার সব সাধই বোধ হয় শেষ হয়ে গেল, অথচ এখানে এনেই পেলাম সব চেয়ে আনন্দ।

সরষু—এখানকার সবাই আপনাকে কত ভালবাসে, খুড়ো বলতেই  
এরা অজ্ঞান, ছেলে বুড়ো সকলের কথাই বলছি।

খুড়ো—বিশেষ করে তোমাদের পরিবারের কাছে আমি যে কতখানি  
কৃতজ্ঞ, বিষ্ণু, হরিভাই, তুমি, মুখের কথায় সে কৃতজ্ঞতা  
প্রকাশ করা যায় না। তোমরা যে কত দিয়েছো, তবু  
মনের অন্তঃপুরে কোথায় যেন আর একটু আশা  
লুকিয়েছিল।

সরষু—কিসের আশা খুড়ো?

খুড়ো—না, সে কথা ঠিক হবে না, পরে হয়তো কখনও—

সরষু—না না আপনি বলুন, আমি কাউকে বলবো না।

খুড়ো—আমি ভাবতাম হয়তো মায়ার সঙ্গে—

[ব্যস্তভাবে নিত্যনন্দের প্রবেশ, ভক্তি গদ গদ চেহারা—সঙ্গে  
ভোলা]

নিত্যনন্দ—আরে আরে খুড়ো তুমি এখানে আর আমি সব জায়গায়  
খুঁজে বেড়াচ্ছি। দাও দাও পায়ের ধুলো দাও, আঃ! আঃ!

(খুড়োকে প্রণাম)

সরষু—(খুড়োর দিকে চেয়ে) আমি ভিতরে যাই।

নিত্যনন্দ—দাঁড়ান, দাঁড়ান, আমাকে দেখে লজ্জা পাবেন না, ইনি?

খুড়ো—বিষ্ণুর দিদি।

নিত্যনন্দ—তাই নাকি, তবে তো আপনি আমারও দিদি (সরষুকে  
প্রণাম)। আমার নাম নিত্যনন্দ, আমি হলাম খুড়োর  
ভাইপো, মানে উনি হলেন আমার খুড়ো, মায়া আমার  
খুড়তুত বোন।

সরষু—বহ্নন, বহ্নন।



নিত্যানন্দ—কত ভাগ্য করলে দিদি তবে এমন খুড়ো পাওয়া যায়।

সাক্ষাৎ ভোলানাথ—যেমন মন, তেমনি কাস্তি।

সরযু—আগে বোধ হয় আমাদের এখানে কখনও দেখিনি, না ?

নিত্যানন্দ—কি করে যে এতদিন এঁকে ভুলেছিলাম সেই ভেবেই তো  
অবাক হচ্ছি !

ভোলা—তা হঠাৎ মনেই বা পড়লো কি করে ?

নিত্যানন্দ—স্বপ্নাদেশ পেলাম।

ভোলা—স্বপ্নাদেশ কোথায় ?

নিত্যানন্দ—কানীতে। দিদিমার শরীর খারাপ হওয়া থেকে কানীতে  
তাঁরই সেবা শুশ্রূষা করছিলাম, তবু তাঁকে ধরে রাখতে  
পারলাম না, পুণ্যবতী একদিন রাত্রে আমাদের ফাঁকি দিয়ে  
চলে গেলেন, উঃ সে কালরাত্রি যে কিভাবে আমার কেটেছে,  
চোখে শুধু জলের ধারা—

খুড়ো—আঃ হা হা, নিতুর আমার বড়ই কষ্ট হয়েছে।

নিত্যানন্দ—খুড়ো শুধু তুমিই আমার দুঃখ বুঝতে পারবে, সেই  
পৃষ্ঠীভূত দুঃখ ক্রমশঃ আত্মঘাতী হয়ে উঠলো, ঠিক করলাম  
আত্মহত্যা করবো কিসের জন্তু আর প্রাণ ধারণ করা।  
এমন সময় খুড়োকে স্বপ্নে দেখলাম, দেখলাম সাক্ষাৎ  
মহাদেব, আমার কপালে হাত রেখে আশীর্বাদ করছেন।

ভোলা—তাই সোজা কোলকাতায় চলে এলেন ?

নিত্যানন্দ—এতটুকু কালবিলম্ব না করে। এখন থেকে আমি খুড়োর  
সেবা করবো, আহা আর কটা দিনই বা উনি বাঁচবেন ?

খুড়ো—এ্যাঃ কি বলছিস রে ! আমারও গঙ্গাযাত্রার সময় হল নাকি !

নিত্যানন্দ—তোমার মত মহাপুরুষ ক’দিন আর এ মরমেই রক্ষা

করবেন তবু যে কটা দিনই হোক, আমি সেবা করে  
যাবো। [ সরষু প্রস্থানোত্তত ]

নিত্য—চলে যাচ্ছেন দিদি, তবে একটা কথা আপনার কাছে নিবেদন  
করি—

সরষু—বলুন।

নিত্য—খুড়ো আমার বড় ভাল মানুষ, তাকে ঠকাবার চেষ্টা করবে  
অনেকে, তাই একটু বলে যাচ্ছি, মানে বলতেও লজ্জা  
করছে, আমার আপন বড় ভাই পঞ্চাদা, উঃ কত বড় রাঙ্কেল  
আর কি মারাত্মক চরিত্রহীন তা কি বলবো আপনাকে।  
খুড়োকে ছোটোখে দেখতে পারে না, আর এখন দেখবেন  
টাকার লোভে হোক হোক করছে। খবরদার কিন্তু ওকে  
কাছে ঘেঁষতে দেবেন না।

সরষু—আমি আর কি বাধা দেবো।

নিত্য—আপনাদের উপরেই তো সব নিভব করছে। ( সরষুকে প্রণাম )

সরষু—ওকি করছেন বার বার ?

নিত্য—সে কি কথা প্রণাম করবো না, খুড়ো তোমার পায়ের ধুলো  
দাও। আমি তাহলে এখন আসি, তোমার সঙ্গে বরং  
দরকারি কথাটা—

খুড়ো—সামনের সপ্তাহেই হবে।

নিত্য—অত দেরি, তা যখন বলছো, মানে বুঝলেন না দিদি, আমার  
আবার তিন তিনটে মেয়ে, যদিও ছোট ছোট, তাহলেও  
খুড়োর তো মাত্র একটা তাই বলছিলাম আর কি খুড়ো  
যদি কিছু কিছু ওদের নামে—

খুড়ো—বলছিতো আমি ভেবে রাখবো।

নিত্য—আমি তো আর পুরো সাত হাজারই দিয়ে দিতে বলছি না,  
এই ধরুন পাঁচ হাজার টাকা আমার তিন মেয়েকে দিলে  
আর বাকি দু'হাজার রইল মায়ার নামে। কি বলুন দিদি,  
এর চেয়ে ভালো যুক্তি আর কি দিতে পারি ?

খুড়ো—তুমি নিশ্চিত হয়ে যাও নিত্যানন্দ—যাহোক একটা কিছু  
আমি সামনের সপ্তাহে করে ফেলবো।

নিত্য—সে আমি জানি, তুমি কোন অত্যাচার করবে না, আর একবার  
পায়ের ধুলো দাও, আমি চলি।

( প্রণাম করে নিত্যানন্দ প্রস্থানোত্তত )

ভোলা—দাঁড়ান, দাঁড়ান—

নিত্য—কেন ?

ভোলা—আমি একবার আপনার পায়ের ধুলোটা নিই, কলিতে এমন  
ভক্তিশ্রদ্ধা সহসা দেখা যায় না।

নিত্য—তুমি কি আমার সঙ্গে মস্করা করছো।

ভোলা—( জিভ বার করে ) ছিঃ ছিঃ তাই কখনও করতে পারি।

( বেশ রাগতভাবে নিত্যানন্দের প্রস্থান, ভোলা, খুড়ো, সরযু  
গললের একসাথে হাসি। )

সরযু—খুড়ো, আপনার ভাইপো চটেছে।

ভোলা—ওঃ যেন বিনয়ের অবতার। কথা শুনে অবধি আমার গা  
জলছিল। তাইতো বাছাধনকে চটিয়ে দিলাম।

খুড়ো—চটলেও আর কত চটবে, আমাকে তো আর ছেড়ে দেবে  
না, সারা জীবন জালিয়ে মারবে।

( চিস্তিত মুখে হরিবাবুর প্রবেশ )

হরিপদ—বিশু এখনও ফিরলো না।

সরযু—না।

হরি—তাইতো।

খুড়ো—কি ভাবছে। এত হরি ভাই?

হরি—মানে অজিতের আসবার কথা ছিল, দাদাভাইকে নিয়ে এখনও  
এলো না, ভাবছিলাম কাউকে একবার পাঠালে হত।

সরযু—না, লোক পাঠানোর কি আছে, উনিতো নিজেই আনবেন।

খুড়ো—হরি ভাই, সূঁসার কর, সব কিছু কর, আমার আপত্তি নেই,  
কিন্তু দোহাই তোমার কপাল কুঁচকো না, তাহলেই  
সর্বনাশ। Barometerএর পারা একেবারে উপরে উঠে  
যাবে।

হরি—তোমাকে কিন্তু দেবু অনেকক্ষণ থেকে খুঁজছিল।

খুড়ো—তাই নাকি, যাবো তাহলে একবার চানটান সেরে—

সরযু—ভোলা গিয়ে ওকেই নাহয় খবর দিয়ে আসুক।

খুড়ো—সেই ভালো, ভোলা তুমি যাও।

(ভোলা বাইরে চলে যায়, সরযু বাড়ীর ভিতরে)

খুড়ো—অসুখ-বিসুখ যা বাড়ছে, তার আর কি বলবো। এই আজ  
সকালে সোনারপুকুর গিয়েছিলাম, খবর শুনেছিলাম,  
গ্রামের অনেকেই পেটের অসুখে ভুগছে, ভাবলাম বেশ  
কিছু টাকার গুণ্ধ ওখানে বিক্রী হবে।

হরি—হ্যাঁ, মায়া আজকে বলছিল বটে, তুমি সকাল থেকেই কোথায়  
গুণ্ধ বিক্রী করতে গেছ, তারপর—

খুড়ো—আর গুণ্ধ বিক্রী, সেখানকার অবস্থা দেখেতো আমার মাথায়  
হাত, একেবারে এপিডেমিক, পটাপট লোক মরছে, জেলা  
হাসপাতালে যেতে না যেতেই লোক সাবাড়। ইতিমধ্যে

প্রায় পঁচিশজন মারা গিয়েছে শুনে এলাম আরও দশ পনের জন মরছে।

হরি—এঁা বলকি, হাত পা ভাল করে ধুয়েছিলে এসব ছোঁয়াচে রোগ। তা তোমার ওষুধ অনেকে নিলে তো?

খুড়ো—নিলে বইকি, গাঁ শুদ্ধ সকলেই নিলে।

হরিপদ—তবে অত মন খারাপ করছিলে কেন? বেশ দু'পয়সা হয়েছে বল।

খুড়ো—দু'পয়সা? ই্যা মানে তাহলে, ওই শোক, তাপ, দুঃখ, কষ্ট।

হরি—তার মানে তুমি কারুর কাছে থেকে টাকা পয়সা পাওনি? বিনা পয়সায় ওষুধ দিয়েছো?

খুড়ো—কে বললে দিয়েছি, না, না আমি ওরকম বোকা লোকই নই, মিছিমিছি ঠকতে যাব কেন?

হরি—ও কথা বললে হবে কি, খুড়ো, বেশ বুঝতে পারছি, কেউ তোমায় পয়সা দেয়নি।

খুড়ো—আহা বলা যায় না, পরে হয়তো ওরা টাকা দিয়ে দেবে।

( দেবব্রতের প্রবেশ )

দেবু—আবার কিসের টাকা, এটনীর সঙ্গে তো পাকা বন্দোবস্ত করে এসেছি, পুরোপুরি সাত হাজার টাকা খুড়োর নামে সামনের সপ্তাহে দিয়ে দেবে।

হরি—না, না, তা নয়, খুড়ো আজ গিয়েছিল ওষুধ বিক্রী করতে, সেখানে এত অসুখ-বিসুখ যে পয়সা না নিয়েই পঁচিশ টাকার ওষুধ সেখানে দান করে এসেছে।

দেবু—আরে ছি ছি, এই সব দুর্বুদ্ধিকে কখনও প্রভ্রম দিও না, সাত

হাজার টাকা আজ পেয়েছ বলে বিনিপয়সায় ওষুধ বিলোবে,  
কদিন তোমার টাকা থাকবে শুনি ?

খুড়ো—না তা ঠিক নয়, দেবুভাই । তুমি বুঝতে পারছো না ।

দেবু—ও শালাদের চেন না, ওষুধ কিনতে হলেই যত অভাব । আমি  
খুব জানি, আমার পিসেমশাই হোমিওপ্যাথী ডাক্তারী করে  
কলকাতায় তিনখানা বাড়ী তৈরী করেছেন, যাও একবার  
তার ডিসপেন্সারীতে । যে আসছে সেই নাকি কান্না স্তব্ধ  
করে, আমি বড় গরীব খেতেই পাই না, তো ওষুধের পয়সা  
দেব কোথেকে । আমার পিসেমশাই ঘুঘু লোক । চোখের  
জলে ভোলেন না, শ্রেক টিউবওয়েল দেখিয়ে বলেন, পয়সা  
না থাকে তো যাও কলের জল খাও, দিব্যি সেরে যাবে ।  
ব্যস আর ছ'বার বলতে হয় না, লুঙ্গির ট্যাক থেকে,  
শাড়ীর আঁচল থেকে দিব্যি দশ টাকার নোট বেরিয়ে  
আসে ।

খুড়ো—হবে হয়তো, কতটুকুই বা দেখেছি, যদি তারা আমায় ঠকিয়ে  
থাকে, না হয় ঠকলামই, কিন্তু ঠকবার ভয়ে যদি এমন কাউকে  
বঞ্চিত করতাম সত্যিই যার অভাব তাহলে যে নিজের কাছে  
নিজেই জবাব দিতে পারতাম না দেবু ভাই ।

দেবু—তুমি যে মাঝে মাঝে কি বল খুড়ো বুঝতে পারি না । বুঝেছ  
হরিপদ । এ বেয়াই-এর পুরো ভারই দেখছি আমাকেই  
নিতে হবে, বড় সরল, সাতভূতে ঠকিয়ে খাবে ।

হরি—বিয়ের ব্যবস্থার কথা কি বলছিলে, এই বেলা বলে নাও ।

দেবু—খুড়ো তোমার কিছু মাথা ঘামাতে হবে না, আমি সব ঠিক  
করে ফেলেছি । মেয়ের বিয়ে হবে হরিপদের বাড়ী থেকে ।

হরি—আহা সে আর বলবার কি আছে, বিয়ে তো এখান থেকে হবেই।

দেবু—আমাদের বুড়ো শ্রাকরাকে ডেকে পাঠিয়েছি। ওই মায়ার মার যে গয়নাগুলোর কথা বলছিলে ওকে দিয়েই ভেঙ্গে চুরে যা করবার করে নেওয়া যাবে। দজ্জি ঠিক করে ফেলেছি, মায়াব একটা জামার মাপ চাই (পকেট থেকে ফর্দ বার করে) এই হল জামা কাপড়ের লিঙ্ক মেয়ের শাড়ী, ব্লাউজ, শায়, নমস্কারী শাড়ী লাগছে চারটে, ওটা একটু ভাল হওয়া দরকার, তাছাড়া ননদ ঝাঁপির দরুণ এই মনে কর তিন সেট শাড়ী ব্লাউজ আর এই লিঙ্কটা বরের, অফিসের কাজ, ওর তো কোট প্যান্টই বেশী করতে হবে সে দোকানও আমি ঠিক করে ফেলেছি, জুতো ছ'জোড়া, নেকটাই খানকয়েক তাছাড়া ধূতি পাঞ্জাবী, গরদের জোড় এসব তো আছেই, মানে যা নইলে নয় এই আর কি।

হরি—তাহলে থালা বাসনের কোন ফর্দ নেই?

দেবু—আহা সে তো দানের মধ্যে পড়ল, এই পর না (অল্প কাগজ বার করে) একখানা ডবল বেড, একটা স্টালের আলমারী, আলনা, ড্রেসিংটেবল আর দরকার নেই, মেয়ের মার তো আছেই।

খুড়ো—তাহলে লিঙ্কগুলো আমার কাছে দাও, একটু দেখে রাখি।

দেবু—তোমায় দিয়ে লাভ নেই, হারিয়ে ফেলবে, কেনা কাটা সব আমি করে ফেলেছি, সামনের সপ্তাহ থেকে আমি রোজ বেকুব, সন্ধ্যার পর এক ঘণ্টা করে। ততদিন তুমি টাকাটাও পেয়ে যাবে, কোন অসুবিধে থাকবে না।

( পঞ্চাননের প্রবেশ, পরনে পাঞ্জাবী আর জহর কোট । দেখলেই  
বোঝা যায়, বেশ চালু লোক । )

পঞ্চা—ও খুড়ো, তোমাকে আমি গুরু খোঁজা খুঁজছি আর তুমি  
এখানে এই বুড়োগুলোর সঙ্গে গল্প করছে।

দেবু—( রেগে ) খুড়ো তোমার ভাইপোকে মুখ নামলে কথা বলতে  
বল, ও আমাকে দেখলেই ওই রকম বুড়ো বুড়ো করে ।

পঞ্চা—তাই বলে বুড়োকে বুড়ো বলবো না তো কি ছোড়া বলবো,  
আর দাদাকে বলবো নাতি ।

খুড়ো—আঃ পঞ্চানন, বয়সের মান সম্মান রেখে কথা বলতে জান না ।

পঞ্চা—সে হবে এখন, চট করে তোমার সঙ্গে দুটো প্রাইভেট কথা  
সেরে নিই, আপনারা দয়া করে যদি একটু কেটে পড়েন—

দেবু—আমরা কেটে পড়ব মানে, জানো এটা হরিদার বাড়ী ।

পঞ্চা—বেশতো তাহলে বাড়ীর মধ্যে ঘান, আমার এটা জরুরী কথা  
কিনা, এবং গোপনীয় ।

হরি—আর রাগারাগি করে কি হবে, চল না দেবু, আমরা বরং ঘরের  
মধ্যে যাই ।

পঞ্চা—থ্যাক ইউ গ্ৰার । আমার বেশীক্ষণ লাগবে না, মাত্র পাঁচ  
মিনিট । ( হু'জনের বাড়ীর মধ্যে প্রস্থান )

খুড়ো—( রেগে ) কি চাও তুমি ?

পঞ্চা—টাকা ।

খুড়ো—কোথায় টাকা পাব, এখনও তো আমাকেই দেয়নি ।

পঞ্চা—আহা সেতো কদিন বাদেই দেবে ।

খুড়ো—বেশতো তখন এসো, দিন সাতেক বাদে যাহোক একটা  
ভেবে স্থির করা যাবে ।



পঞ্চা—নেত্যাটা এসেছিল ?

খুড়ো—হ্যাঁ, নিত্যানন্দ প্রায়ই আসে।

পঞ্চা—নম্বর ওয়ান হিপোক্রিট লোক, দেখিয়ে তোমায় প্রণাম করবে  
আর পেছনে ছুরি মারবে। ওর জন্ত আমি লজ্জায় মুখ  
দেখাতে পারি না, কি ছেলেই পেটে ধরেছিলেন মা।

খুড়ো—ভাই-এর নিন্দে করাটা কি খুব ভাল কথা ?

পঞ্চা—ভাল হোক না হোক সত্যি কথা আমি বলবই, তোমাকে যে  
কথাটা বলছি শোন, টাকা নিয়ে কি করবে কিছু ভেবেছ ?

খুড়ো—না।

পঞ্চা—স্মৃতি কর।

খুড়ো—স্মৃতি এই বয়সে !

পঞ্চা—তাতে কি হয়েছে ? স্মৃতি করার আবার কোন বয়সের ঠিক  
আছে নাকি। তাছাড়া আর লোকে টাকা চায় কেন ?  
যে কটা দিন পয়সা থাকে ভাল মাল খাও, বাড়ির বাড়ী  
চল, আত্মীয় স্বজন বন্ধু বান্ধব সব ব্যাটাকে কলা দেখাও।  
সন্ধ্যাবেলা গিলে করা পাঞ্জাবী পরে আতর মেখে বাড়ী  
থেকে বেরবে আর ভোর বাতে বাড়ী ফিরবে।

খুড়ো—তারপর কলসীর জল ফুবিয়ে গেলে অভ্যাসটিভে খরাপ  
হয়ে যাবে।

পঞ্চা—ধার করবে। তুমি একেবারে ছেলে মানুষ, টাকায় টাকা  
আসে, একবার যখন পেয়ে গেছ দেখবে পরে ঠিক আসছে।  
( কাছে এগিয়ে গিয়ে ) মাইবী বলছি খুড়ো কাঞ্চনমালাকে  
একবার দেখলে তুমি ঠাণ্ডা হয়ে যাবে। চেহারার কি  
চেকনাই।

খুড়ো—তোমার যাতায়াত আছে বুঝি ?

পঞ্চা—পয়সা থাকলেই যাই, বিনা পয়সায় তো আর সেখানে ঢুকতে দেবে না। তুমি টাকা পাবার পর কিছু ডিসাইড করো না, একটা রাত্রি শুধু আমার সঙ্গে স্মৃতি করবে চলো, তারপর যা তোমার মন বলে।

খুড়ো—তা তোমার বুঝি কোন টাকার দরকার নেই ?

পঞ্চা—আর কি চাই ? তুমি কিনবে বোতল, আমি প্রসাদ পাব, তুমি ঢুকবে কাঞ্চনমালার বাড়ী, আমি একটা গেটপাশ লিখিয়ে নেব।

খুড়ো—আচ্ছা তাহলে তুমি এখন এসো, দিন সাতেক বাদে—

পঞ্চা—সে আর বলতে হবে না, আমি ঠিক আসবো। এখন একটা পাঁচ টাকার নোট ছাড় দেখি।

খুড়ো—আমার কাছে তো টাকা নেই।

পঞ্চা—কেন ধাপ্পা দিচ্ছ খুড়ো, নিদেন চারটে টাকাই দাও।

খুড়ো—অতও নেই।

পঞ্চা—বেশতো কি আছে দেখি না ?

( খুড়ো খুচরো পয়সা বার করে দেয় )

খুড়ো—এই টাকা দেড়েক হবে।

পঞ্চা—ব্যস ব্যস অতো চাই না, এক টাকা চার আনা হলেই হবে, ওয়ান বটল অন্ড ম্যাকলিস খাটি স্বদেশী জিনিস, ওপরে মা কালীর চেহারা। আপাততঃ এই দিয়েই তেষ্ঠা মেটান যাক, চলি খুড়ো।

( পঞ্চানন বেরিয়ে যায় বিত্ত একটু আগেই ঢুকেছিল )

বিত্ত—জীবটি কে ?

খুড়ো—ভাইপো ।

বিশু—ও ইনিই বুঝি, দ্বিতীয়টি ? নিত্যানন্দ স্বামীকে তো দেখেছি  
ইনি বুঝি ম্যাকলিস্ ।

খুড়ো—বিশু ।

বিশু—তোমার ভাগ্যি ভাল যে এতদিন মহাপ্রভুদের উদয় হয়নি ।

খুড়ো—তা—বিশু ।

বিশু—কি বলছ খুড়ো ।

খুড়ো—আমার কপালে একটু হাত দেতো ।

বিশু—হাঁ খুড়ো ।

খুড়ো—কি ?

বিশু—কুঁচকেছে ।

খুড়ো—ঠিক বুঝেছি এরা দেখছি সবাই মিলে আমার কপালের উপর  
জোয়ার ভাটা খেলাবে ।

( মায়ার প্রবেশ )

মায়া—বাবা, কাকাবাবুরা তোমায় ভেতরে ডাকছেন ?

খুড়ো—দাবায় বসছে বুঝি ?

মায়া—না এমনি গল্প করছেন ।

খুড়ো—বাই, বিশু তোমার সঙ্গেও আমার একটু দরকার আছে কাল  
এক সময়ে বসা যাবে এখন ।

বিশু—বেশতো ।

( খুড়োর বাড়ীর ভেতর প্রস্থান )

বিশু—মায়া আমার কাছে কেউ এসেছিলেন ?

মায়া—কই না তো ( একটু পরে ) ও ই্যা সতুদা এসেছিলেন ।

বিশু—( বিস্মিত হয়ে ) সতু আমার কাছে ? কিছু বললে ?

মায়ী—কিছু না। বোধ হয় সাবিজীকে খুঁজছিল।

বিশু—( দীর্ঘশ্বাস ফেলে ) ও ( একটু থেমে ) সত্য কি প্রকৃতিস্থ ছিল ?

মায়ী—না, কথা বলা, ইঁটা, চলা, কিছুই ঠিক ছিল না।

বিশু—আশ্চর্য। সেই সত্য কি রকম করে এমন হয়ে গেল।

মায়ী—সত্যিই আপনি বুঝতে পারেন না বিশু।

বিশু—মানে ?

মায়ী—এর আর অর্থ মানে কি, সাবিজীর জন্মে, ছি ছি ! অথচ আপনি তাকে প্রশ্ন করেন।

বিশু—আর বোধ হয় প্রশ্ন দেবার প্রয়োজন হবে না, সে আর ফিরবে না।

মায়ী—সাবিজী কোথায় গেছে !

বিশু—যেখান থেকে এসেছিল সেইখানেই।

মায়ী—( ভয় পেয়ে ) তার মানে !

বিশু—ভয় নেই, আশ্বস্ত হো। সে করেনি। সে ধরনের দুর্বল মেয়েও সে নয়। যে হাসপাতাল থেকে সত্যকে বিয়ে করে ঘর বাঁধবার স্বপ্ন নিয়ে চলে এসেছিল, সেইখানেই সে ফিরে গেছে আবার সেবিকা হয়ে।

মায়ী—সেইতো যেতেই হল, মাঝ থেকে সত্যদার জীবনটা গেল নষ্ট হয়ে।

বিশু—কর জীবনটা নষ্ট হল তা বিচার করার সময় এখনও আসেনি মায়ী, যাকগে ওসব কথা, অজিতদারা এসেছে ?

মায়ী—না এখনো আসেনি।

বিশু—আমি জানতাম আসবে না।

মায়ী—কাকাবাবু খুব ব্যস্ত হচ্ছিলেন।

বিশ্ব—যাই একবার, আপদ যত বালাই, না গেলে দিদির অভিমান হবে,  
বাবার মন খারাপ—

( সরযুর প্রবেশ )

সরযু—না আমার অভিমান কিছু হবে না, তোমায় যেতে হবে না বিশ্ব ।

বিশ্ব—সে হয় না, আমি এখনই ঘুরে আসছি ।

সরযু—বললাম তো দরকার নেই ।

বিশ্ব—তুমি মিথ্যে রাগ করছ দিদি, আমি যে ইচ্ছে করে যেতে চাই  
না, তা তো নয়, জানি এ নিষ্ফল চেষ্টা । সাধারণ বুদ্ধিতে  
যতটুকু বুঝেছি এইটুকুই জানি এযুগ নিজে খেটে খাওয়ার  
যুগ, মিথ্যে শিক্ষার বড়াই, অভিজ্ঞাত্যের আফালন, ফাঁকা  
দস্ত, আমার কাছে অসহ্য । আমি জানি অজিতদা আমাকে  
ঘেন্না করে, কিন্তু আমিও তাকে কম ঘেন্না করি না ।  
এই মুখসর্বশ্রু বাঙ্গালী মধ্যবিত্ত সমাজের ফুটানী বেশীদিন  
চলবে না । আমাদেরই মত সবাইকে হাতে কলমে কাজ  
করতে হবে ।

সরযু—একথাগুলো আমাকে শোনাবার কি কিছু দরকার ছিল বিশ্ব ?  
যাকে উদ্দেশ্য করে বল । তাকেই সামনাসামনি বলো ।

বিশ্ব—বলবো নিশ্চয়ই বলবো, একশোবার বলবো, আমি এখনই  
যাচ্ছি । ফিরতে দেয়ী হলে বাবাকে ভাবতে বারণ করো ।

মায়া—বিশ্বদা ।

বিশ্ব—কি মায়া ?

মায়া—লক্ষ্মীটি এত মাথা গরম করবেন না । মিথ্যে কথাটাটাটি  
না করে অজিতদাকে নিয়ে আনুন । ওমা ঐ তো অজিতদা  
( গম্ভীর মুখে অজিতের প্রবেশ ) ।

অজিত—সরযু, চল ট্যাক্সি নিয়ে এসেছি, কাউকে বল বাস্কেটা দিয়ে  
যাক ।

মায়া—কি হয়েছে অজিতদা, থোকা ভাল আছে ত ?

অজিত—( অশ্রুমনস্ক ভাবে ) হাঁ ভাল ।

মায়া—ও এলো না যে ?

অজিত—কেন আসবে ?

মায়া—শুনলাম, আপনি ওকে সন্ধ্যাবেলা নিয়ে আসবেন ।

অজিত—( সরযুকে ) কি দাঁড়িয়ে রইলে কেন ? চল ।

বিষ্ণু—কি ব্যাপার অজিতদা, মেজাজটা একটু রুক্ষ লাগছে ।

অজিত—সে তোমার দিদিকে জিজ্ঞেস কর না, উনি কিছু বলেননি  
বুঝি ?

সরযু—(দৃঢ়স্বরে) থাক, সে আলোচনার এখানে দরকার নেই ।

অজিত—তবে চলো, কতক্ষণ আর সঙের মত দাঁড়িয়ে থাকবে ?

সরযু—না আমি যাব না ।

অজিত—যাবে না, আমি নিজে নিতে এলাম আর তুমি মেজাজ  
দেখিয়ে ফিরিয়ে দিচ্ছ ?

বিষ্ণু—কি হ'য়েছে অজিতদা, আমি কিছু বুঝতে পারছি না ?

অজিত—বুঝেও তোমার কোন দরকার নেই, আমার বাপ মার সঙ্গে  
উনি ঝগড়া করে চলে এসেছেন ।

সরযু—আমি কারও সঙ্গে ঝগড়া করিনি ।

অজিত—ঝগড়া করনি আবার, তাদের মুখের উপর যা নয় তাই  
বলেছ, অফিস থেকে ফিরে সব শুনলাম । আর কিছু না  
হোক বয়সেও তো তাঁরা বড়, এভাবে অপমান করবার কি  
দরকার ছিল ।

সরযু—বলছিতো আমি কাউকে অপমান করিনি।

অজিত—তার মানে তাঁরা মিথ্যে কথা বলছেন?

সরযু—আমি কি করে জানবো, তাঁরা তোমায় কি বলেছেন।

অজিত—জানো সবই এখন আর ঝাকা সাজতে হবে না, দিন দিন তোমার মেজাজ বাড়ছে। কদিন আগে পর্যন্ত না ছিল চাল, না ছিলো চুলো, এখন ভাই হু'পয়সা রোজগার করছে তাই এত মেজাজ।

বিশু—অজিতদা আপনি কেন মাথা গরম করছেন? আপনি গিয়ে ভেতরে বহন, আমি দিদির সঙ্গে কথা বলে বুঝিয়ে এখনি আপনার সঙ্গে নিয়ে যাচ্ছি।

অজিত—আমি একমিনিট আর এখানে বসবো না, যেতে হয় ও এখনি চলুক। মার কাছে গিয়ে মাপ চাইতে হবে।

বিশু—দিদি, তুমি চলো না আমিও যাবো তোমার সঙ্গে।

সরযু—না, আমাদের ব্যাপারে তোমাকে আসতে হবে না বিশু।  
উনি এখন চলে যান পরে মাথাঠাঙা হলে আমি কথা বলবো। (প্রস্থানোত্তত)

অজিত—শুনে যাও সরযু, তুমি আমার বাড়ীর দবাইকে অপমান করেছ, আমাকে পর্যন্ত অপমান করতে তোমার বাঁধলো না।  
এর বোঝাপড়া আমি করবো, ছেড়ে দেবো না বলে দিচ্ছি।

সরযু—অপমানটা বুঝি তোমাদেরই গায়ে লাগে, আমাদের গায়ে লাগতে নেই।

অজিত—তোমাদের কি অপমান করা হয়েছে।

সরযু—এই নিয়ে তিনবার হলো, আমার বাবা নিজে গিয়ে বলে এসেছেন খোকাকে নিয়ে কদিন এখানে থাকার জন্তে,

নাতিকে তিনি কত ভালবাসেন, তোমরা সবাই জান, অথচ একবারও ওকে আসতে দিলে না। আমি এলেই দাড়াই কৈ দাড়াই কৈ, বলে আমার কাছে ছুটে আসেন। দিনের পর দিন মিথ্যে কথা বলে যাই। হয় কারুর অসুখ করেছে, না হয় ঠাকুরমার সঙ্গে বেড়াতে গেছে। আর আজ কিছু ভেবে না পেয়ে বলেছিলাম, তোমার সঙ্গে আসবে—

অজিত—আজকে খোকা আসবে একথা তো বলাই হয়নি।

সরযু—আসবে যে না,—সে কথাওতো কেউ বলেনি। বুড়ো মামুষ আজ সকাল থেকেই কতরকম ব্যবস্থা করছেন; তাঁরও যে নাতি একথা তোমরা ভুলে যাও কি করে? উঃ তোমার মার নেই কথাগুলো, এতটুকু স্নেহ, এতটুকু ভালবাসাও কি তার মধ্যে নেই!

অজিত—আঃ মার সম্বন্ধে এভাবে কথা বলবে না বলছি—

সরযু—এইটুকুতেই তোমার লাগলো আর আমার বাবার সম্বন্ধে যে রোজ হাজারটা কথা শুনতে হয়, তার জন্তেতো এতটুকু প্রতিবাদ কোনদিন করনি। আমার বাবা অফিসের কেরানী ছিলেন, আমার বাবা যৌতুকের সব কিছু দেননি, আমার বাবা মিথ্যাবাদী, আমার বাবা—

মায়ী—দিদি চুপ করো।

অজিত—না না ওকে বলতে দাও, কথা যখন উঠেছে তার নিষ্পত্তি হয়ে যাওয়া ভাল।

সরযু—নিষ্পত্তি আর কিসের হবে, খোকা তার মামার বাড়ী আসতে পারবে না, তার মামা মিস্ত্রী, থাকে বস্তীর মধ্যে, ছেলে নষ্ট



হয়ে যাবে। অথচ আমি তো দেখতে পাই, তোমার মার  
অস্ত্রায় আদরে আর সঙ্গদোষে—

অজিত—কার সঙ্গদোষে ?

সরযু—তোমার পিসিমার ছেলেগুলোকে দেখেছ, প্রত্যেকটা বান্দর,  
এতটুকু বয়েস থেকে বিড়ি-সিগারেট টানে, আর সিনেমার  
সামনে লাইন দেয়—তাদেরই মধ্যে খোকাকে মানুষ হতে  
হচ্ছে, কারণ তোমার মার ভাষায় তাদের চালচলো আছে,  
বংশ আছে।

বিশু—আমি বুঝতে পেরেছি দিদি, তুমি বাড়ীর ভিতরে যাও, আমি  
অজিতদার সঙ্গে কথা বলছি।

সরযু—তোদের আমি এতদিন বলিনি বিশু বলতে পারিনি বলে,  
আমার ছেলে আমার কথা শোনে না, ঠাকুমা তাকে সেই  
ভাবে মানুষ করেছে, ওর পিস্তুত ভাইদের সঙ্গে সিগারেটে  
টান দেয়, আমি কতদিন বলেছি ওরা শোনে না, আর কিছু  
বলতে গেলেই বাপ ভাই তুলে গালাগাল দেন, এইতো  
আমার সংসার। তবু বে কটা দিন এখানে আসি খানিকটা  
ভুলে থাকি।

বিশু—চলো চলো ভেতরে চলো দিদি, মায়া তুমি সঙ্গে যাও।

[ সরযু ও মায়ার বাড়ীর ভিতরে ]

অজিত—( একটু পরে ) আমি তাহলে যাই, ট্যান্সিটা দাঁড়িয়ে আছে।

বিশু—( পকেট থেকে একটা পাঁচ টাকার নোট বার করে ) এটা  
নিয়ে যান।

অজিত—( বিস্ময়ে ) কেন !

বিশু—( অযথা জোরে ) ট্যান্সি ভাড়া।

অজিত—তুমি আমাকে অপমান করছো।

বিশ্ব—বাবা যৌতুকের কি কি জিনিস দিতে পারেন নি তার কর্দ্দটা দিয়ে যাবেন, কালকেই আমি জিনিসগুলো দিয়ে আসবো।

অজিত—তুমি আমাকে টাকার গরম দেখাচ্ছ ?

বিশ্ব—(চাপা রাগে) চাঁদির জুতো ছাড়া তো আপনাদের মতো লোক শায়েস্তা হবে না।

অজিত—খবরদার এভাবে কথা বলবে না।

বিশ্ব—একশোবার বলব, দেড়শো টাকা মাইনের কেরানী বাপের আমলে দুবেলা হাঁড়ি চাপতো কিনা ঠিক নেই, এখনও বাজারের পাঁচ জায়গায় দেনা তাঁর আবার অভিজাত্যের বড়াই।

অজিত—সবাইকে বুঝি তোমার মতো মিস্ত্রী হতে হবে, ভাল করে বর্ণ পরিচয়টাও নেই, তিনি আবার লেকচার দিচ্ছেন—লোফার আর ভ্যাগাবণ্ড সব বন্ধু, বিশ্বদা বিশ্বদা করে মাথায় তুলেছে, আর উনি ভাবছেন আমি কি হনুরে।

বিশ্ব—কি হয়েছে আমি জানেন ?

অজিত—কি হয়েছে।

বিশ্ব—আপনার মত পাঁচটা লোককে মাইনে দিয়ে চাকর রাখতে পারি, যাদের কাজ হবে দু'বেলা আমার জুতো পালিশ করা।

অজিত—ভদ্রলোকের সঙ্গে কি করে কথা বলতে হয় তা পর্যন্ত শেখনি, আগে জানলে কেউ এ বাড়ীতে বিয়ে করে। লোক সমাজে মুখ দেখাতে পারি না।

বিশ্ব—তোমার আবার লোক সমাজ, যত বড় বড় কথা, আমরা মধ্যবিত্ত, আমাদের কালচার, না আছে পয়সার জোর, না

আছে খেটে খাবার ক্ষমতা, আর কদিন? তোমাদের  
ঐ কালতু অভিজাত্যকে সময়ের চাকা ছন্দুস করে  
দেবে।

অজিত—থাক থাক ঢের হয়েছে, আমি চললাম। এরপর আর কোন  
সম্পর্ক থাকতে পারে না, দরকার হলে আমি কোর্টে দেখা  
করবো।

বিশু—বাহো বা বাঃ-বাঃ—এ নাহলে তুমি পুরুষ মানুষ! বৌকে কষ্ট  
দাও, আর দরকার বুঝলেই কোর্টে গিয়ে নালিশ করো।  
মরি মরি, লেখাপড়া শেখার কি দামদ্রো!

অজিত—( রেগে ) আমরা তো আর তোমাদের মত ছোটলোক হতে  
পারি না, যে কথায় কথায় গালাগাল আর গায়ের জোর  
ফলাবো, আমাদের একটা সমাজ আছে, সংসার আছে।

বিশু—( ততো জোরে ) ঝাড়ু মারি সেই সমাজের মাথায়। ( রাগের  
মাথায় বাড়ীর ভিতরে প্রস্থান )।

অজিত—আঃ বিশু ( চিৎকার করতে গিয়ে তার মাথা ঘুরে যায়।  
নিজেকে সামলাতে বেঞ্চির উপরে গিয়ে পড়ে। চিৎকার  
শুনে দ্রুত হরিপদর প্রবেশ )।

হরি—কি হল? ( সাড়া না পেয়ে ) অজিত, অজিত ( গায়ে হাত দিয়ে  
একটু ভয় পেয়ে ) সরষু, মায়ী— [ সকলে দৌড়ে আসে ]

সরষু—কি হল বাবা?

হরি—অজিত হঠাৎ এরকম বসে পড়ল কেন?

সরষু—( অজিতের মাথার কাছে বসে ) মায়ী একটু জল নিয়ে আয়তো  
আর হাত পাখাটা, আবার বোধ হয় মাথাটা ঘুরে গেল—

হরি—কেন? এরকম কি প্রায়ই হচ্ছে নাকি?

সরযু—সেই নিয়েই তো আমার সঙ্গে ঝগড়া, শরীর ওর একেবারে  
ভেঙ্গে গেছে, ডাক্তার বলছে, বেশ কিছু দিন চেষ্টা যাবার  
দরকার, ভাল খাবার দাবার ওষুধপত্র ।

হরি—( ধরা গলায় ) আমাদের তো কিছুই বলিসনি ।

সরযু—উনি যে কিছুতেই বলতে দেবেন না । নারাদিন অফিস করেন,  
তারপর যান টিউসানী করতে, তাতেও তো সংসার চলেনা ।

[ বিষ্ণু ইতিমধ্যে, দরজার কাছে এসে দাঁড়ায় । মায়া জল নিয়ে  
আসে । মুখে চোখে জল দিয়ে সরযু হাওয়া করে ]

অজিত—( কনুই এ ভর দিয়ে ) আমি বাড়ি যাবো । একটা গাড়ী  
ডেকে দেবে ।

হরিপদ—এখন উঠো না । শুয়ে পড় অজিত, শুয়ে পড় ।

অজিত—না না আমায় বাড়ী যেতে হবে ।

হরি—তা হয় না, আমি এ অবস্থায় তোমায় কি করে ছেড়ে দেব ?

সরযু—না বাবা, তুমি ট্যাক্সি ডেকে দাও । আমি ওকে নিয়ে যাই ।  
একেতো শাশুড়ী আমায় দুচক্ষে দেখতে পারেন না । তার  
ওপর আমারই জন্মে আজ ওর শরীর খারাপ হল ।

হরি—তুইও বলছিন । তাই যাই । একটা গাড়ী ডেকে আনি ।  
মায়া তুই এখানে থাকিন । দরকার হলে বরং—

[ বিষ্ণু এতক্ষণ অস্থিরভাবে পাখচারি করছিল, হঠাৎ এগিয়ে এসে  
বলে । ]

বিষ্ণু—তোমরা সব পাগল হলে নাকি ? অজিতদা যেতে চাইছে  
বলেই তাকে গাড়ী করে পাঠিয়ে দিচ্ছ ? [ অজিতকে ]  
শুয়ে পড় বলছি—

( বিষ্ণুর অভিমান ভরা কণ্ঠস্বরে সকলেই বিস্মিত হল ) ।

অজিত—আমার বড্ড শরীর খারাপ করছে। আমি যাই।

বিশ্ব—তাতে হয়েছে কি, শরীর খারাপ কি কারুর করে না নাকি।

দামী দামী মেশিন রোজ বিগড়ুচ্ছে তো মানুষের শরীর।

মেরামত না করিয়ে তোমায় ছেড়ে দেবো ভাবছো। শোও।

[ বিশ্ব কাছে গিয়ে জোর করে অজিতকে গুইয়ে দেয়। ]

অজিত—বাবা, মা—

বিশ্ব—এত ভাবনার কি আছে, তাদেরও ধরে আনবো। মায়া, যা

একবার ডাক্তার বাবুকে খবর দে। দিদি তুমি বিছানা

তৈরী করো। আমি অজিতদাকে নিয়ে যাচ্ছি।

[ অজিত বেষ্টিতে গুয়ে, বিশ্ব তার কাছে হাটু গেড়ে বসে, মাথার কাছে সরষু আর মায়া, অদূরে হরিপদ বাবু, সকলেই চিন্তিত।

পর্দা নেমে আসে। ]

যবনিকা

## তৃতীয় অঙ্ক

[ আগের দৃশ্যের অনুরূপ। দিন কয়েক বাদের ঘটনা। সকাল বেলা হরিপদবাবু চিন্তিতভাবে পায়চারি করছেন, অদূরে মায়া দাঁড়িয়ে তারে কাপড় শুকুতে দিচ্ছে। ]

হরিপদ—বিশু এখনও ফিবুল না, কিষে হোল, যত রাজ্যের ভাবনা যেন আমার। এ বাড়ীটাও হয়ত পায়নি। আজকের দিনে একটা বাড়ী ভাড়া পাওয়া কি সোজা কথা। [ মায়াকে ]  
অজিত আজ কেমন আছে ?

মায়া—ভালই, আজ থেকে তো ডিম দেওয়া হচ্ছে। তবে মনটা খারাপ।

হরিপদ—মন তার ভাল থাকবে কি করে, ওর বাবা-মাই দেবে না। ছেলের অস্থখ শুনেও একদিনের বেশী দেখা করতে এল না। রোজ রোজ এ বাড়ীতে আসতে নাকি তাঁদের মান সম্মানে লাগে।

মায়া—ওরা যে কি রকম লোক বোঝা যায় না, কথাবার্তা ভালই বলেন, আমাদের সঙ্গে ব্যবহারেও কিছু খারাপ নয়।  
অথচ—

হরিপদ—বিশুই ওদের ঠিক বুঝেছিল, আমি বুঝিনি। কিছুতেই ও যেতে চাইত না। আমি ভাবতাম ছেলের বাড়ীর লোক, তারা একটু খাতির যত্ন চায়ই। কিন্তু কি আবদার

দেখদেখি, আলাদা বাড়ীতে যদি অজিতরা থাকে তবে ঠুঁরা আসবেন।

মায়া—আমি তো ভেবেছিলাম, বিপদা একথা শুনে তেলে-বেগুনে জলে উঠবেন। কিন্তু আশ্চর্য, কিছু না বলে সেইদিন থেকে বাড়ী খুঁজতে লেগে গেলেন।

হরিপদ—বিপদা ওর দিদিকে সত্যি ভালবাসে।

[ সরযুর প্রবেশ ]

সরযু—বাবা, ডাক্তারবাবু বলে গেছেন এই ট্যাবলেটটা আজ থেকে খাওয়াতে, এটা কি আনতে পাঠাবো?

হরিপদ—প্রেসক্রিপসানটা দাও, আমি নিয়ে আসব।

সরযু—আমি একটা কথা বলছিলাম, ( একটু থেমে ) বিপদা কেন এ পাগলামি করছে।

হরিপদ—কিসের?

সরযু—আবার একটা বাড়ী ভাড়া নেওয়া, নতুন করে সংসার পাতা।  
কত টাকা খরচ—

হরিপদ—তা না হলে যে তোমার খন্ডর স্বাস্থ্য আসতে পারছেন না।

সরযু—তঁরা নাই বা এলেন, সবই তো এখন জানাজানি হয়ে গেছে।  
এতদিন চেপে রেখেছিলাম তার তো আর দরকার নেই।

মায়া—থাক্ থাক্, এসব নিয়ে আর তুমি মাথা ঘামিও না, অজিতরা একা রয়েছে, যাও দেখ।

সরযু—কাল খুড়ো বলছিলেন, ঠুঁর অস্থখের জন্তে মায়ার বিয়ে এখন পিছিয়ে দেবেন। তুমি বারণ কর, তা যেন না করা হয়।

মায়া—তোমার কি হয়েছে বলতো? এই সব কথা নিয়ে এত ভাবছ কেন?

সরবু—যত আমি চাই না, আমার জন্তে আর কারুর অসুবিধে হোক,  
ততই যেন কিরকম হচ্ছে! আমার জন্তেই তোমাদের  
সকলের—

মায়া—এরকম করে কেন বল দিদি, আমাদের বুঝি কষ্ট হয় না?

[ হড়বড় করে সময়ের প্রবেশ। ]

সমর—এই তো কাকাবাবু, ও হো আপনারা সকলেই রয়েছেন।  
আজ সকালে উঠেই তিন জায়গায় গিয়েছিলাম, কিন্তু অসুবিধে  
হল না।

হরিপদ—হঁ বাড়ী খালি পাওয়া শক্ত।

সমর—না না, খালি হয় বই কি, কিন্তু ভাড়া পাওয়া যায় না। এই  
দেখুন না, নাক্সিভাইদের যে ফ্ল্যাট বাড়ীটা হয়েছে বড়  
রাস্তার মোড়ে, সেখানে তো একটা ফ্ল্যাট খালি রয়েছে।  
বিশুর এখানে ওরা গাড়ী-টাড়ী মেরামতও করায়। সব  
গুনেও ভাড়া দিতে চাইল না। বন্ধে, তোমরা মাছ মাংস  
খাও, অন্তদের অসুবিধা হবে।

হরিপদ—হাঁ, একটা ছুতো চাইতো—

সমর—ওখান থেকে গেলাম মুখুজ্যে বাড়ী, হরেরাম মুখুজ্যে,  
হাইকোর্টের এ্যাডভোকেট। তাঁর বাড়ীর একতলাটা খালি  
রয়েছে। ভদ্রলোক শ্রেফ বলে দিলেন, বাঙ্গালী ভাড়াটে  
আনাও যা, খাল কেটে কুমীর আনাও তাই। বাড়ী-ভাড়া  
নিয়েই ওরা রেন্টকন্ট্রোলে নালিশ করে ভাড়া দেওয়া বন্ধ  
করে দেয়, আর বাড়ী ছেড়ে যাবার সময় ইলেকট্রিকের ফিটিং  
থেকে জলের কল পর্যন্ত সমস্ত খুলে নিয়ে যায়।

মায়া—কলকাতায় থাকতে হলে আমাদের জন্তে এই বস্তীই ভাল।



সমর—তবে আমি এখনও আশা ছাড়িনি, আজই অফিস থেকে ফেরবার সময় আরও দু'জায়গায় ট্রাই নেব। বলা যায় না, কোথাও একটা লেগে যেতে পারে। আপনি তো জানেন, রেনপনসিবিলিটি নিয়ে আমি বসে থাকতে পারি না। আহা বেচারী দিদির জন্তে—

সরযু—আমার জন্তে আর তোমাদের করুণা করতে হবে না সমর, কষ্ট করে আর বাড়ী খোঁজার দরকার নেই।

সমর—( ব্যস্তভাবে ) না, না, এতে আর কি কষ্ট। আমি কথা দিচ্ছি 'দু' একদিনের মধ্যেই—

সরযু—দোহাই তোমাদের আমাকে ছেড়ে 'দাও, যথেষ্ট সহানুভূতি দেখিয়েছো, আর দরকার নেই। বাবা, তুমি ওকে বুঝিয়ে বল আমি বাড়ী চাই না, কিছু চাই না, আমার ভাগ্য নিয়ে আমাকে একলা থাকতে দাও। [ দ্রুত প্রস্থান ]

[ সকলে বিশ্বয়ে তাকিয়ে থাকে ]

হরিপদ—তুমি কিছু মনে কোর না সমর, আজ সকাল থেকেই সরযুর মেজাজটা খুব ভাল নেই। আর ভালো থাকবেই বা কি করে, রাজ্যের ঝামেলা।

সমর—না, না, আমি কিছু মনে করিনি।

হরিপদ—মায়া, আমি ওষুধটা নিয়ে আসি।

সমর—রাজেনবাবু নাকি একটা গোলমাল করবার চেষ্টা করছেন, তাই নিয়ে বিশ্বর সঙ্গে একটু কথা হওয়া দরকার।

হরিপদ—যা হবার তা হবেই, ওনিয়ে এখন আর আমি মাথা ঘামাই না।  
[ হরিপদের বাইরের দিকে প্রস্থান ]

সমর—বুড়ো একেবারে ভেঙ্গে পড়েছে।

মায়ী—না পড়াই আশ্চর্য। বিশেষ করে দিদির যে খত্তর বাড়ীতে  
এরকম অবস্থা তাতো আগে বুঝতে পারেন নি, এখন জানতে  
পেরে খুব আঘাত পেয়েছেন।

সমর—এ আর নতুন কি, এরকম একটু আধটু হয়েই থাকে।

মায়ী—এটাকে তুমি একটু আধটু বলছ?

সমর—তাছাড়া কি, বেশীর ভাগ সংসারেই দেখবে এই বিয়ের সময়  
দেওয়া-খোয়ার ব্যাপার নিয়ে গুগুগোল বাধেই। বিশেষ  
করে যেখানে খত্তর-খাণ্ডী বেঁচে থাকেন। মেয়ের বাড়ীর  
লোকেদেরও দেখেছি বাবা, একটু ফাঁকি মারার টেঙেন্সি  
থাকে।

মায়ী—কি রকম?

সমর—আমার মেজবৌদির কথাই ধরনা। ওর বাপের বাড়ীর অবস্থা  
এমন কিছু খারাপ নয়। এক ভাই পোষ্ট অফিসে ভালো  
কাজ করে। হলে হবে কি, বিয়ের সময় যা যা দেবে  
বলেছিল তা দিলে?

মায়ী—হয়ত কোন কারণে দিতে পারে নি, কিন্তু তা নিয়েতো আর  
তোমরা তার সঙ্গে ঝগড়া করছ না।

সমর—(হেসে) ঝগড়া করার কথা হচ্ছে না, তবে পাওনা জিনিস না  
পেলে তো মন খারাপ হয়ই। এই নিয়েই মনে কর খাণ্ডী  
যদি দুটো কথা বলে—

মায়ী—দেখ আমাকে আবার কথা শুনতে হবে নাতো, তাহলে কিন্তু  
আমি পালিয়ে যাব।

সমর—(হেসে) না, না, ভয় নেই। আজকে তো তাই বাবাদের  
মিটিং বসেছে এই দেওয়া-খোওয়ার ব্যাপার নিয়ে আর কি—

মায়ী—কোথায় এখানে ?

সমর—হাঁ।

মায়ী—না, না, সমরদা, please তুমি বারণ কর। এ বাড়ীতে অস্ব্থ  
বিস্ব্থ, এর মধ্যে আর ওনব কথা আলোচনা করা ঠিক  
হবে না।

সমর—তুমি কি আমায় বলছ বাবাকে বলবার জন্তে, ওরে বাবা, সে  
সাহস আমার নেই।

মায়ী—কেন, তুমি তো আর অন্ডায় কিছু বলছ না।

সমর—মায়ী তুমি এখনও ছেলে মানুষ, বাবাকে চেন না। এসব  
বিষয়ে কথা বলতে গেলে এই বুড়ো বয়েসে পাঁচ জনের  
সামনে কানমলা খেতে হবে।

মায়ী—কিন্তু এত তাড়াই বা কিসের। বাবা তো বিয়ে পেছিয়ে দেবেন  
ঠিক করেছেন।

সমর—(বিস্ময়) কেন ?

মায়ী—কেন আবার, অজিতদার এরকম অস্ব্থ, কারুর মন ভাল নেই।

সমর—ওঃ এই, তবে তো আমার বিয়েই হবে না। আজ অজিতদার  
অস্ব্থ, কাল আব কারুর কিছু হবে, তখন ?

[ জগদীশ ও ভোলার প্রবেশ ]

সমর—কি খবর জগদীশ আর কিছু শুনলে ?

জগদীশ—ঠিক বুঝতে পারছি না। কিন্তু রাজেন মল্লিক কিছু একটা  
মতলব করছে, কত রকম গুজ গুজ ফুস ফুস—

ভোলা—আমি বলে দিছি জগদীশ, এ সবে মধ্য ঐ সতীনটা  
আছে। ও হতভাগা এখানে আসা থেকে যত গুণগোল,  
যেমন চোরের মত তাকায়।

সমর—তাহলে বিপদে সব খুলে বল ।

জগদীশ—সেই জন্তেই তো এলাম । বিপদা কই ?

মায়া—বাড়ী নেই ।

ভোলা—সেই তো হয়েছে । বিপদ, কদিন থেকেই বিপদকে আর  
পাচ্ছি না । কোন কাজেই এখন ওর মন নেই ।

সমর—তাহলে ।

জগদীশ—সতুদা থাকলে এ সময়ে যা হোক কিছু একটা করত । উনি  
তো আপনাদের বন্ধু, একবার বলুন না আসবার জন্তে ।

সমর—কি জানি বাবা, আজকাল কি মেজাজে আছে ।

জগদীশ—আগের চেয়ে, অনেক ভাল, সাবিত্রীদি চলে যাবার পর  
থেকে গুম হয়ে বসে থাকলেও আগের মত আর মাতলামি  
করেন না ।

সমর—তার মানে ? সতু আজকাল মদ খায় না ।

ভোলা—হয়ত খায়, কিন্তু অনেক কম ।

মায়া—সমরদা, আপনি তাহলে একবার যান, সতুদাকে সব বুঝিয়ে  
ডেকে নিয়ে আসুন । এর ওপর যদি কারখানায় কোন  
গোলমাল বাধে, তাহলে আর বিপদার মাথার ঠিক থাকবে  
না । মাহুঘটা যে সারাদিন কি ভীষণ পরিশ্রম করছে—

সমর—তাই না হয় একবার যাই । [ জগদীশ ও ভোলার প্রস্থান,  
সমর বেরিয়ে যেতে গিয়ে ফিরে এসে ] সাবিত্রীর কোন  
খবর জান নাকি ? সতু যদি জিজ্ঞেস করে ?

মায়া—না, সে আর আসেনি ।

সমর—মানে বলছিলাম, বিপদ কাছ থেকে কিছু শুনেছ ?

মায়া—না, ও বুঝি আবার নাসের কাজ করছে ।

সমর—ও, সতুটার জন্তে দুঃখ হয়। একটা রাস্তার মেয়েকে, যাকগে,  
বলি গিয়ে একবার, বিস্তুটাও যেমনি, আর একটা মেয়ে  
খুঁজে পেল না?

মায়ী—ওসব কথা এখন থাক, তুমি বরং চট করে যাও একবার  
ঘুরে এস।

[ সমরের প্রস্থান। মায়ী জিনিসপত্র গুছিয়ে নেয়। সরযুর প্রবেশ ]  
সরযু—সমর চলে গেল?

মায়ী—হাঁ দিদি।

সরযু—বেচারী। মিছিমিছি কতগুলো কড়া কথা বললাম কি ভাবল  
জানি না।

মায়ী—ও কিছু ভাবেনি দিদি, তোমার এই রকম মনের অবস্থা—  
সরযু—সবচেয়ে খারাপ লাগছে এই ভাবতে যে আমারই জন্তে সবাই  
ব্যতিব্যস্ত, কি যে পোড়া কপাল আমার।

মায়ী—আবার তুমি ঐ রকম বলতে শুরু করেছে। সবাই তোমাকে  
কত ভালবাসে, বিস্তুদাকে তো জানি—

সরযু—ঐ জন্তেই তো আরও কষ্ট পাচ্ছি। ও যে কি রকম পাগল  
ছেলে তোরা কেউ জানিস না।

[ বিস্তুর প্রবেশ ]

বিস্তু—দিদি, সব ঠিক করে এলাম।

মায়ী—বিস্তুদা বাড়ী পেয়েছেন?

বিস্তু—হাঁ, বেশ সুন্দর ফ্ল্যাট, তিনখানা ঘর। দক্ষিণে একটা ছোট  
বারান্দা, আলো হাওয়া খুব। তোমাদের পক্ষে বেশ ভালই  
হবে।

মায়ী—কতদূরে?

বিশ্ব—কাছেই। আমি ঠিক করে এলাম সামনের সোমবার থেকে  
ওখানে থাকা হবে। কাল আর পরশুর মধ্যে ঘরগুলো  
চুনকাম করে দিতে বলেছি।

সরযু—তুই কি পাগলামী করছিস বিশ্ব, মিছিমিছি এতগুলো টাকা—

বিশ্ব—থাক, থাক, তোমাকে আর দিদিগিরি ফলাতে হবে না।

বাক্স প্যাটরা সব গোছাও দিকি। আর ও বাড়ী থেকে

কি কি আনতে হবে বোল, এক সময় গিয়ে নিয়ে আসব।

তাছাড়া ওঁদেরও খবরটা দেওয়া দরকার।

সরযু—যাই, ওঁকে গিয়ে বলি, উনিও খুব খুসী হবেন—

বিশ্ব—আর তুমি, তুমি খুসী হওনি ?

সরযু—আমার খুসী অখুসীতে কার কি এসে যায়।

[ বাড়ীর ভিতর প্রস্থান ]

মায়া—বিশ্বদা, জগদীশ আর ভোলা এসেছিল। ওরা কানায়ুষো

শুনছে রাজেন মল্লিক আপনার গ্যারেজে কোনরকম

গোলমাল পাকাবার চেষ্টা করছে।

বিশ্ব—সে তো আজকের কথা নয়, চেষ্টা করছে অনেকদিন থেকে।

বিশেষ করে সতু চলে যাবার পর বেশ একটা প্যাচ খেলেছিল,

যাতে Workerরা আমার উপর চটে যায়। তবে কয়েকটি

খুব ভালো ছেলে আছে বলে বিশেষ সুরিখে করতে পারে নি।

মায়া—তবু কিঙ্ক সাবধান, রাজেন মল্লিকের কথা যা শুনি, ও খুব

সোজা লোক নয়। [ বিশ্ব যুহ হাসে ]

মায়া—হাসছেন যে, আমার কথা শুনছেন না বুঝি ?

বিশ্ব—শুনছি বই কি। হাসছি এই ভেবে যে তোমরা কত সহজে ভয়

পাও। মানুষের সবচেয়ে বড় শত্রু হল ভয়। আমরা কিসের

না ভয় পাই, ছোটবেলায় মনে পড়ে অন্ধকার জায়গায়  
 যেতাম না, ভূতের ভয় পেতাম। চিড়িয়াখানায় গেলে  
 বাঘ-ভাল্লুকের কাছে যেতাম না, সেখানেও ভয়। বত বড়  
 হতে লাগলাম সঙ্গে সঙ্গে ভয়ও যেন বাড়তে লাগল।  
 সমাজের ভয়, সংসারের ভয়, সত্যের সাহনাসামনি দাঁড়াবার  
 ভয়। তার ওপর (হেসে) মরবার ভয় তো আছেই—

মায়ী—বিশ্বদা, কি সব আবোল তাবোল বকছেন?

বিশ্ব—আবোল তাবোল বলিনি মায়ী, আমি আজকাল খুব চেষ্টা করি,  
 ভয় না পাবার চেষ্টা। কিন্তু পারছি কই? যদি না হয়, যদি  
 সে আমার কথা না রাখে। যদি সে ভুল বোঝে, এই যদি,  
 যদি, যদি—এক এক সময় মনে হয় যেন সমুদ্রের ঢেউয়ের মত  
 এই যদিগুলো ঘাড়ে এসে পড়ে। উঃ, সে যেন একটা ভয়ের  
 বিভীষিকা।

মায়ী—কিন্তু রাজেন মল্লিক তো সত্যিই আপনার ক্ষতি করতে পারে  
 তাতে ওর কত সুবিধে। আপনার ছাড়া আর তো কারুর  
 গ্যারেজ নেই এখানে।

বিশ্ব—ক্ষতি তো করতেই পারে। বিশেষ করে আমাদের এই  
 পোড়াদেশে লাভ লোকসান বিচার করে তো কেউ ক্ষতি  
 করে না। তার খুসী সে ক্ষতি করবে। তুমি তার কি  
 করতে পার?

মায়ী—তাই বলে চুপ করে বসে থাকবেন?

বিশ্ব—(জোরে হেসে) ভয় পেয়েছো, না? ভাবছো বিশ্বদা বুঝি  
 পাগল হয়ে গেল।

[ অজিত ধীরে ধীরে বেরিয়ে আসে ]

মায়া—একি অজিতদা, তুমি এখানে আসছো কেন ?

অজিত—আমি একটু বাইরে এসে বসি বিস্তু।

বিস্তু—নিশ্চয়ই, টায়ার্ড লাগবে না তো ?

অজিত—বাড়ীর মধ্যে বসে বসে আর ভালো লাগছে না। এখানটা বেশ ফাঁকা।

বিস্তু—তোমাকে কিন্তু আগের চেয়ে অনেক ভাল দেখাচ্ছে। মুখ চোখ সাদা হয়ে গিয়েছিল।

অজিত—শরীরটা অনেকদিন থেকেই বিগড়েছে, রেইট নেওয়া আর হয়ে ওঠে নি।

বিস্তু—এবার কিন্তু তোমাকে আর ছাড়া হচ্ছে না, তিন মাস বন্দী করে রাখা হবে।

অজিত—(হেসে) শুনলাম আমার জেলখানাও তুমি ঠিক করে ফেলেছ।

বিস্তু—হঁ। অজিতদা, দেখলাম তাতে সুবিধেই হবে। এ হবে তোমাদের আলাদা সংসার। সেখানে আমরাও যেতে পারব। আবার তোমার বাড়ীর লোকেরাও আসতে পারবেন।

অজিত—(স্নান হেসে) আলাদা সংসারই বটে, শুধু টাকাটা যোগাবে তুমি।

বিস্তু—একথা কেন বলছো ?

অজিত—(দীর্ঘশ্বাস ফেলে) না, কিছু বলিনি।

বিস্তু—(কাছে এগিয়ে গিয়ে) মন খারাপ করলে চলবে না অজিতদা, চিন্তারফুল থাকতে হবে। এক মাসের মধ্যে দেখবে, এই তাগড়া শরীর করে দেব।



অজিত—(বিশুর হাতটা ধরে) এ অসুখটারও বোধ হয় দরকার ছিল, এইতেই বুঝতে পারলাম কে আমার আত্মীয়, কে আমার পর। সেদিন অনেক কড়া কড়া কথা বলেছি তোমায়, আমায় ক্ষমা কোর।

বিশু—(হেসে) কি সেক্ষেপেটাল কথা বলছে, সেদিন তোমাকেও কি আমি ছেড়ে কথা বলেছি নাকি? আমারই তো আগে ক্ষমা চাওয়া উচিত—

অজিত—না বিশু, এ অসুখে শুয়ে শুয়ে রোজই আমি ভাবছিলাম। সেদিন তোমাকে যা বলেছিলাম সবই আমি রাগের মাথায় বলেছি। জান তো। ক্রোধ চণ্ডাল। কিন্তু তুমি যা বলেছিলে সে সবটাই অভিমানের। এর মধ্যে আকাশ পাতাল তফাৎ। তাই আমি অসুস্থ হতে তুমি এত সহজে কাছে টেনে নিতে পারলে, যা হয়ত আমি পারতাম না।

বিশু—আঃ অজিতদা, তুমি চুপ করবে? দিদিটাও যা হয়েছে এতটুকু সামলাতে পার না। উনি বেরুতে চাইলেই বেরুতে দিচ্ছে, কাঁদতে চাইলেই কাঁদতে দিচ্ছে, এরকম করে কি কেউ রুগীকে রাখে? না, না, আর তোমার বস। ঠিক হবে না। চল তোমাকে ঘরে শুইয়ে দিই।

অজিত—তাই চল, ভিতরে বসেই না হয় একটু গল্প করি।

[সকলের বাড়ীর ভেতর প্রস্থান। অন্তর্দিক থেকে হরিপদ ও দেবব্রতের প্রবেশ।]

দেবু—খুব সাবধান হরিদা, অচেনা দোকান থেকে কখনও ওষুধ কিনো না, কি খা-তা জিনিস দেবে, তাতে রোগ সারা তো দুব্বর কথা অন্ত রোগ এসে না চেপে ধরে।

হরি—না, এ কতকগুলো ট্যাবলেট।

দেবু—ট্যাবলেট তো কি হয়েছে, ট্যাবলেটে বুঝি ভেজাল চলে না  
ভেবেছো? আরে বাবা এখন যা কিছু কিনবে সব ভেজাল।  
তেল, ঘি, দই, মিষ্টি থেকে শুরু করে লেখাপড়া, ধর্মকর্ম,  
চাকরির বাজার এমন কি কালচার পর্যন্ত সবকিছু ভেজালে  
ভরে গেছে, খুব সাবধান হরিদা, খুব সাবধান।

হরি—খুড়োর সঙ্গে আজকেই তো তোমার পাকা কথা হবে। তাড়া-  
তাড়ি সেরে ফেল, শুভকাজে বিলম্ব করা বুদ্ধিমানের কাজ নয়।

দেবু—খুড়ো ভাবছে তোমাদের কথা, বলছিল অজিত ভায়ার অসুখটা  
একটু কমলে না হয়—

হরি—না, না, সে নিয়ে কিছু ভাববার নেই দেবু, একটা বাড়ী পেয়েই  
ওরা সেখানে চলে যাবে, যাই ওষুধটা সরযুকে দিয়ে আসি,  
তুমি একটু বস, এখুনি নিশ্চয় ওরা এসে পড়বে।

দেবু—আরে ঠিক আছে, তুমি ভেতরে যাও, আমি বসছি।

[ হরিপদ ভেতরে চলে গেলে দেবব্রত খাটিয়ার ওপর বসে, কাগজ  
উন্টে পান্টে দেখে। একটু পরেই নিত্যানন্দের প্রবেশ।

[ দ্বিধা জড়িতপদে এগিয়ে এসে দেবব্রতের কাছে বসে। ]

দেবু—কাকে চাই?

নিত্য—চাই, হেঁ, হেঁ, চাইবো আর কাকে?

দেবু—তাহলে!

নিত্য—তাহলে কি?

দেবু—ইঠাৎ পায়ের ধুলো পড়লো যে।

নিত্য—আরে ছি ছি সে বলে আর লজ্জা দেবেন না, খুড়ো আমায়  
ডেকে পাঠিয়েছে কিনা, তাই এসেছি।

দেবু—খুড়ো, আমাদের খুড়ো আপনাকে ডেকে পাঠিয়েছে।

নিত্য—হেঁ হেঁ, খুড়ো অবশ্য আসলে আমারই, ডেকে পাঠিয়েছেন নিশ্চয়  
তা নাহলে আর আসবো কেন ?

দেবু—অঃ—

নিত্য—বিশ্বাস হচ্ছে না বুঝি, এই যে গুঁর চিঠি পরিষ্কার বাংলায়  
লিখেছেন, আজ সকাল ন'টার সময় এখানে আসবার জন্তে—

দেবু—হুঁ ( একটু থেমে ) ব্যাপারটা কি ?

নিত্য—হেঁ হেঁ: আপনাদের আশীর্বাদে খুড়ো মশাই বোধহয় আমার  
প্রতি সদয় হয়েছেন।

দেবু—তার মানে !

নিত্য—বোধহয় ঐ সাত হাজারের পাঁচ হাজার টাকা আমার মেয়েদের  
নামে লিখে দেবেন।

দেবু—অঃ। ( চমকে ) এঁা কি বল্লেন ?

নিত্য—ঐ পাঁচ হাজার টাকা আমার মেয়েদের নামে—

দেবু—বামন হয়ে আপনার দেখছি চাঁদে হাত দেবার ইচ্ছে। বলা  
নেই, কওয়া নেই, খামখা পাঁচ হাজার টাকা আপনার মেয়েকে  
দিতে যাবে কেন মশাই ?

নিত্য—দেবে না মানে আলবাৎ দেবে। আমার মেয়েদের দেবে না  
তো কাকে দেবে শুনি ?

দেবু—কাকে আবার, তার নিজের মেয়েকে।

নিত্য—তার মেয়েকে, পুরো সাত হাজার টাকা তার মেয়েকে।

দেবু—নিশ্চয়, সাত কেন আরও বেশী টাকা পেলে সে টাকাও দিত।

নিত্য—হুঁ, একটা কথা বলে দিলেই হ'ল, তাহলে খুড়ো আজ আমার  
ডেকে পাঠালো কেন ?

দেবু—কেন আবার, বলতে যে একটা পয়সাও আপনাকে দেবে না।

নিত্য—আচ্ছা লোক তো মশাই, আমাকে রীতিমত নার্ভাস করে  
দিচ্ছেন। কিন্তু আমাকে ভাগিয়ে দিয়ে আপনার কি লাভ  
শুনি? টাকা যদি গুঁর মেয়েই পায়—

দেবু—তাহলে টাকাটা আমার ঘরেই আসবে। আপনি শুনলে খুসী  
হবেন যে মায়া আমার ভাবী পুত্রবধু।

নিত্য—ওঃ তবে আপনিই তাকে এই সব কুপরামর্শ দিচ্ছেন, ছিঃ ছিঃ কি  
স্বার্থপর লোক মশাই আপনি।

দেবু—আহা মেজাজ গরম করছেন কেন?

নিত্য—মেজাজ গরম করব না, কি বলছেন মশাই আমার হকের  
টাকা।

[ পঞ্চাননের প্রবেশ ]

পঞ্চা—কি হোলরে নেত্য, কার হকের টাকা! !

নিত্য—এই যে পঞ্চাদা, এই লোকটা কি বলছে শোন। মায়ার সঙ্গে  
ছেলের বিয়ে দিয়ে উনি খুড়োর সাত হাজার টাকা সিন্দুকে  
ভরছেন।

পঞ্চা ( মুহূ হেসে ) তাই নাকি Congratulation Mr. কি যেন নামটা  
আপনার ?

নিত্য—তার মানে তুইও তাই চাস নাকি !

পঞ্চা—না চাইলেই বা উপায় কি বল ?

দেবু—Thats the correct spirit. ওকে এটা ভাল করে বুঝিয়ে  
দিন তো, খুড়ো হঠাৎ তার নিজের মেয়েকে বঞ্চিত করে ওকে  
টাকাটা দিতে যাবে কেন ? এতে তার কি লাভ ?

নিত্য—আপনার সিন্দুকে টাকাটা দিয়েই বা ওর লাভ কি ?

পঞ্চা—যাক্ যাক্, তোমরা আর ঝগড়া কোর না—ব্যবস্থা সব পাকা  
হয়ে গেছে।

নিত্য—তার মানে ?

পঞ্চা—খুড়ো টাকা তোকেও দিচ্ছে না, মায়াকেও না—

নিত্য—কি বলছিস !

পঞ্চা—ঠিকই বলছি, খুড়ো আমার প্রস্তাবে রাজী হয়েছে।

দেবু—প্রস্তাবটা একবার শুনতে পাই কি ?

পঞ্চা—হাঁ, হাঁ টাকা থাকলে যে কোন ভদ্রলোক যা করে তাই। স্মৃতি,  
শ্রেফ স্মৃতি।

নিত্য—স্মৃতি !

পঞ্চা—নিশ্চয় যতদিন বলসীতে জল থাকবে ঢালো আর খাও।  
নিজেকে enjoy করো। ওমর খৈয়াম হয়ে যাও। প্রথমে  
খুড়ো রাজী হয়নি, আহা, বেচারীর দোষই বা কি। poor  
man কোথা থেকে স্মৃতি করার মর্ম বুঝবে। কিন্তু  
সেদিন যেই, ছবি এনে দেখিয়েছি, ব্যাস একেবারে  
ফ্ল্যাট।

নিত্য—খুড়ো তোকে বলেছে ?

পঞ্চা—বলেছে মানে লিখেছে, এই তার চিঠি, আজ সকাল নটায়  
আসতে বলেছে—সব পাকা কথা হয়ে যাবে।

নিত্য—আমাকেও তো আসতে লিখেছে।

দেবু—( রেগে ) আমাকেও লিখেছে।

পঞ্চা—আপনাদের কোন চান্স নেই মশাই, কেটে পড়ুন।

দেবু—( উঠে দাঁড়িয়ে ) বাজে বকবেন না মশাই। বিয়ের এদিকে সব  
পাকাপাকি হয়ে গেল আর আপনি বলছেন—

নিত্য—সে যাই বলুন মশাই, আমি বলে রাখছি খুড়ো শেষ  
পর্যন্ত আমাকেই দেবে। Sincerety-র একটা দাম  
নেই?

পঞ্চা—বেশ তো, আসুন বাজী?

নিত্য—বাজী।

দেবু—বাজী।

পঞ্চা—পাঁচ টাকা।

নিত্য—দশ টাকা।

দেবু—পঞ্চাশ টাকা।

[ খুড়ো ঘর্মাক্ত কলেবরে হস্তদন্ত হয়ে ঢোকে ]

খুড়ো—আবে ছি, ছি, বড্ড দেবী হয়ে গেল। কি করবো। বল, রাস্তায়  
এত ভিড়। অনেকক্ষণ বসিয়ে রেখেছি তো!

দেবু—সেজন্তে হুঃখ নেই, এখন দয়া করে এই ছুটি মৃত্তমানকে ভাগাও  
দেখি, যাতা বকর বকর করে আমার মাথা গরম করে  
দিচ্ছে।

পঞ্চা—বাঃ বাঃ বাঃ আমবা মাথা গরম করে দিলাম, আর আপনি যে  
এতক্ষণ রাজকন্ডার সঙ্গে গোটা রাজহুটা বাগাবার চেষ্টা  
করছিলেন, সেটা বুঝি খুব শ্রুতিমধুর?

দেবু—খবদার বলছি।

নিত্য—কি মশাই এত চোখ রাঙাচ্ছেন। (চট করে খুড়োকে প্রণাম  
করে) খুড়ো আমার যে সে লোক নয়, এক আঁচড়ে বুঝে  
নিয়েছে কে সত্যিকারের ভালো আর কে মন্দ। (খুড়োর  
হাতটা ধরে) বলনা খুড়ো, তোমার ভয় কি? পাঁচ হাজার  
আমাকে দিচ্ছ কি না?

পঞ্চা—খবর্দার নিভু, মকেল ভাগাবিনা বলছি। (খুড়োর অন্ত হাত ধরে)  
মাইরি খুড়ো বলে দাও তো ওদের, তুমি আমার কথায় রাজী  
হয়েছে কিনা।

দেবু—উঃ Impertinent, তুমি কি করে ঐ বান্দর দুটোকে সহ  
করছ ?

পঞ্চা—মুখ সামলে কথা বল বলছি।

নিত্য—এক চড়ে মাথা ঘুরিয়ে দেব।

খুড়ো—আহা হা মাথা ঠাণ্ডা কর, সব বোস আমায় কথাটা বলতে  
দাও—( হরিপদকে আসতে দেখে ) হরি ভাই, এগিয়ে এস।  
আমি যা নিদ্ধান্ত করেছি তা তোমাদের সবাইকে  
জানিয়ে দিই।

হরি—হাঁ আপনারা ওকে বলতে দিন, বসুন, বল খুড়ো—

খুড়ো—দেখ, ঐ টাকাটা পাবার পর থেকেই আমি ভাবছিলাম।  
অনেক কথাই ভাবছিলাম। মিথ্যে বলবো না, মেয়ের  
বিয়ের কথাও ভাবছিলাম, এই ভাইপোদের কথাও  
ভাবছিলাম কিন্তু সবচেয়ে বেশী ভাবছিলাম আমার ঐ  
পিসীর কথা—

নিত্য ও পঞ্চা—( একসঙ্গে ) পিসী।

খুড়ো—হাঁ, ভাবলাম পিসীর জন্তে তো জীবনে কিছু করিনি অথচ  
ভদ্রমহিলা অতগুলো টাকা আমায় দিয়ে গেলেন। মনে হ'ল  
ওঁর প্রতিও তাহলে আমার একটা কর্তব্য আছে।

দেবব্রত—তা আছে বইকি ?

খুড়ো—তাই ভাবলাম বুড়ীর আত্মা কি করলে খুসী হবে। এটা ওটা  
পাঁচরকম ভাবলাম।

হরিপদ—হ্যা, হ্যা, তুমি আমাকেও জিজ্ঞেস করেছিলে বটে, আমি  
বললাম তুমি গয়াতে গিয়ে পিণ্ড দিয়ে এস।

দেবু—আবার গয়াতে কেন ? অতদূর। মিছি মিছি পরস্য খরচ, তার  
চেয়ে এই বুড়িগঙ্গাতে—

খুড়ো—অনেকে অনেক কিছু বললে, কিন্তু মন সায় দিল না। শেষ পর্যন্ত  
ভাবলাম এক কাজ করলে হয়। বুড়ী তো তার সব সম্পত্তি  
রামকৃষ্ণ মিশনে দিয়ে গেছে, আমিও না হয় এই সাত হাজার  
টাকা মিশনেই দিয়ে দিই, তাহলে বুড়ীর আত্মা—

দেবু—তুমি কি পাগল হলে নাকি ?

পঞ্চা—ছি, ছি, ছি, ছি।

খুড়ো—সেই কথা বলবার জন্তেই আজ তোমাদের ডেকে পাঠিয়েছি।

দেবু—আরে রামঃ রামঃ, তুমি কি বলছো খুড়ো ?

নিত্য—ওসব কথা চিন্তাও কোর না।

খুড়ো—না না, চিন্তা করার আর কিছু নেই। আমি টাকাটা এই মাত্র  
দিয়ে আসছি।

সকলে—তার মানে ?

খুড়ো—এই যে রসিদ—

সকলে—রসিদ !

দেবু—চালাকি করবার আর জায়গা পাওনি ? তার মানে এ বিয়ে-  
টিয়ের ব্যাপার সব ভুঁয়ো ?

খুড়ো—ভুঁয়ো কেন হবে, মেয়ের বিয়েতো আমি কোথাও দিইনি।  
লগ্ন ঠিক কর, বিয়ে দেব।

দেবু—বা, বা, শুধু হাতে শাঁখা আর সিঁচুর দিয়ে, উঃ কত বড় বিটলে  
শয়তান, এতদিন আমাকে নাজেহাল করে এখন দিবি।



সাধু সেজে বসেছেন। আচ্ছা আমিও তোমায় ছাড়বো না,  
এ অপমানের উচিত শাস্তি দেবো।

নিত্য—চুপ করুন আপনি। ও টাকার ওপর আমাদের right  
আছে, খুড়ো কি করে তা দিয়ে দেয় শুনি, খুড়োর অবর্তমানে  
আমার আর পঞ্চাদার আধাআধি করে পাবার কথা।

খুড়ো—আহা, আমি তো বর্তমান।

নিত্য—ঘোড়ার ডিমের বর্তমান, তুমি একটা ভূত, একটা অদ্ভুত।

পঞ্চা—কিন্তু যাই বল, খুড়োর sense of humour আছে। খুব  
dramatic করেছে, সত্যি বলছি খুড়ো—

দেবু—shut up, তোমাদের জগ্লেই তো ওর মাথাটা খারাপ হয়ে  
গেল।

পঞ্চা—মিথ্যে আমার ওপর রাগ করছেন, মাইরি বলছি আমার তেমন  
দুঃখ হচ্ছে না। ক'দিন ক্ষুণ্ণি করা যেত, হ'ল না, তা আর  
একটা মস্কেল পাকড়ে নেব।

দেবু—আমিও দেখে নেব, কি রকম করে ওর ঐ কেলো মেয়েটার  
বিয়ে হয়, সারাজীবন আইবুড়ো থাকতে হবে।

[ গোলমাল শুনে দরজার কাছে বিত্ত, মায়া, সরষু এসে দাঁড়ায় ]

নিত্য—আমি case করবো, খুড়োর বুজঝুঁকি বার করছি, অন্তের  
টাকায় দানচস্তর খুলে বসেছেন। ত্রাকামি করবার আর  
জায়গা পাননি? জেলে ঢোকাবো, ঘানি টানাবো, চলে  
আয় পঞ্চাদা। আসুন দেবুবাবু, ও শালাকে আমি দেখে  
নেব। তবে আমার নাম নিত্যানন্দ সোম।

[ নিত্যানন্দ, পঞ্চানন ও দেবব্রতের প্রস্থান ]

হরিপদ—এটাকি ঠিক হল খুড়ো?

খুড়ো—আমাকে একটু সময় দাও হরিভাই। নিজেই এখনও ঠিক কিছু বুঝতে পারছি না। এই সব চেষ্টামেচিতে মাথাটা যেন আরও গোলমাল হয়ে গেল।

মায়া—( কাছে এগিয়ে গিয়ে ) বাবা।

খুড়ো—( বুকের কাছে টেনে নিয়ে ) মা। ( মায়াকে কাঁদতে দেখে )  
সত্যের পথ বড় কঠিন, কত সময় যে নিষ্ঠুর হতে হয়।  
আমার মন যা করতে বল তাই করেছে, হয়ত তোর অনেক ক্ষতি করলাম।

মায়া—বাবা ! ( খুড়োর বুকে মুখ লুকিয়ে )

হরি—যাও খুড়ো ঘরে গিয়ে একটু বিশ্রাম করগে, মায়া, তোমার বাবাকে সঙ্গে করে নিয়ে যাও।

খুড়ো—হ্যাঁ, একটু বিশ্রামই দরকার, চল যাই।

[ মায়া খুড়োকে নিয়ে চলে যায় ]

সরযু—এ আবার খুড়োর কি ঢং, কথা নেই বার্তা নেই অতগুলো টাকা দিয়ে দিল, এখন মায়ার কি হবে বলতো ?

হরিপদ—খুড়ো কি না ভেবে কিছু করেছে।

সরযু—এর মধ্যে ভাবাবাবির কি আছে, কি আর ভাবতে পারে তাই বলনা, একেবারে পাগলামি।

হরিপদ—মাথাটা ঠাণ্ডা হোক, তখন না হয় কথা বলবো।

সরযু—ছি, ছি, ছি।

বিষ্ণু—তোমরা এত মাথা ঘামাচ্ছ কি নিয়ে, মায়ার বিয়ের জন্ত তো।  
বিয়ে ওর ঠিকই হবে।

সরযু—কার সঙ্গে ?

বিষ্ণু—কেন, সময়।

সরযু—হ্যাঁ, দেবু কাঁকা আর বিয়ে দেবে কিনা। ওই সাত হাজার  
টাকার ভগ্নেই তো সম্বন্ধ করেছিল।

বিশু—সমর তো আর ঐ টাকা দেখে মাঝাকে ভালোবাসেনি। আমি  
বলছি তোমায়, দরকার হলে বাপের অমতেই সমর বিয়ে  
করবে।

সরযু—দেখ, হলেই ভাল।

[ সতীনের প্রবেশ ]

সতীন—বিশুদা, একবার চলুন।

বিশু—কোথায় ?

সতীন—সেই মদন ড্রাইভার এসেছে আপনাকে ডুকছে।

বিশু—এখানে পাঠিয়ে দেন।

সতীন—ও বলছে, কি বিশেষ দরকার আছে। এখানে কথা বলার  
সুবিধে হবে না।

বিশু—তাহলে এখন থাক। ( চিন্তিত মুখে ) আচ্ছা চলো বেশী দূরে  
নয়ত ?

সতীন—না, না, রাজেন মল্লিকের গ্যারেজের মোড়ে, চায়ের দোকানে  
বসে আছে।

বিশু—দিদি, কেউ এলে বল আমি এখুনি আসছি—

[ বিশু ও সতীনের প্রস্থান ]

হরিপদ—যাক, বিশু যখন বাড়ী ঠিক করে ফেলেছে আন্তে আন্তে সব  
গোছগাছ করে ফেল। চোঁকি চেয়ার একটা ক্যাম্প খাট,  
সবই একটাই পড়ে আছে। ওগুলো তো নিয়ে যাবেই, দরকার  
হলে খাটিয়াও নিয়ে যাও।

সরযু—না না, অত জিনিসপত্র কি হবে।

হরিপদ—তাহলে দেখ কারুর অস্থবিধে না হয়। ধর ওনারা যদি এসে  
কেউ থাকেন তার ব্যবস্থা রাখা চাই তো, তাছাড়া আমরাও  
তো যাব—

সরযু—আমি সব গুছিয়ে নিচ্ছি।

হরিপদ—অজিত বলছিল কি একটা কথা বলবে আমাকে।

সরযু—হ্যাঁ, ওর অফিসে একবার যাওয়া দরকার।

হরিপদ—বেশ তো আর্মিই না হয় দেখা করে আসব, কি বলতে  
হবে জিজ্ঞেস করে আসি।

[ বাড়ীর ভেতরে প্রস্থান, একটু পরে সাবিজীর প্রবেশ ]

সাবিজী—( নীচু গলায় ) বিসুদা, বিসুদা—

সরযু—কে ?

সাবিজী—বিসুদা বাড়ী আছে ?

সরযু—না নেই। কি দরকার ( সাবিজীকে দেখে ) ও, তুমি !

সাবিজী—দিদি, আমার একটু দরকার ছিল।

সরযু—( শুকনো গলায় ) ওতো এখন নেই, কখন ফিরবে জানি না।

সাবিজী—তাহলে বরং আপনাকেই বলে যাই।

সরযু—আমাকে ?

সাবিজী—হ্যাঁ, এই ফলগুলো ঠুকে দেবেন।

সরযু—বিসুকে, বেশ দিয়ে দেব, কিছু বলতে হবে ?

সাবিজী—আমি বলছিলাম ঠুকে মানে আমার স্বামীকে—

সরযু—( আশ্চর্য হয়ে ) সতুকে !

সাবিজী—( হেসে ) হ্যাঁ দিদি।

সরযু—তার মানে ?

সাবিত্রী—যা অনিদ্রম করে মাহুঘটা। একটু ফলটল খাওয়া দরকার।

জানেন তো যা কিপ্পণ, নিজে কখনও খাবে ভেবেছেন ?

সরযু—আশ্চর্য, সতুর জন্তে তোমার এত দরদ ?

সাবিত্রী—সে কি কথা, হিঁহুর মেয়ে সোয়ামীর জন্তে দরদ থাকবে না ?

সরযু—থাক্ থাক্, আমার সঙ্গে আর ইয়াকী করতে হবে না। দরকার

থাকে ফলগুলো ওখানে রেখে যাও। আমি সতুকে

দিয়ে দেব।

[ সাবিত্রী ফলগুলো রাখতে গিয়ে চূপ করে দাঁড়িয়ে থাকে। ]

সরযু—কি হোল, ইঁ করে দাঁড়িয়ে রইলে কেন ? বনিবনা তো অনেক

সংসারেই হয় না, তাই বলে নিজের স্বামীকে ছেড়ে কেউ

চলে যায় ?

সাবিত্রী—আমি চলে না গেলে ওঁর যে দুঃখের শেষ থাকত না দিদি !

সরযু—কি বলছে সাবিত্রী !

সাবিত্রী—জানেন তো আমাকে বিয়ে করার জন্তে ওঁকে কত রকম

লাঞ্ছনা সহ করতে হয়েছে। বাড়ীতে সকলের সঙ্গে ঝগড়া

করে বস্তীতে এসে উঠলেন। কিন্তু ওঁর মনটা যে ভারী-নরম,

সারাক্ষণই বাড়ীর কথা ভাবতেন। মা, দাদা, ছোট বোন—

( সাবিত্রী চোখের জল মোছে )।

সরযু—তাতো হবেই, রক্তের সম্বন্ধ কি ভুলে থাকা যায় !

সাবিত্রী—সত্যি দিদি। বেশীর ভাগ সময়ই অন্তমনস্ক হয়ে থাকতেন।

রাত্রে অনেকদিন ঘুমুতেন না। এনিয়ে আমাদের মধ্যে

যে কথা কাটাকাটি হয়নি তা নয়, কিন্তু ফল হল

বিপরীত।

সরযু—কেন ?

সাবিত্রী—উনি ভাবতেন জীবনটাই ওঁর নষ্ট হয়েছে, কারণ আমাকেও  
তিনি স্থখী করতে পারেন নি।

সরযু—সেটা কি মিথ্যে, তুমি কি স্থখী হয়েছিলে ?

সাবিত্রী—দিদি, যাকে প্রাণের চেয়ে ভালবাসি, তার কাছে থাকার  
চেয়ে আর বড় স্থখ কি আছে ?

সরযু—সাবিত্রী।

সাবিত্রী—আমি ভেবে দেখলাম আমার জন্মেই ওঁর দুঃখ, আমার  
জন্মেই ওঁর কষ্ট, তাই আমি যদি সরে যাই, তাহলে উনি  
আবার আগের জীবন ফিরে পাবেন। সেই জন্মেই আমার  
চলে যাওয়া—

সরযু—কিছু মনে ক'রনা সাবিত্রী, আমি তোমার দিদির মত তাই  
জিজ্ঞেস করছি, যদি সত্যকেই তুমি ভালবাসতে তবে কেন  
পাঁচটা পুরুষের সঙ্গে হৈ হৈ করে ঘুরে বেড়াতে। আমি  
বলছি তোমায়, সেই জন্মেই সত্য মদ খেতে শুরু করল,  
উচ্ছ্বল হয়ে গেল।

সাবিত্রী—আমি তো তাই চেয়েছিলাম দিদি।

সরযু—তার মানে ?

সাবিত্রী—তা না হলে উনি আমায় ছেড়ে দিতেন না। উনি যে আমায়  
কতখানি ভালবাসেন। আমি চেয়েছিলাম আমার ওপর ওঁর  
বিতৃষ্ণা জাগুক। হনও তাই, শুধু উনি কেন, আপনারা  
সকলেই ভাবলেন আমি খারাপ মেয়ে, এক বিস্মদা ছাড়া।  
ঐ মানুষটাকে আমি কিছুতেই ফাঁকি দিতে পারলাম না।

সরযু—তুমি কি মনে কর সত্য আবার আগের মত কাজকর্ম করবে, সেই  
পুরোন জীবন ফিরে পাবে ?

সাবিত্রী—এখন সে মদ খাওয়া ছেড়ে দিয়েছে, সময় মত খাওয়া দাওয়া করে ।

সরযু—শুনলাম ওর মার সঙ্গে দেখা করে এসেছে ।

সাবিত্রী—দেখবেন খুব শিগ্গিরি কাজে যোগ দেবে ।

সরযু—আর তুমি ?

সাবিত্রী—আমার কথা ছেড়ে দিন । মাল্লুষের সেবা করে বাকী জীবনটা কাটিয়ে দেব । এইটুকুট চাই, যার জন্তে সব কিছু ছেড়ে দিলাম, সে যেন স্মৃতি হয় ।

[ জগদীশ, ভোলা ‘দিদি’ ‘দিদি’ বলে ডাকতে ডাকতে ঢোকে, সাবিত্রীকে দেখে থতমত খেয়ে যায় । মেয়েরা দুজনেই তখন চোখ মুছেছে । ]

সরযু—কি খবর ভাই ?

জগদীশ—সতুদা আসছে ।

সরযু—সত্যি ?

ভোলা—হ্যাঁ দিদি, আজ থেকেই বোধ হয় কাজ শুরু করবে । ও এখন অনেক ভাল আছে ।

জগদীশ—বিশুদ্ধ কই ? ওকে খবরটা দিলে খুব খুসী হবে ।

সরযু—বিশুদ্ধ তো সতীন ডেকে নিয়ে গেল ।

দু’জনে—সতীন কোথায় ?

সরযু—বল্লেতো রাজেন মল্লিকের গ্যারেজের কাছে, কে এক মদন ড্রাইভার এসেছে ।

জগদীশ—সর্বনাশ ।

সরযু—কি হোল জগদীশ ।

জগদীশ—নিশ্চয়ই ঐ রাজেন মল্লিকের কাজ, বুঝেছিস ভোলা,  
বিশ্বদাকে প্যাচে ফেলবার চেষ্টা করছে। চল আমরা  
যাই।

সরযু—কি বলছিস, ভাল করে বল না।

জগদীশ—ভাল করে আর কি বলব, নিজেরাই কি সঠিক কিছু জানি।  
তবে কানাঘুষো শুনছিলাম।

ভোলা—চোরাই মালের দায়ে ফেলে বিশ্বদাকে ওরা বেইজ্ঞ করবার  
চেষ্টা করছে।

সরযু—সে কি ?

জগদীশ—আর সময় নেই, চল ভোলা আমরা যাই ( দু'জনের প্রস্থান )।

সরযু—কি সব আবোল তাবোল বলে গেল, বিশ্বটাও যা গোঁয়ার-  
গোবিন্দ ভয় হয় ওর না কোন ক্ষতি করে।

সাবিত্রী—কার নাম বলে দিদি, মদন ড্রাইভার। কালো রং, বড়  
ঝুলপী, থাকী হাফ প্যান্ট পরা—

সরযু—আমি তাকে চোখে দেখিনি।

সাবিত্রী—আমি দেখেছি একটা চটের থলে এখানে ছিল ? ( অল্প খুঁজে  
বস্তুটা দেখে ) এই যে।

সরযু—কি আছে ওতে ?

সাবিত্রী—গাড়ীর কতগুলো জিনিস, ঐ মদন ড্রাইভার এখানে রেখে  
গিয়েছিল। কেন জানি না, সেই দিনই আমার লোকটাকে  
ভালো লাগেনি। হয়ত এর পেছনে কোন মতলব আছে।

সরযু—তাহলে এখন কি করি ?

সাবিত্রী—এগুলো এখন সরিয়ে ফেলতে হবে।

সরযু—কোথায়, বাড়ীর ভেতরে নিয়ে যাই ?



সাবিত্রী—না, না, বাড়ীর ভেতরে না, সময়ও নেই, হয়ত ওরা এখন  
এসে পড়বে। আপনি আমাকে একটু সাহায্য করুন,  
যতগুলো পারি গাছের তলায় পুঁতে দিই।

[সাবিত্রী সেই পাথরগুলো সরিয়ে ফেলে ব্যস্তভাবে সরষুর  
সাহায্যে জিনিসগুলো রাখতে থাকে।]

সরষু—কি করছ সাবিত্রী! ঠাকুরের গায়ে হাত দিওনা পাপ হবে।

সাবিত্রী—যা হবার তা আমারই হবে দিদি, আপনার কোন ভয়  
নেই। আমি যাকে দেবতা বলে জেনেছি তাকে বাঁচাতে  
গিয়ে যদি পাথরের দেবতার অভিশাপ কুড়োতে হয়, তাই  
না হয় কুড়োব।

[আবার পাথরগুলো চাপা দিয়ে ফলগুলো খাটিয়ার ওপর রেখে  
সেই ঝুড়িতে বাকী ছ'তিনটে মাল তুলে নিয়ে ওপরে কাপড় চাপা  
দেয়।]

সাবিত্রী—আমি এখন যাই দিদি, হয়ত ওরা এখন এসে পড়বে।

সরষু—এস বোন, আমার এত দিনের ভুল ধারণা—

সাবিত্রী—সে কথা এখন থাক, কিন্তু দোহাই আপনার, উনি যেন না  
জানতে পারেন, এ ফলগুলো আমি দিয়ে গেছি, আপনিই  
তাকে খাবার জন্তে দেবেন। আর বিশুদ্ধাকে বলবেন আর  
একদিন সময় করে এসে তাঁকে প্রণাম করে যাব। [প্রস্থান]

[স্তব্ধ বিষয়ে সরষু দাঁড়িয়ে থাকে! লঘুপায়ে মায়ার প্রবেশ]

মায়ী—কে বেরিয়ে গেল দিদি?

সরষু—সাবিত্রী।

মায়ী—সাবিত্রী। হঠাৎ, বিশুদ্ধার খোঁজ করতে বুঝি, না আর কিছু  
হতলবে।

সরযু—মেয়েটাকে আমরা যা ভাবতাম তা নয়।

মায়া—তার মানে ?

সরযু—সে অনেক কথা, তবে এটুকু জেনে রাখ ও নিজের নামের  
মর্যাদা অক্ষুন্ন রেখেছে।

[ জগদীশ ব্যস্তভাবে ঢোকে ]

জগদীশ—সর্বনাশ হয়েছে দিদি, যা ভেবেছিলাম তাই—

সরযু—কি হয়েছে ভোলা—

জগদীশ—রাজেন মল্লিক পুলিশের লোক নিয়ে সার্চ করতে আসছে।

মায়া—কেন ?

জগদীশ—রাজেন মল্লিক নালিশ করেছে ওদের গ্যারেজ থেকে মাল  
চুরি গেছে। ওদের সন্দেহ বিশ্বদাকে।

মায়া—কি ভয়ানক লোক !

সরযু—বিশ্ব কোথায় ?

জগদীশ—ওদের সঙ্গেই আসছেন।

সরযু—এখন কি হবে ?

জগদীশ—ঘাবড়াবার কি আছে, এতো সব মিথ্যে কথা। এখানে  
একটা জিনিসও পাবে না।

[ বাইরে গুণ্ডাগোলের আওয়াজ ]

জগদীশ—আপনারা বাড়ীর ভেতরে যান, আমি তো আছি কোন ভয়  
নেই।

[ উত্তেজিত ভাবে বেশ কয়েকজনের প্রবেশ। মায়া আর সরযু  
পেছনের দরজা দিয়ে মুখ বাড়িয়ে শোনে। ]

রাজেন—আমি কি মিথ্যে কথা বলছি, এই এদের ব্যবসা, খালি চুরি।

আমার কোম্পানীতেই তো আগে কাজ করতো। সব

ঘাৎ ঘোৎ জানে, প্রায়ই এটা ওটা সরে যায় কিছু বলি না,  
কিন্তু এবার প্রায় ৫০০ টাকার মাল।

বিশু—সে মালের গায়ে আপনার নাম খোদাই করা আছে নাকি ?

রাজেন—নাম না থাকলে কি হবে নম্বর থাকবে না ? ক’দিন আগে  
মাত্র দোকান থেকে এসেছে, এই সব cash memo,  
শুকবারের কেনা মাল, এই দেখুন সব নম্বর।

ইনেসপেক্টর—আমি তাহলে সার্চ করার অর্ডার দিই, জমাদার যাও,  
সব জায়গা ভালো করে দেখো। গ্যারেজের কোন জায়গা  
বাদ দিও না।

[ কথামত জমাদার সার্চ শুরু করে। ব্যস্তভাবে সতুর প্রবেশ ]

সতু—( রাজেনের কাছে এসে ) ব্যাপার কি রাজেন বাবু। এসব কি  
শুরু করেছেন ?

রাজেন—( অমায়িক হেসে ) কিছুই নয়, খানাতল্লাসী।

সতু—ছি, ছি, ছি, সামনা সামনি যুদ্ধে হেরে গিয়ে এখন পেছনে ছুরি  
মারবার চেষ্টা করছেন।

রাজেন—( ইনেসপেক্টরকে ) বাড়ীর ভেতরটা অন্দর মহল বলে বাদ  
দেবেন না, কে বলতে পারে হয়ত ঘরের মধ্যে লুকিয়েছে।

সতু—আর যদি কিছুই না পাওয়া যায় ? বলে রাখছি রাজেন বাবু  
আপনি আগুন নিয়ে খেলা করছেন।

বিশু—আঃ সতু মিথ্যে ঝগড়া করিস না।

সতু—কেন করবো না, একশোবার করবো।

রাজেন—কিসের এত চোখ রাঙাচ্ছে হে, আমার ভালমন্দ আমি  
নিজেই খুব ভালো জানি। নিজের ভালো দেখো—

সতু—কি বলছেন আপনি ?

রাজেন—বুঝতে পারছো না, কচি খোকা নাকি? বিত্ত, বিত্ত,  
একেবারে হরিহর আত্মা। সেই তো শেষপর্বন্ত বো নিয়ে  
হাওয়া—

সতু—চুপ কর তুমি জানোয়ার।

রাজেন—কেন চুপ করবো, সত্যি কথা বলবো তো আর ভয় কিসের?

[‘দেখবে ভয় কিসের’ বলে সতু রাজনকে প্রায় মারতে যায়। বিত্ত  
তাকে ছাড়িয়ে আনে।]

বিত্ত—আজকের দিনটা থাক সতু, তারপর এর বোঝাপড়া হবে।

জগদীশ—সতুদা ওরা বাড়ীর ভেতরে ঢুকছে, অজিতদা অস্থস্থ—

রাজেন—ওরকম অস্থস্থের ভান সবাই করে, রুগী দেখবে হয়ত চোরাই  
মালের ওপরই গুলে আছে।

সতু—ইনেসপেক্টর সাহেব, ওকে মুখ সামলে কথা বলতে বলুন,  
নইলে—

রাজেন—নইলে কি বল না শুনি?

ইনেসপেক্টর—রাজেনবাবু এদিকে শুনুন—(কানে কানে) কৈ মশাই  
কিছু তো পাওয়া গেল না।

রাজেন—কিন্তু আছে নিশ্চয়, বিত্তকে ডেকে নিয়ে যাবার সময়ই সতীন  
দেখে গেছে, বস্তাটা ঐ গাড়ীর কাছে ছিল।

ইনেসপেক্টর—আশ্চর্য তাহলে সরালো কে? যাতে ও সাবধান  
করে দিতে না পারে, তাই সঙ্গে করে নিয়ে এসেছি। ছি,  
ছি, এ বড় কাঁচা কাজ করলেন রাজেন বাবু, আমাদের এখন  
থানায় কৈফিয়ৎ দিতে হবে।

রাজেন—কি করে বুঝবো যে ভোজ বাজীর মত বস্তাটা উড়িয়ে  
দেবে।

ইনসপেক্টর—না, না, এ বড় অজ্ঞায়। আপনার জন্তে আমি বিলী  
false position এ পড়ে গেলাম। বামাল সমেত  
ধরাপড়ার কথা।

জমাদার—না স্তার সন্দেহজনক কিছু পাওয়া গেল না।

ইনসপেক্টর—হুঁ তাহলে আমরা চলি, বিস্তবাবু মাপ করবেন,  
আপনাকে মিছিমিছি বিরক্ত করলাম।

বিশু—আপনি আপনার কর্তব্য করেছেন।

ইনসপেক্টর—রাজেন বাবু আমরা চলি, report দিতে হবে।

সতু—নমস্কার।

ইনসপেক্টর—নমস্কার ( ইনস্পেক্টর ও জমাদারের প্রস্থান )

[ রাজেন বাবুকে যেতে দেখে ]

সতু—ওরে, ওরে সব রাজেন বাবুকে প্রণাম কর, ওঁর পায়ের ধুলো  
পড়েছে আমাদের গ্যারেজ আজ ধন্য হল।

রাজেন—আচ্ছা, আমি দেখে নেব।

সতু—কত আর দেখাবে দাছ এবার গিয়ে নিজের বাড়ীর ভেতরটা  
সামলাও।

রাজেন—কি, যত বড় মুখ নম্র তত বড় কথা। আমার বাড়ী তোলা।

সতু—বাড়ী কেন? পারলে তোমার চোদ্দ পুরুষ তুলবো, শালা  
কেউটের বাচ্চা।

রাজেন—খবর্দার বলছি।

সতু—খবর্দার আবার কি? তোমাদের মত লোকের মুখে আমরা  
থুথু দিই। ( থুথু দেয় )

রাজেন—বেয়াদপ, বেল্লিক কোথাকার ( দ্রুত প্রস্থান )

[ সকলের হো হো করে হাসি সরষু, মায়া বেরিয়ে আসে : ]

সরযু—ওরা চলে গেছে ?

অনেকে—গেছে ।

বিষ্ণু—কি করে বুঝলে, বস্তুটা তোমরা সরালে কোথায় ?

জগদীশ—বস্তু, কোন বস্তু !

বিষ্ণু—সে কি ! তবে কে সরালে ! ভোলা, সতু—

সতু—কি বলছিস বুঝতে পারছি না ।

বিষ্ণু—আমি চলে যাবার পর কে ছিল এখানে, দিদি !

সরযু—আমি বলছি, তুই এদিকে আয় ।

বিষ্ণু—বল, বল, কি করে তুমি বুঝলে ?

সরযু—সব বলছি তুই ভেতরে আয় ।

[ সরযু বিষ্ণুকে নিয়ে ভিতরে যায় । ]

সতু—ওঃ রাজেন মল্লিকটা কি কম শয়তান । কি রকম গোলমালে  
ফেলেছিল ।

জগদীশ—ভাগ্যিস আপনি এসে পড়েছিলেন, আমরাতো কি করবো  
ভেবেই পাচ্ছিলাম না ।

ভোলা—এসব সতীনের কাজ । আমি তোদের বার বার বল্লাম  
ওটা রাজেন মল্লিকের চর, তোরা শুনলি না । এখন  
হলো তো ?

সতু—সে হতভাগা গেল কোথায় ? একবার ধরে আননা দেখি ।  
পালিয়ে না যায় ।

জগদীশ—পালাবে কোথায়, সব জায়গায় আমাদের লোক আছে ।

[ নেপথ্যে—গোলমাল, সতীনকে ধরে একজনের প্রবেশ । ]

একজন—এই যে সতুদা, হতভাগাটাকে ধরে এনেছি । লাফিয়ে পালিয়ে  
যাচ্ছিল, কত বড় বদমায়েশ ?

সতীন—আমাকে মাপ করুন, বুঝতে পারিনি, না বুঝে—

সতু—বুঝতে পারিনি, কচি খোকা।

সতীন—মদন ড্রাইভার আমার দেশের লোক ; ওষে রাজেনবাবুর  
বুদ্ধিতে এমন কাজ করবে।

জগদীশ—আর আজ যে বিশ্বদাকে ডেকে নিয়ে গেলে—

সতু—কত টাকা দেবে বলেছে ?

সতীন—সত্যি বলছি আমি টাকাকড়ি কিছু নিইনি।

ভোলা—তবে কি ভালবেসে করেছ, হারামজাদা শুয়ার।

জগদীশ—মেরে ওর পিঠের চামড়া তুলে দেব। তবে আমাদের  
শান্তি— [ বিশ্ব প্রবেশ ]

সতু—এই যে বিশ্ব এ হতভাগাকে কি করা যায় বলতো ?

বিশ্ব—আমি তোমায় বিশ্বাস করে কাজে নিয়েছিলাম, এই তার  
প্রতিদান, বা বা শুধু কটা টাকার জন্তে ? ( দীর্ঘশ্বাস ফেলে )  
ওকে ছেড়ে দাও—

ভোলা—কি বলছেন বিশ্বদা, ওকে একটু শিক্ষা দিয়ে দিই—

বিশ্ব—ছুচো মেরে হাতে গন্ধ করে কি লাভ। টাকা, টাকা—টাকা  
যে মাছুষের কত সর্বনাশ করছে। ( থেমে ) যা ছেড়ে  
দিলাম, আব এমুণো হসনি— ( সতীনের প্রস্থান )

বিশ্ব—সত্যি আশ্চর্য এ ভাবে যে ছাড়া পাব ভাবিনি। পুলিশ ষ্টেসনে  
বসেই ভেবেছিলাম, এবার আমায় রাজেন মল্লিক সত্যি-  
সত্যিই বোকা বানালা।

বিশ্ব—ভোলা, জগদীশ, তোরা যারে, বাড়ীতে যা, বরং সন্ধ্যাবেলা  
আসিস।

সতু—হ্যাঁ হ্যাঁ, তোরা যা।

[ ভোলা জগদীশের পশ্চান ]

সতু—এবার থেকে একটু সামলে চলিসরে বিত্ত, যা তা লোককে  
কাজে ঢোকানু। কার কি মতলব কে বলতে পারে।

বিত্ত—আমারও যে দোষ নেই তাতো নয়, অত্যায়ে প্রত্নয়  
দিয়েছিলাম। সতীনের কথায় মালগুলো রাখতে গেলাম  
কেন। তাই এই দুর্ভোগ—

সতু—শালারা আমাদের গ্যারেজ ভাঙবে, গ্যারেজ। এতো শুধু  
আমাদের গ্যারেজ নয়, এ আমাদের মান, আমাদের  
ইজ্জৎ।

বিত্ত—সতু তুই ফিরে এসেছিস, এই ভেবেই আমার আনন্দ হচ্ছে।

সতু—কেন, তুই কি ভেবেছিলি আমি আর ফিরব না।

বিত্ত—চল চল, ভেতরে চল। দিদি, খাবার ব্যবস্থা কর, সতু আজ  
আমার সঙ্গে থাকবে।

[পেছনের দরজা দিয়ে দুজনে বাড়ীর ভেতর ঢোকে। মঞ্চ  
অন্ধকার হয়ে আসে। ক্রমে চাঁদের আলো ফুটে ওঠে, বাড়ীর ভেতর  
থেকে সতু আর বিত্তর প্রবেশ, কাঁধে হাত দিয়ে।]

বিত্ত—সত্যি আমি ভয় পেয়েছিলাম, তোকে যখন মত্ত অবস্থায় দেখতাম  
ভাবতাম হয়তো এই ভাবেই তোর জীবনটা নষ্ট হয়ে যাবে।  
মদ আর মদ। সারাদিনে তুই কত মদ খেতিস বলতো?  
এখন একেবারেই ছেড়ে দিয়েছিস?

সতু—একদম ছুঁই না।

বিত্ত—আশ্চর্য এ রকম পারলি কি করে?

সতু—অভিনয় করছিলাম।

বিত্ত—কিসের অভিনয়?

সতু—মাতালের।



বিশ্ব—কেন ?

সতু—কেন আবার, যাতে সাবিত্রী আমাকে স্বেচ্ছায় ছেড়ে চলে যায়,  
তাই আর কি—

বিশ্ব—কি বলছিস্ সতু। আমি তো কিছু বুঝতে পারছি না—

সতু—হ্যাঁ, এই গাড়ীটা কতদিন আটকে রয়েছে বলতো, কালকেই  
হাত লাগাতে হবে।

বিশ্ব—সাবিত্রীর কথা কি বলছিলি ?

সতু—ওসব শুনে কি হবে, কাজে কর্মে লেগে গেছে, দেখবি ও দিব্যি  
উন্নতি করবে। ওর রূপ আছে, গুণ আছে ভাবনা কি ?

বিশ্ব—তুই কিন্তু সাবিত্রীকে বুঝতে পারিস্ নি, ও তোকে সত্যিই  
ভালবাসে—

সতু—ভালবাসে, একথা তুই আমাকে বলছিস্, আমি জানি না ?

বিশ্ব—সতু !

সতু—ওর জীবনের দুঃখ স্বরূপ হল, আমার সঙ্গে বিয়ে হবার পর  
থেকে। এই বস্তীতে এসে থাকতে হ'ল, অভাব, অনটন,  
পাওনাদারের তাড়া। ছিঃ ছিঃ সত্যি অত ভাল মেয়েটার  
আমি সর্বনাশ করোঁছ।

বিশ্ব—থাকগে সতু ওসব কথায় আর কাজ নেই।

সতু—আমি দেখলাম ও আমাকে এত ভালবাসে, কিছুতেই ছেড়ে যেতে  
পারবে না। অথচ গেলে ওর উন্নতি হবে অনেক। আমি  
তাই মদ খেতে শুরু করলাম। সারারাত বাইরে কাটাতে  
লাগলাম। যাতে ও মনে করে আমি কোন খারাপ জায়গায়  
যাতায়াত করছি। আমি যা চেয়েছিলাম তাই হোল, আমার  
থেকে ওর মন ক্রমশঃ দূরে সরে গেল।

বিশ্ব—এ তুই কি বলছিলিস সতু, শুধু সাবিত্রী তো নয়, আমরা সকলেই  
যে তোকে ভুল বুঝেছি। কত মিথ্যে অপবাদ দিয়েছি,  
অপমান করেছি।

সতু—খুব ভাল করেছিলিস। তা না হলে ও কিছূতেই যেতো না। আমি  
শুধু চাই সাবিত্রী স্ত্রী হোক বড় হোক।

বিশ্ব—তুই বস সতু, নে একটা লেবু খা।

সতু—তাই খাই, সাবিত্রী আমাকে ফল খাওয়াতে এত ভালোবাসতো  
পয়সার অভাবে সে বেচারী খাওয়াতে পারেনি। (একটু থেমে)  
তোকে কিন্তু ঠকিয়েছেরে বিশ্ব।

বিশ্ব—কেন ?

সতু—লেবুটা পচা।

বিশ্ব—তাই নাকি ছাড়িয়ে দেখতো।

সতু—না, ওপরে দাগ পড়লেও ভেতরটা পরিষ্কার। (মুখে দিয়ে) না  
বেশ মিষ্টি।

[ সময়ের প্রবেশ ]

সমর—আমাকে ডেকে পাঠিয়েছিলি বিশ্ব ?

বিশ্ব—হ্যাঁ, কি ঠিক করলি ?

সমর—কিসের ?

বিশ্ব—বিয়ের।

সমর—না, মানে ঠিক করার আর কি আছে।

বিশ্ব—দেবু কাকার সঙ্গে কথা বলেছিলিস ?

সমর—বলিনি, এই গুণ্ডগোল হৈ হৈ, তার মধ্যে কখন আর কথা হবে ?  
তাছাড়া বলেই বা কি লাভ, বাবাতো মত দেবেনা জানিই।

বিশ্ব—বাবা মত দেবেনা বলে এতদূর এগিয়ে তুই বিয়ে করবিনা ?

সমর—করবোনা কি বলেছি? হ'বার থাকলে সেতো হবেই। যার  
সঙ্গে যার ভবিতব্য সেকি কেউ আটকাতে পারে।

[ ইতিমধ্যে মায়া পেছনের দরজা দিয়ে বেরিয়েছে। ]

মায়া—সমরনা, শুনে যান। (সমর ভয়ে এগিয়ে যায়) এই নিন  
আপনার দেওয়া গয়নার সেট।

সমর—আহা ওটা থাকনা।

মায়া—না, কোন রমক খুটে জিনিস আমি রাখি না। যান এদিকে  
আর আসতে হবে না।

[ মায়ার দ্রুত প্রস্থান। সমর একটু চুপ করে থাকে। ]

বিশ্ব—(বিরক্ত স্বরে) আর দাঁড়িয়ে রইলে কেন? যাও নির্ভয়ে  
তোমার পৈত্রিক সম্পত্তি ভোগ করগে।

সতু—(উঠে পড়ে) চল্ সমর, আমি তোরা সঙ্গে একটু কথা বলতে  
চাই। আমি ঘুরে আসছিরে বিশ্ব।

[ সমর ও সতুর প্রস্থান। বিশ্ব চুপচাপ বসে থাকে একটু পরে  
খুড়োর প্রবেশ ]

খুড়ো—শরীর ভালো আছে তো বিশ্ব?

বিশ্ব—এসো খুড়ো, বসো।

খুড়ো—আঃ বেশ চান্দনী রাত। বোধহয় পূর্ণিমাই হবে। কি  
ঠাণ্ডা আলো।

বিশ্ব—কিন্তু খুড়ো এটা কি ঠিক হল?

খুড়ো—কিসের কথা বলছিস?

বিশ্ব—এই যে সাত হাজার টাকা, এক কথায় দান করে দিলে। যা  
বুঝলাম সমর বোধ হয় বিয়ে করবে না। হঠাৎ এরকম  
কেন করলে বলতো খুড়ো?

খুড়ো—হঠাৎ আর কি—এই টাকাটা পাওয়ার পর থেকেই ভাবছিলাম তুমি বললে বিশ্বাস করবে না বিশ্ব ভাই। রীতিমত আমার কপাল কুঁচকুতে আরম্ভ করেছিল। বাবা Barometre দেখেই বুঝে ফেললাম—আমাকে অসুখে ধরেছে। টাকার অসুখ।

বিশ্ব—( হেসে ) ও তাই বল।

খুড়ো—হাসির কথা নয় বিশ্ব। তা না হলে এ রকম গোলমাল হয়। এ যেন মাথার গোলমাল। টাকা পেয়েই ভাবলাম মেরের বিয়ে দেবো। দেবত্রতর ছেলের সঙ্গে সম্বন্ধ করলাম। অথচ দেখ ৭০-মানুষটাকে কোনদিন আমার ভালো লাগতো না। এতদিনের ধারণাই সব আমার পালটে যেতে লাগলো।

বিশ্ব—এর মধ্যে তুমি এত কথা ভেবে ফেলেছো খুড়ো ?

খুড়ো—আমি অনেক ভেবে দেখেছি। ঐ চাঁদ আর টাকায় কত মিল। চাঁদও গোল, টাকাও গোল। চাঁদও রূপোলী, টাকাও রূপোলী।

বিশ্ব—তারপর।

খুড়ো—শিশু চাঁদে হাত দিতে চায়। মানুষ টাকায় হাত দিতে চায়। কিন্তু চাঁদেও কেউ বাস করতে পারে না। টাকাতেও কেউ বাস করতে পারে না।

বিশ্ব—তার মানে তুমি বলছো চাঁদ আর টাকা একই জিনিস ?

খুড়ো—নারে, বাইরে ওদের মিল থাকলে কি হবে, ভেতরে যে গভীর অমিল। টাকার কি গরম বলতো ? এই কদিনেই জলে পুড়ে মরছিলাম। কিন্তু এই চাঁদের আলো আজ যেন সব

জুড়িয়ে দিয়েছে। আঃ, সত্যি বলছি বিত্তু ভাই আজ আমার  
কপালে হাত দিয়ে দেখ, কেমন পরিস্কার হয়ে গেছে।

বিত্তু—(হেসে) তা সত্যি পরিস্কার হয়ে গেছে।

খুড়ো—হরিপদ কোথায়?

বিত্তু—বাড়ীর ভেতরে।

খুড়ো—যাই ওর সঙ্গে পরামর্শ করি।

বিত্তু—কাল থেকে কারখানায় আবার পুরোদমে কাজ চালু হবে।

জানতো সতু ফিরে এসেছে।

খুড়ো—শুনলাম। খুব আনন্দ হল। আবার তোমরা দুই বন্ধুতে  
এক হলো।

[খুড়ো বাড়ীর ভেতর যায়। বিত্তু গাড়ীর পেছনে গেলে মায়া  
বেরিয়ে আসে]

বিত্তু—মায়া।

মায়া—বিত্তুদা।

বিত্তু—মনে খুব কষ্ট পেয়েছো না?

মায়া—কষ্ট হয়তো পেয়েছি, কিন্তু আপনি যেজন্মে ভাবছেন সেজন্মে  
নয়। বিশ্বাস করুন আমি নিজের কথা ভাবছি না। ভাবছি  
বাবার কথা। আপনি জানেন না বিত্তুদা, আমার জন্মে  
তঁার ভাবনার আর অন্ত নেই। টাকাটা দিয়ে অবধি কত  
রকম চিন্তা করছেন। আমার জীবনটা যেন ওঁর জন্মেই নষ্ট  
হয়ে গেল।

বিত্তু—হাজার হোক, বাবাতো, মেয়ের বিয়ের চিন্তা।

মায়া—বিয়ে, বিয়ে, কেন বিয়ে না করে কি থাকা যায় না।  
আপনাদের কথা শুনলে সত্যি এক এক সময় এত বিশ্রী

লাগে। মনে হয় এ জীবনটার যেন আর কোন দাম নেই।

বিশ্ব—আমি তা বলিনি মায়া, তুমি ভুল করছো।

মায়া—ভুল, ভুল, সারাজীবন শুধু ভুলই করলাম।

বিশ্ব—সময় যে এতটা হাল্কা তা আমি আগে বুঝতে পারিনি। আমি ওকে ছাড়বো না, এর একটা বোঝাপাড়া—

মায়া—দোহাই আপনার, বিশ্বনা, আর আমাকে অপমান করবেন না, অনেক সহ করেছে, শুধু দয়া আর করুণা, ছিঃ, ছিঃ—

বিশ্ব—এ কি বলছ মায়া?

মায়া—আমি ঠিকই বলছি, আমরা গরীব বলে, বাবা সংসারের মার-প্যাচ বোঝেন না বলে—

বিশ্ব—না না মায়া লক্ষ্মীটি শোন (হাতে হাত ঠেকে যায়)।

মায়া—(বিশ্বয়ে) বিশ্বনা!

বিশ্ব—মায়া (একটু থেমে) আমি জানতাম তোমার আর সময়ের মধ্যে মিলের চেয়ে অমিলটাই বেশী, মনে হত তোমরা ভুল করছ, জীবনটা শুধু সোনালী স্বপ্ন নয়—

মায়া—একথা কেন আপনি আমায় আগে বলেন নি?

বিশ্ব—ভয়ে।

মায়া—কিসের ভয়?

বিশ্ব—পাছে তোমরা আমায় ভুল বোঝ, তুমি জান না মায়া—আমার জীবনেও একটা কত বড় ফাঁক রয়েছে, সেখানটাও একেবারে ফাঁকা ধু ধু করছে। ছোটবেলা থেকে নিজের বুদ্ধিতে কাজ করছি, কান্নার কাছ থেকে এতটুকু পরামর্শ পাইনি, খারাপ হয়ে গেছি ভেবে সকলেই আমায় খরচের খাতায় ফেলে

দিলে—উঃ তোমরা জান না সে জায়গাটার আশি কত একলা, কতখানি নিঃসঙ্গ।

মায়ী—বিশ্বনা।

বিশ্ব—সবচেয়ে বড় ভুল করেছিলাম লেখাপড়াটা ছেড়ে দিয়ে। তার পর থেকেই চিরকাল একটা Inferiority complex এ ভুগছি। তোমাদের কাছে নিজেকে বড় ছোট মনে হত। ইচ্ছে থাকলেও মুখফুটে কিছু বলতে পারতাম না। যদি তুমি ঠাট্টা করো। যদি তুমি হাস। (একটু থেমে) আর কি আশ্চর্য, আমিই প্রথম বুঝতে পারি সময়ের সঙ্গে তোমার একটা প্রীতির সম্পর্ক গড়ে উঠেছে, তাই আরো বোবা হয়ে গেলাম। যদি আগে বলে ফেলতে পারতাম, (মায়ীর আবেগের সঙ্গে ভিতরে প্রস্থান) যাকগে ভগবান যা করেন তা মঙ্গলের জন্ত, হয়তো তুমি আমাকে গ্রহণ করতে চাইতে না, তা হলে আরো দুঃখ পেতাম—মায়ী (ফিরে দেখে) ও চলে গেছে, ছিঃ ছিঃ মিথ্যে এত কথা বললাম? (ছট ফট করে) কি জানি কি মনে করলে (জোরে) মায়ী, মায়ী একবার শুনে যাও।

[ খুড়োর প্রবেশ হাসি মুখে ]

খুড়ো—বিশ্ব আজকে আমার যে কি আনন্দ হচ্ছে, তোমাকে বলে বোঝাতে পারবো না। আমার যে কত আশা ছিল, কিন্তু বলতে পারিনি যদি তোমরা ভুল বোঝ।

বিশ্ব—খুড়ো মায়ী বলেছে তোমায়—

খুড়ো—তা নইলে আমি জানবো কি করে?

[ বাইরে গোলমাল ইনস্পেক্টর, রাজেন, সতীন প্রভৃতির প্রবেশ ]  
ইনস্পেক্টর—মাপ করবেন বিশ্ববাবু, একটা জায়গা আমরা ভাল করে  
দেখতে চাই, তখন তাড়াতাড়িতে দেখা হয়নি।

বিশ্ব—কোন জায়গা ?

রাজেন—( গাছের তলা দেখিয়ে ) এই ছুড়িগুলো একটু সরিয়ে  
দেখতে চাই।

বিশ্ব—( সতীনকে দেখে চাপা রাগে ) সতীন স্কাউণ্ডেল।

সতীন—আমি কিছু জানিনা।

রাজেন—ভয় কি তোর, আমি তো আছি, ইনস্পেক্টরবাবু অর্ডার দিন।

ইনস্পেক্টর—বিশ্ববাবু আলোটা জেলে দিন তো।

[ বিশ্ব গাড়ীর উপরের আলোটা জেলে দেয়। ]

ইনস্পেক্টর—জমাদার গাছের তলা সার্চ কর।

পুলিশ—আজ্ঞে সকলে এখানে পূজা করে—

রাজেন—ঠিক আছে আমিই সরাচ্ছি। সতীন হাত লাগাও।

খুড়ো—করেন কি রাজেনবাবু, করেন কি ? [ হৈচৈ করে সকলের  
প্রবেশ। ]

জগদীশ—কি, ব্যাপার কি ?

খুড়ো—আবার ওরা খুঁজতে এসেছে—

ভোলা—ও শালার সর্বনাশ হবে, এ আমি বলে দিলাম।

ইনস্পেক্টর—চুপ করুন, চুপ, চুপ।

রাজেন—পেয়েছি ইনস্পেক্টর—এই যে একটা, এই আরেকটা এই  
দেখুন—বললাম চোরাই মাল যাবে কোথায়—দেখেছেন  
তো রাজেন মল্লিক কখনও মিথ্যে নালিশ করে না, চোরের  
বংশ চোর—



ইনস্পেক্টর—Strange. যা মাল পাবে সব বস্তায় ভরো, থানায়  
যাবে—

[ নেপথ্যে—কি বলছিল তুই, রাজেন শালা আবার পুলিশ নিয়ে  
এসেছে, দাঁড়া দেখাচ্ছি মজা বলতে বলতে সতুর প্রবেশ ]

সতু—এসব ছজ্জুতী সুরু করেছেন ?

রাজেন—কিছু নয়, বিত্তবাবুকে একটু শ্রীঘরটা ঘুরিয়ে আনি, উনি  
আজকাল নতুন বাবু হয়েছেন কি না—

সতু—কি হয়েছে, কি ?

রাজেন—অত মেজাজ দেখাতে হবে না—এই যে বামাল সমেত চোর  
ধরা পড়েছে। বাছাধন এবার টের পাবেন, ভাল করে দেখে  
নাও এ ভানুমতীর খেলা নয়।

ইনস্পেক্টর—বিত্তবাবু এবিষয়ে আপনার কিছু বক্তব্য আছে ?

সতু—( চারদিক দেখে নিয়ে, হেসে ) বিত্ত আর কি বলবে ! এই  
মালগুলো আমিই রেখেছিলাম।

ইনস্পেক্টর—আপনি ?

সতু—হ্যাঁ—মানে আমার আবার নেশার অভ্যাস আছে কিনা—তাই  
এগুলো সরিয়ে রেখেছিলাম, যাতে দরকার পড়লে বিক্রী  
করতে পারি।

বিত্ত—কি বলছিল সতু—

জগদীশ ও ভোলা—সতুদা—

সতু—আমি ভেবেছিলাম এর মধ্যে লুকুলে কেউ ধরতে পারবে না, যাক  
ধরা যখন পড়েই গেলাম স্বীকার করাই ভাল।

রাজেন—না না ইনস্পেক্টর সাহেব ও কিছু জানে না, বিত্তই হচ্ছে  
আসল চোরা কারবারী—

সতু—ফের কথা বদমায়েস, মাটিতে মুখ ঘসটে দিলে তবে আমার  
রাগ যায়—

বিণ্ডু—সতুর কথা বিশ্বাস করবেন না ইনস্পেক্টরবাবু, ও আমাকে  
বাঁচাবার জন্তে মিথ্যে কথা বলছে, ও এসবের কিছু  
জানে না—

জগদীশ—সত্যি কথা, সতুদা দির্দোষ—

ইনস্পেক্টর—আমি এখন কাকে বিশ্বাস করবো, তাহলে দুজনেই  
থানায় চলুন।

সতু—আমি তো দোষ স্বীকার করছিই, বিণ্ডুকে আবার এর মধ্যে  
জড়াচ্ছেন কেন ?

বিণ্ডু—না, না, এ আমি কিছুতেই হতে দেবো না, জগদীশ, ভোলা,  
সতুকে ধরে রাখ, আমি যাচ্ছি এদের সঙ্গে।

সতু—বা, বা, বা, খুব একেবারে মহত্ব দেখাচ্ছেন ! আমাকে বাঁচাতে  
গিয়ে গ্যারেজটা যাক্, ওরা যা চায় তাই হোক্, যেমনি  
গাধার মত বুদ্ধি—চলুন ইনস্পেক্টরবাবু, যা বলার আমি  
থানায় গিয়ে বলব।

ইনস্পেক্টর—আপনি স্বেচ্ছায় সমস্ত দোষ স্বীকার করছেন ?

সতু—করছি।

বিণ্ডু—না, না, ইনস্পেক্টরবাবু—

সতু—আঃ খুড়ো ওকে সামলাও। চলুন, থানায় চলুন। (সামনে  
রাজেনকে দেখে) বেরোও বেরোও এখান থেকে—

ইনস্পেক্টর—চলুন রাজেনবাবু, জমাদার সব মাল নিয়ে এস—

সতু—আমাকে এক মিনিট সময় দিন, এদের সঙ্গে দুটো কথা বলে  
যাই—

ইনস্পেক্টর—বেশ, আমি বাইরে অপেক্ষা করছি—

[ ইনস্পেক্টর ও রাজেনবাবুর প্রস্থান ]

বিষ্ণু—এ তুই কি করলি সতু?

সতু—ঠিকই করেছি, ওরা চায় এই গ্যারেজটা ভেঙ্গে দিতে, তা আমি  
কিছুতেই হতে দেবো না। তুই থাকলে গ্যারেজ থাকবে,  
ভাল করে চালাব।

বিষ্ণু—ওঃ রাজেন মল্লিকের কত বড় শয়তানী।

খুড়ো—এই সময় যদি আমার টাকাটা থাকতো, হয়ত তাদের  
বাঁচাতে পারতাম।

[ সরষু ও মায়া এসে দরজার কাছে দাঁড়ায় ]

সতু—খুড়ো তুমি আবার সেই টাকার কথা ভাবছ, ওই টাকার জন্তেই  
তো রাজেন মল্লিকের এত লোভ, মদন ড্রাইভারের শয়তানী,  
সতীনের নেমকহারামী—

সরষু—সতু ভাই, একি করলি তুই!

সতু—( ধরা গলায় ) দিদি, আর কেউ না জাহ্নক তুমি তো। জান দিদি,  
রাজেন মল্লিকের গ্যারেজ ছেড়ে যেদিন চলে এসেছিলাম,  
বিষ্ণুই ছিল আমার সবচেয়ে বড় ভরসা। আমারই জন্তে  
ও চাকরি ছেড়ে দিলে। নিজের বাড়ীতে গ্যারেজ করল।  
আমাদের রক্ত জল করা খাটুনি। এরা এত সহজে ভেঙে  
দেবে। না না, তা আমি হতে দেব না।

বিষ্ণু—কিন্তু সতু আমার মন যে কিছুতেই নায দিচ্ছে না রে—

সতু—কিছু ভাবিস্ না। বিষ্ণু, কদিনেরই বা মামলা, খুব বেশী হলে  
হয়ত কয়েকমাস আটকে রাখবে। সে আমার পক্ষে  
এক রকম ভালই, কোথায় মদ খেয়ে পড়ে থাকতাম।

নিজেতো ঘর বাঁধতে পারলাম না। তুই ঘর বাঁধিস।  
আমি ফিরে এনে তোর স্বথের সংসার দেখবো। এই  
গ্যারেজ দেখবো। তখন কত বড় হবে, কত নাম হবে।

ইনস্পেক্টর—সতুবাবু চলে আসুন—দেরী হচ্ছে।

সতু—(যেতে গিয়ে) এই যে আসছি, (আবার ফিরে) বিত্ত মাঝে  
মাঝে সাবিত্রীর খবর নিস, ও বেচারী বড় একলা। আর  
আমার জন্মে ভাবতে বারণ করিস।

[সতু আস্তে আস্তে বেরিয়ে যায়। সকলে স্তব্ধ। চোখের জল  
সামলাবার চেষ্টা করে। ধীরে ধীরে পর্দা নেমে আসে।]

যবনিকা